

ПЕТӢ 1926 ВОСЯНЬ

ЛЭДЗӢНЫ: ПЕЧАТЬ ДА ЮӢР СЕТАН КОМИ РЕСПУБЛИКАСА АГЕНТСТВО,
КОМИ РЕСПУБЛИКАСА ГИЖЫСЬ КОТЫР

ВОЙВЫВ КОДЗУВ



ISSN 0134-4323

БЫД ТӢЛЫССЯ ЛИТЕРАТУРНО-ХУДОЖЕСТВЕННОЙ ЖУРНАЛ

3

РАКА (МАРТ)

2016

ТАЙӢ НОМЕРЫН:

Надежда ПАВЛОВА. Тувсовъя ме, збыльысь ставнам тувсовъя... Кывбуръяс	3
Николай МАЛЫЦЕВ. Кык висът	6
Нина ОБРЕЗКОВА. Виль кывла... Кывбуръяс	13
Алексей МИШАРИН. ШудсӢ быдӢн ас ногыс кылӢ. Повесът	16
Екатерина МАТВЕЕВА. Кор сӢлӢмьд сылас... Висът. Кывбур	35
Андрей ВЛАСОВ. Курыд шуд. Кык юкӢна драма	38

ВУДЖӢДӢМЪАС

Павел ЧЕРКАШИН. Найда ордын. Видза олан, шондӢ! Висътъяс	59
Альбина СЕЛИВАНОВА. Серамбана висътъяс	69
Александр ПАНЮКОВ. Войнаысь полӢм вӢсна. Висът	77

12+

Обложка вильын снимокыс Елена ХолоповалӢн.

© «Войвыв кодзув» («Северная звезда»), 2016 г.

СЫКТЫВКАР

СЕВЕРНАЯ ЗВЕЗДА



**Ежемесячный
литературно-художественный
журнал**



Учредители:

**АГЕНТСТВО РЕСПУБЛИКИ КОМИ ПО ПЕЧАТИ
И МАССОВЫМ КОММУНИКАЦИЯМ**

**«СОЮЗ ПИСАТЕЛЕЙ РЕСПУБЛИКИ КОМИ» - РЕГИОНАЛЬНОЕ
ОТДЕЛЕНИЕ ОБЩЕРОССИЙСКОЙ ОРГАНИЗАЦИИ
«СОЮЗ ПИСАТЕЛЕЙ РОССИИ»**



Издатель:

АУ РК «ИЗДАТЕЛЬСКИЙ ДОМ КОМИ»

ДИРЕКТОР: ПОПОВ В.В.



РЕДАКЦИОННАЯ КОЛЛЕГИЯ:

Главный редактор

ПОЛУТРУДОВ А.В.

Ответственный
секретарь

КИЧИГИН И.Н.

УЛЬЯНОВ А.В.

УЛЯШЕВ О.И.

ЛИМЕРОВА В.А.



Надежда ПАВЛОВА



Тувсовъя ме, збыльысь ставнам ТУВСОВЪЯ...

КЫВБУРЪЯС

* * *

Кокниа плавгöны-шлывгöны
Помасьтöм югыдлöз енэжті
еджыд, шоныд кымөръяс.
Кöть эськö и абу ичöтöсь,
а со тай кутшöм кокныдöсь, пушыдöсь,
весиг төвру пöльыштöм
нöбöдö найöс, öдöбтö водзлань.
Шемöсöдз волан,
Кымынысь кужöны вежлыны мыгöрсö:
Со слөнъясөн тапкöны,
Кöчильөн йöктöны...
А ме ичöтик морт
Сулала му вылын,
Киясöс шеныштöмөн...
Кöть эськö абу жö сьöкыд,
да ог тай вермы лэбзыны на бöрся.
Мыйла эськö тадзсö?
Сэтшöм öмöй сьöкыд
менама олöм руй?
Вот эськö син куньыштлігкост
орöдчыны, кыпöдчыны,
мед гөгöртны став мусö!
Юрын друг вирдыштіс:
А оз кö тырмы тэнад,
Ичöтик мортлөн, выныд
Воштысьны бөр гортöдзыд,

а он кӧ куж аддзыны
бӧр туйсӧ?..
Сы вӧсна, тыдалӧ,
ог и лӧбав,
туй тӧдтӧмьд.
Тӧдчйтӧм вӧньӧн,
тыдалӧ, кӧртыштӧма менӧ,
ичӧтик мортӧс,
тайӧ муыс.
Сӧдзкӧ, ме тайӧ муыслы колана!?
А кымӧръяс? Кымӧръяс — енӧжлы.
Лӧбӧй, сӧдзкӧ, донаяс,
ыджыд да пушыдъяс,
еджыд да шоныдъяс!
Вӧля тӧянлы енӧжын,
меным — му вылын.

* * *

Водз тулыснас быд пожӧм йыв
Югзьӧ, банийӧ ичӧтик шондӧн.
Быд шондӧлӧн аслас югӧр чукӧр,
Быд югӧрторйын олӧ шондӧ кыв,
Быд кывйын некымын шыпас,
Быд паслӧн аслас шы.
Ме, тувсовъя кадлӧн ныв,
Кыа наысь шондӧ сыланъяс,
Кокниа павкнитышта найӧс сынӧдас
Му вылас став ловъя лолыслы шоньд былӧ.
Мед югыда сылӧны гажа тулыснас.
Ок, кутшӧм ӧтувтысь вын овмӧдчас тайӧ
сыланас:

Быд пу йывлӧн,
Быд ичӧтик шондӧлӧн,
Став югӧр чукӧрлӧн,
Быд шондӧ кывлӧн,
Став шыпас,
Быд шылӧн
И менамлӧн,
Тувсовъя кадыслӧн
нывлӧн.

* * *

Ен сетӧма мен вывтӧ уна:
Такӧдны, бурмӧдны йӧз сьӧлӧм.
А тайӧс вермӧ вӧчны
сӧмын лов вӧрзьӧдан гаж.
Бур кывъя, югыд сылана,
Мича йӧктана,
Ылӧдз кылана,
Лолӧдз пырана.

Кор асалан ставӧс,
И ачыл ставлы лоан асӧн.
Югзылан и югзӧдлан
Шонді моз олӧм русӧ.
Ен сетӧма мен вывтӧ уна.
Тайӧ, гашкӧ, и эм менам шудӧй,
А ме нимта уджӧн.

* * *

Тувсовъя ме, збыльысь ставнам тувсовъя,
Дженьыд платтьӧа, лӧз шальӧй кузь сыръя.
Кокни руа овла, югыл вежӧра,
Оз тай петшӧр та кад ёна петшӧрав.
Верма сывдны ловтӧ, верма кынтыны,
Сылан-йӧктанъясӧн дзикӧдз гындыны,
Верма жалитыштны, верма ылӧдны,
Ытва дырйи шогтӧ, дойтӧ кылӧдны.
Верма синва пычкины и гажӧдны,
Дженьыд войяс нюжӧдны да лажмӧдны,
Верма сӧлӧм косытны, вежӧр тӧлӧдны,
Сӧмын гожся кадыс вермас ӧлӧдны.

❖ ❖ ❖

КЫК ВИСЬТ

Дивит кӧть эн...

Ывлаын кокныдика ышлолаліс помасьысь гожӧм. Войвылад миян и сентябрыд лымйӧн чӧласьывлӧ мукӧд вонас, а таво нывбаба гожӧмыс некытчӧ эз тэрмась: войяс ыркыдӧсь, асылыс руа, луныс шондіа, а рытыс — прӧстӧ лӧсьыд, мӧд кыв он корсь. Татшӧм арыс сиктса олысьыдлы, позьӧ шуны, козин, торйӧн нин сы вӧсна, мый вӧр-ваыс лышкыдасьӧ тшак-вотӧсӧн. Эз омӧль урожай вӧв и колхозлӧн, дай ас овмӧсьясын тшӧтш. Эськӧ нимкодьясь да нимкодьясь, да он на тай: войналӧн сьӧд грӧза кымӧр ӧшаліс йӧз юр весьтын, помся йирис томлысь и пӧрысьлысь сьӧлӧмъяснысӧ. Сиктын, гашкӧ, унджык нывбабаыс дӧва нин, челядыныс — сирӧтаяс, а том нывъяслӧн сьылан горныс рам да нор. Кадыс быттьӧ сувтӧма: эз нин кут помасьны тайӧ ёрӧм кадыс — помся мудзлун, тшыгъялӧм, надея торксьӧм...

Опонь Сандраяслӧн ужнайтӧмыс сідзи и лои кутши-ветши: пӧрысь мамыс водӧма нин паччӧрӧ, сёйыштӧма-я, абу-я; дзоля нывкаясыс нискӧны-узьӧны занавес сайын, велалӧмаӧсь водз водны да; Коля пӧлатяс ланьтӧма, гашкӧ, и узьӧ жӧ нин да. Сійӧ сёрӧдз котралӧма-корсьысьӧма мӧссӧ. Тайтӧыс стадасьыс ылалӧма, гашкӧ и, вӧр туйӧд локтігмоз тшакасис, со и лоис корсьны. Кӧмтӧгыд кокниа котравсис, но вирӧдз варччылӧм кокъяссӧ ёна на чӧсӧдіс. И солидолнад он мавт: вольпасьтӧ лякӧсьтан. Видз вылад кӧ, мый — вонъяд узигӧн туруныд лякӧссьы кӧть эн. Ӧні пӧлатяд мудзысла да кок чӧсӧдӧмысла Коля то вугыртлас, то дыр жежӧ садмылас.

Сандра Сюраньсӧ лысьтӧм-идралӧм бӧрын мыйсюрӧ тютп-тяпкерис — со тэд и ужын: нянь абу, но залавка вылас вӧлі мыйсюрӧ: нӧкйӧн пражитӧм картофель, пувъя йӧв. Арыд тай ар на и эм, сё майбыр. Мудзыс веськалыштис и Сандралы. Чеччис пызан сайысь, кор вӧлі вель нин пемыд, но эз биась: Колялы гортса уджъяс вӧчны оз ков вӧскресенньӧ паныдӧ, да и тӧвнас карасиныд сідз на ковмас.

Муртса некымынысь чӧвтис пернапас, думсьыс корис Кристослысь, медым верӧсыс война вылысь регыдджык локтас, кодкӧ ӧшинь куричӧ куимысь ньӧжйӧника таркнитис. Видзӧдліс занавестӧм ӧшиньӧд да тӧдіс ассьыс пӧдругасӧ, Сергей Аннаӧс. Сідзсӧ эськӧ Сандра быдӧнкӧд лӧсяліс, но Аннакӧд торъя нин.

— Пыр, Анна, эг на удит игнасьны,— негора кывъясӧн вочаліс Сандра пӧдругасӧ.— Мыйкӧ нӧ лоис али мый, сёркодъ нин да?

— Пыра, Санюк, да ставсӧ сёрнитам.

Кокчуныйылазмоз пырисны сӧсся олан жыръяс. Анна лӧниника юаліс, пӧлать-паччӧрлань индігмоз:

— Узьӧны нин?

— Узьоны кө-а. Кутшом нин мог, Ануш, суис тэнö?

Анна перйис зепсыс куим пельöсa письмö. Сандралөн сьölö-мыс дрөгмуніс: абу-ö нин Васькосянныс кутшöмкö юөр? Татшöм письмöяссö öд фронт вывсянь ыстывлісны. Но мыйла нö пошта-льон Соняыс ачыс эз вай? Гашкö, лёк юöra да, поліс Сандраöс дзерöдны?— И Сандра гусьöник ломзьöдіс чусісö.

А Анналөн чужöмыс шог дай синваыс дзöлькъялö мича лöзоват синъясас. Сандра дзикöдз лигышмуніс, сöмын вермис вишкан гөлöсөн корны:

— Мый нö письмöад гижöма? Абу-ö вөр-немечыд ад горшас Васькоöс суйöма? Сідзи и тöді...— сыркъялöмсор, кызкö оръясяна шыясөн шуаліс Сандра.

Коля кыліс тайöс ставсö (оз на тай прамöя вöлөм узь) да быттö кынмис, весиг лов шысö поліс лэдзны, кывзис, мый йылысь кутасны водзö сёрнитны мамыс да Анна тьötка. А ыджыд мамыс кыліс эськö, мый кодкö локтіс, но сьöкыд пельнас эз велав, мый йылысь сэн кык баба сёрнитöны, да эз и шыась ни суитчы.

— Эн шогал, Санюк, тайö письмöыс Ухтасянь, Наста сочсянь. Төн нин пошта Соня вайис, сё пöл лыдди ас кежысь дай решитчи...— и Анна тінь бөрддзис, матыстчис Сандралань, кутліс дзигöдіс пöдругасö.— Эн дивит, муса пöдругай, грек кöть спасеннö, решитчи энöвтны чужан грездöс...

— Во имя Отца, мый нö думыштöмыд?

А Анна быттö нинöм эз кыв:

— И гажа Ёльдинöс, и тиянös, муса ёльдинчиös...

— Чöл, Ануш, благслö Кристос...

— И тэнö, медся муса пöдругаös, Санюк. Öтнадкöд и медся бөръяөн прöщайтча... Аски ог нин ло муса грездын, дона ёльдинчикöд,— скрипью бөрдігтыр шуаліс Анна.

— Шыбит, Ануш, лёк думъястö.

— Лёк ли, абу ли, вай лыддям Насталысь письмöсö,— и Анна разис-паськöдіс куим пельöсa юöрсö. Сандра ломзьöдіс карасина лампа-семилинейка да сувтöдіс пызан вылас, нöшта и бумага абажур ладитіс, медым узьысьяслы синманыс би югöрыс эз усь. Чусісö кусöдіс, а то тшыныс кутіс нин син чамыртны.

А Колялөн пöлатяс сöмын юрлöсыс узис. Кöть Анна тьöтыс лыддис письмöсö лöня, детинка кыліс ставсö «стöчку». Со мый гижöма Наста тьöтыс.

«Здравствуй, дона соч Аннушка дай свет Михайловна. Гижа комиён, мед цензуралы кө сюрас, дашкö, оз гөгөрвоны ставсö. Тэнсьыд письмötö пöлучиті да бöрданінысь эг на и дугдыл. Сё-ысь видзöдла карточкатö, көні тай пукалам тэкöд да ещö Тарас Нина — Опонь Öльöксей тай снимайтліс. Миянкöд баракын олö хохол Сашка, Западнöй Украинаысь пö. Семьяыс пö керканас и ставнас бомба улö сюрöмны, а асьсö татчö вайöмны дас во кежлö. Видзöдлас карточкатö да синваыс доршасьлас, тэ пö дзик менам Анюточка кодъ жö мича. Ме шуа, мыся, Анюточка жö эськö, да ылын. А мый нö, Аннушка, том йöз йывсьыд нинöм он гиж? Кöть вед войнаыд торкö семья лöсьöдöмтö, кузяла тадз оз жö ло. Ме вот мый шуа, муса соч. Шыбит ставсö сэ-тысь, тырмас пустöй трудовень вылад туртны лун и вой тшыг

нисьö пöтнад да ротйысьöм кышан-кöманнад. Öти вед олöмьд. Дерт, справкатöгыд колхозсьыд оз лэдзны, но чöрту, гусьöн пышйы да корысь баба улö славаöн кызкö-мыйкö лок ради бога ме дінöдз. Тані уджыд тэ кодъ ён да зиль бабаыдлы сюрас. А сёян-юан да кышан-кöман кузяыд ничево олам, ог дерт, шикарнöя-а. Лок, он каитчы. Ме пошта Сонякöд письмöася, кодкö кö подходящöй зон локтас война вывсьыс, мед меным гижас. Помнитан, Ивö Арсень тай тэ бöрся вöтлысьліс, но сійö öдвакö локтас, то коймöд во нин, а сысянь дук ни пак. Эн скöрмы, муса соч, тадз кö гижа, страшнöй олöмнад тай мыйсюрö и гижсяс. Ме вед тэныд толькö бур желайта, лун и вой шогся тэ вöсна. Сёясь шуа: лок, тысячаысь окышта, муса соч Аннуш. Тырмас ас вылад тешитчыны, öтчыд вед олан вöльнöй свет вылас. Колхозад нять пытшкас сідзи и гуалан асьтö, андел кодъ мича да муса соч менам. Гижа и горза-бöрда öтнам, букваыссö эг кут аддзыны. Пока прöщайтлы, муса Аннушка, öбязательнö лок! Гижис тэнад шогсьысь сочыд — Анастасия Седьурова. Сёясь, тысячаысь окышта дай кора: лок, лок!»

Письмöсö лыддигöн Анна ачыс дугдывтöг бöрдис, шог да бöрдан чужöма пукаліс и Сандра. Коля пöлатяс быттö изöймитöма, но синъясыс шармисны и пельясыс чош. Шы лэдзны оз лысьт, кöть и кыткö луддзас. А сьölöм вылас мыйлакö деливö жö: эськö войнаöдзса кодъ жö кö вöлі олöмыс, Анна тьötкаöс некутшöм Ухтаö некод эз кор, дашкö, и ачыс на Настя тётяыс локтис асланым сиктö.

Чöv пукалісны кык пöдруга бур здук. Анна жö и торкис чöv-лөнсьö:

— Дивит кöть эн, Санюк дай Опонасьевна, мöдöдчи да ог нин бергал. Тэ дінö, медся муса пöдруга дінö, прöщайтчыны пыралі.

— Öні и петін сövсем вылö али мый?

— Öні...

— Сыктыл перевозыд вед войнас оз уджал.

— Ельдин улöд келöмөн вуджа, ыджыд пожöм весьттис ляпкыд, тön наросьнö вуджавлі, масленик да рыжик вотігмоз.

— Дай вед дзурс пемыд...

— Пемыдыс и колö. Сэсся мöдлапöl берег пölöныс мир туйöдзыс воöдча. Джианъельыс пö шор кодъ лоöма, сэті кызкö вуджа жö.

Бара чöv-лөнъ, сöмын Анна корсюрö нырнас кыкышталіс, сыркъяліс шочиника.

— Керкаöс эг и игнал, воштыны сэтысь нинöм. Деньгатор ичилика сьöрысь, а нопторйöс коли кильчö помад.

— Ануш, эн дивит, юала кö. Тэнö вед сусед Ёгорыд, тыдалö, радейтö. Шулін тай, кораліс пö,— шыасис Сандра.

— Мем эськö жаль сійö. Но вед Ёгорыд, сьökыда ранитчöм мортыд, дашкö, недель-мöд бöрын лоас гуын-гортйын, а ме бара öтнам коля? Коньöр, эськö и öтлаасьны мекöд бура ёна окотитö да. Зиль и, колхоз предад суйисны да, лун и вой жугöдчö, кок йылас нин кутис косьмыны. Мöд ногөн думайта да, ме кодыд сылы век сюрас, то тай кымын дöва баба грездад.

— Ануш, ме вед тэнö сövсем ог паныдал мунöмсьыд. Дашкö и,

чассьоыд тэнö Ухтаас корсьö. Миянлы тан нин лоас згинитны-а. Öтиторйöн и сьölöмöс такöдышта, мый челядь эмось, дашкö, наялы олöмыс прамöйджык пуксяс, этайö проклятой войнаыс кö коркö понасьлас.

— Прöщайтлы, муса морт Санюк,— и Анна дзигöдiс Сандра-öс косiник пельпомъясöдыс. Кыкнанныс сыркъялисны. Дерт, позис унатор на сёрнитны-шуавны, но мый и шуан? Мый и вежан?

— А мый нö эськö висътала, грездса бабаяс кö кутасны юасьны, кытöн нö пö любезной пöдругаыд?— артмис Сандралöн.

— Ог, шу, тöд. А ме лун-мöд сайын шулi Ёгорлы, мыся, окота видлыны мöдлапöлса Яганысь, рыжик эм абу. Сыктывсö вуджны босьтла Пöтей Колялысь пыжсö. Вуджöдлi нин да, эз видчы. Дерт, кутасны корсьысьны, но кытысь нин менö аддзан? Вошöм улö славаöн и лоö энолтны горттö дай рöдинатö...

Бöрдiсны кык пöдруга дыр, сьölöмсянныс, такöдны позьтöма. Коркö-некоркö Сандра быттö шай-паймунiс:

— Мыйкö нö нуръясьыштантор вед босьтiн жö? Кузь туйö вед мöдöдчан.

— Босьтыштi, дерт, да унатö вед он босьт. Менам, дашкö, колмылас корысь улö сетчыны,— кöсйис нюмтёвтны Анна, но эз артмы.

— Паньышт кöть то пуля йöл. Дай ещö босьтышт туй вылад пöжалöм картупель, рузумö гартышта да. Сёркни паренча на мамо пöжалöма,— вöзъялис Сандра.

Коля пöлатяс думыштіс: «Ме кö эськö весиг переченной пуртöс сетi, но шыасьны оз позь, а то видасны, мый пö кывзысьöмыд сэні».

Анна ставторсьыс öткажитчис, мый босьтны пö, тэчöма нин нопъяс. Горшöй пö косьмö, да юыштіс асья лысьтöм кöдзыд йöв, кодöс Сандра кринчанас пыртiс чулансьыс.

Сэсся кыкнанныс, быттö сёрнитчöмөн, сувтісны öбраз водзö да мыйкö шöпкöдiсны, пернапас чöвталiсны öтсöгласөн. Анна и пидзöс вылас сувталiс. Синваыс — шорөн, вом доръясыс тіралöны.

— Кытчö бара и мöдöдча-а... Ойя дай ойя. Олöм серсö гортысь эг кут аддзыны, чассьö корсьны муна, а көн-я, дай эм абу сійö? Код вылö и надейтчыны?— Анналöн гыалысь пытшкöссьыс петысь кывъяс дзерöдiсны и Сандраöс.

— Ен да бур йöз, Аннуш...— оръясян гөлөсөн шуис та вылö Сандра.— Тэ чассьötö аддзан на, а миянлы Енмыс шуöма тан нин сiсьмыны.

— Эн дивит, Санюк, тэ вед меным соч кодь. Ёльдiнсьыс медся бөръяөн тэнö и аддза...— и Анна ырöстöмөн бöрддзис.

Колялöн öти нога куйлöмсьыс позяліс ки-кокыс да гора шы улас бергöдчис и бөр ланьтіс, а Марпа ыджыд мамыс садьмис да чуймис:

— Сандра, мый нö лоис?

— Узь, мамо, узь. Ме регыд вода жö...

Сандра пöльыштіс лампа бисö, да кыкнанныс лöня петiсны ывлаö. Колис мыйтакö кад, но Коля эз нин кывлы кильчö иганөн гольснитöм ни мамыслысь пырöм. Унмыс личкис детинкаöс...

Пемыдгорулалём

— Ноко, коді тѡдас, кор лоѡ мойдчыны медся лѡсялана ка-
дыс?— юалас вѡлі Марпа ыджыд мамным.

Ми шулім, мый рыт, вой; ар либѡ тѡв. Паина да Анна чойяс
шулісны, быд лун пѡ, но регыд кутім тѡдны: пемдангорулыс.

Тѡвся луныд абу нин, а биасьны водз на. Ыджыд война
дырйи электричество йылысь коми сиктѡсясад и сѣрни эз на
вѡв, а карасинтѡ дзузган лампаад вѡлі сетѡны этша. Колѡ на
вѡлі кисьгыштны и пѡнарѡ, медым карта вылѡ идрасьны лѣччиг
мамлы эз ковмы кималасасьны.

Мыйѡн локтас пемыдгорув кадыс, ми каям коді пѡлатѡ, ко-
ді паччѡрѡ да босьтчам тѡрмѡшитны ыджыд мамѡс:

— Мойд!

— Ставсѡ нин мойді да,— мода вылас «ѡткажитѡ» ыджыд мам.

— Либѡ — нѡд!— корам ставным: сійѡ вед и нѡдкывѡястѡ
тѡдаліс.

Кылѡ, посводз ѡдзѡс кольча гольснитіс. Локтісны вѡча вок
Шура да орчча керкаысь дзѡляник Ивѡ Эмма. Паччѡрѡ ог нин
тѡрѡй, пуксялісны лабичѡ. Мед эз танѡявны да уськѡдны-жугѡд-
ны мыйкѡ, пешим сартас. Пешаыд сійѡ буртор, оз ков карасин,
а вѡрын пуыд тырмѡ на. Сѡмын сартас тшыныс синтѡ чамыртѡ,
дай пешны ковмылѡ вель тшѡкыда, шомсѡ на чеглавны и, медым
биыс югыджык вѡлі. Ме эськѡ и пеши первойсѡ, сѣсся выльѡн
локтысьяслы шуи:

—Кѡсьяннымд кѡ миянын пемыдгоруласьны да мойдѡяс кывзы-
ны, сартассѡ вежлалѡй, а ме паччѡрѡ кая.

Шура да Эмма ышловзисны, но — быть...

Ыджыд мамлы мойдны-нѡдны быть жѡ лоѡ, личѡдлытѡг кѡ
внук-внучкаыд дзайгѡны:

— Кызь верст судзѡ, а юр гѡгѡр оз судз,— друг юалѡ сійѡ.

Некызд ог гѡгѡрвѡй, мый татшѡмыс. Шуалам: шѡрт, венеч,
чышгѡян, вѡжжи, весиг вутыр леса, но быд вѡчакыв бѡрын ызгам-
сералам:

— Вот йѡйыд! Вутыр лесаыд мѡй Паньѡельѡдз кузьтанас?

Мездѡ миянѡс ачыс ыджыд мам:

— Тайѡ, дитѡяс, синмыд.

Ми ставным шемѡсѡсь! А Шура весиг синѡяссияныс баябѡ-
жѡдзыс весѡтасалѡ чуньяснас да юѡртѡ:

— Збыль тай!

Меным и тшѡтш тайѡ теш.

Кильчѡ ѡдзѡсын бара кыліс гиль-голь, сѣсся кок шы: тутш-
тотш, недыр мысти — тотш. Кызѡктас, сѣсся бара тутш, но и,
дерт, тотш. Тадзсѡ миянѡ пырѡ сусед, Ѳльѡксан дядь. Гортас
ѡтнаслы гажтѡм, да быд рыт казялѡ миянлысь биасѡмнымѡс.
Ѳти кокыс пидзѡсѡдзыс пуысь. Сѡрсѡыс век сталинградскѡй
коймѡд кок, кызд ачыс шуліс,— кусыньтѡм воропа бедь. Водзтісѡ
Демѡян Толя дѡльѡдліс Ѳльѡксанѡс:

**Чиган-балаган,
куим кока тѡрѡкан,
рыжѡй уска великан,
куим кока Ѳльѡксан!**

Ольоксан дядь эз и скөрмыв: абу кө пö нель кока и!.. Йö-зыс некод сэсся сійöс эз и дэльöды: кор вед он скөрмы, ним-тысьöмьд оз сирась. А ми тайö дядьсö быд рыт виччысьлім. Пырас, оз и чолöмась, быттьö öні на миянын вöлі да муртса кeжлö петалис ассыыс «кöза кок» чигаркасö шпуткыштны. Öдзöс порогсö öти кокнас на и воськовтас, шуас:

— Öнтай катшаяс висьталисны, виччысьöны нин пö джыджъ-ясыд, да быть лоис локны.— Либö:— Мый нö он гигзьöй? Ме тай нö öтнам и то лунтыр семдымön серала, кытчöдз кань оз öлöд.

Ми тöдiм, мый Öльоксан дядьлы олöмыс абу серавмön: фронт вылас ветлігкості Сандра тьоткаыс кувсис, а челядь эз вöв, та вöсна öтнаслы овны вöлі ёна на и сьöкыд. И век жö мода эз вöв няргыны.

Коркö Öльоксан дядь миянлы рытивбыд мойдіс öти мойд, кызди сійö воюйтöма нелямын рöзбойниккöд. Ме лыддьылі нин арабскöй мойдсö и то эг пырысь-пыр вежöрт, мый Али-Бабаыс — ачыс и эм Öльоксан дядь, а рöзбойникьясыс — фашистъяс. Сэтшöм мастера мойдіс! Сэсся школаса библиотекаысь тайö мойдкывъя книгасö лыддисны мырддысьöмön, кытчöдз эз ко-сясьлы, а бöрыннас и воши дзикöдз.

Марпа ыджыд мам юöртiс Öльоксан дядьлы:

— Удзöдiм! Öні на сералисны пöттöдзныс. Нöдiм да.

— Ноко, ещö öтитор нöд.

— Мамыс — гөрбач, пиыс — бергач.

Ставным думайтам. Эмма «чипöстö»:

— Тайö Öньö Костя да мамыс.

— Мамыс абу гөрба да?

— Костяыс тай урок дырйи век бергалö-а.

Бара ставным думайтам. Гашкö, ыджыд мам тöрытъя модасö босьтiс: грездса став семьяыскöд тöдмöдiс миянöс аслас нöд-кывъясön. Со кутшöмъясön: мамыс чотыштö, семьяас кык ныв да öти ичöt пи; мамыс скöтнича, нылыс карын велöдчö, пиыслön юрсиыс кузь... Дырөн-дырөн, а тайö нöдкывъяссö век «разывлім». Кутiм бурджыка тöдны ас сиктсаясöс дай быттьö ёнджыка «пö-читайтны» кутiм найöс.

Но талун ыджыд мам кызкö гусьöникön көсöйтчылö Öльок-сан дядьлань: оз-ö мезды «джыджъяссö» гөрбача-бергача лэч-сьыс?

— Думыштлöй, шпионъяс, кызди нö шöртыд артмö?— тайö быттьö гусьön вочакыв сетö Öльоксан дядь.

— Кузь кыв!— жервидзö ыджыд мам.— Нöшта кө кутан водзмöстчыны, ог нöд ни мойд. Ачыд, колöкö...

— Но, эн дöзмы,— паныдалö мöдыс.— Заводитiн кө, сын нин мöдлапöлöдзыс.

Ыджыд мам абу дöзмысь. Мыйön ми тöдмалiм, мый гөрбачыс — печкан, а бергачыс — чöрс, сійö миянлы пыр жö выль нöдкыв кайтiс:

— Тöдмалöй: то войтыштö, та войтыштö, а век оз войтышт.

Шура, «сартас дежурнöй», пырысь-пыр «тöдiс»:

— Тайö Ведень Юриклön зырымыс!

Быттьö китыр сартас трач чегисны: челядь семдымön сералис-ны, быттьö найöс кодкö гильöдö.

Ольöksан дядь Шуралы и шуö:

— Тайö вочакывсьыд тэнö наградита: мезда пеша дорсьыд, ачым кута югзьöдны тiянöс. Сэсся вед Юриkyд абу век зырымöсь.

Думайтам выльысь. А Ольöksан дядь оз думайт, сöмын гоб кок кызта чуньяснас малыштö то öти пельыслысь, то мöд пельыслысь льöбсö. Чайтам: гашкö, миянö пыртöдз Кöдзыд пöльыс сэтъястi чеплялыштöма, да сы понда?

Мыйкö Ольöksан дядь тöдö...

— Ольöksан дядь, висътав, тэ вед тöдан,— шуалам ми.

— Менö «кузь кывъясысь» öнтай на ыджыд мамныд муртса эз дiтшкöд да,— дöжнасьö Ольöksан дядь.

Сёысь нин вочавидзим, но нинöм оз лöсяв.

— Но либö эн кузькывъясь, а инды,— шуö ыджыд мам.

Ольöksан дядь водз чуньнас легöдыштiс пель льöб гöгöрыс. Öтчыд дай мöдысь. Сэки некымынөн горöдiм:

— Исерга-а!

Миян велöдысь Лидия Константиновна тшöктiс гижавны нöд-кывъястö, да ме босьтi паметьö найöс, медым бöрыннас гижны, нöшта кык нöдкыв. Öтикис: зурки-зарки пырö, люски-ляски петö. Тайöс кызкö регыдөн и тöдiм: ва лэпталан ведра-черпушка.

Мöд нöдкывйыс аслыссикас дай кузь: каленик югйыштö, сьöд вөр пөрö, са гез кыссьö, кабак султö. Ми сiдз и эг вермöй тöдмавны, и ыджыд мам ачыс висъталiс:

— Тайö, дитяяс, ытшкöм-куртöм, зорöд тэчöм.

Миянлы бара на нимкодъ!

Посводзын кылис татшкакылан кок шы: скöтнöй двoryсь локтiс мам, мудзöма да тöжд чужöма. Кокъясас гын чушнясыс кынöсь, пöрччытöдзыс ковмас ичöt пач водзын сывдыны.

— Мый нö татшöма гажъяланныд?— юалö миянлысь.

Некод нинöм оз шу, сöмын Ольöksан дядь нурбыльтö:

— Куш кö вед, Матрөн, шогсян-гöруйтан, сьölöмыд потас. Кор и гажöдчыласны, не кö челядь кадад? Асьным тай сэтшöмöсь жö вöлим, сэк вед войнаыд вöли жö.

Серам эз нин пет. Öзтiм карасина лампа. Пемыдгорув пома-сис, локтiс прамöй рыт, а сэсся и ужын кад. Некод на эз мунав: гашкö пö, ыджыд мам нöдыштас на? Но сiйö вешйис нок-сыны ужын лöсьöдöмö.

Регыд мам лэччылис гидö, пыртiс кулöм баляпиös.

— Асывнас ыжыс вайсис да, öти баляпи кынмалöма. Ковмас кульны, кöть куыс шапка вылö ли, мый ли шогмас.

Мам пуксис ломтысян пач водзö, босьтiс баляписö да кутiс бергöдлöмөн шонтыны, медым кокниджыка кульяс кучикыс. Баляпи кутiс легöдны кокъяснас, восьтавны вомсö. Ольöksан дядь шензьö:

— Чудеса! Тэнö, Матрөн, колö фронт вылö нуны, кулöмаяссö кутан ловзьöдавны.

— Кысь нин,— юрсö лэптывтöг шуыштiс мам.

Батьсянь мöд во чöж письмö ни юөр эз вöv...





Нина ОБРЕЗКОВА

Выль кывла...

КЫВБУРЪЯС

* * *

Мыйла мортис гортланьыс век кыссьö?
Туйса бусöн, вирöн, пöсьöн мыссьö,
«Гортö! Гортö!— öти мöвп нин юрас,—
Мед жö вынöй, мед жö вынöй сюрас».

Эськö мунас, кыссяс, уяс, лэбас,
Оз корсь туйяс вылысь шоныд лэбув,
«Прöстит, гортöй,— эг нин волю важöн,—
Локта! Локта!»— кыпалас важ гажыс...

...Мудзöм понйöн кильчö вылас водіс...

* * *

Воим сьölöм вылö öта-мöдлы,
Окыштчöмöдз воим — эг и тöдлöй.
Мед жö бара некоді эз казав!—
Сэсся бара вом дор вом дор аддзис...

Радейтчöм? А колök, сідзи шусьö,—
Окасьлывлім водзті йöзсьыс гусьöн.
Мый нö öні лой? Смелмим? Дышмим?
Бывтіджык жö быттö öні ышмим...

Чайта, дугöдчыны таысь колö,
Мед көть мый нин вöчсьö миян лолын.
Абу дас вит, ветымынöс тыртам,
Вай жö, зонмö, гортад менö пыртлы...

...Мед нин томъяс окасёны тадзи,
Тэа-меа мусукасям надзён,
Окасёмлөн воёма нин помыс...
...Бара вом дор корсьо менам вомёй.

* * *

Тэ мунін көрт туй кузя
подён
мена́м оло́мысь.
Ме вóтчылі тэ бо́рся
поездён.
Но эг вóт.
Ёна, тыдалё,
ме дорысь
мунны көсьёмыд.
...Али тайё вóт?..

* * *

Сьёлём ордल्याсё
оз нин таркөд,—
Ёртасьё нин сьёлём
аркөд, аркөд...
Колөк, арыс овлө
зарни, зарни...
Век жö сьёлём лөвтö:
«Ар нин, ар нин...»

* * *

Мыйлакё миян
яла ягъясыс
да зойта* пожомъяс
быдмёны
мөдлапöлас...
Ягъясыс
Паськыдöсь.
Помтöмöсь.
Повтöмöсь.
...Но мөдлапöлас...
А вот эськө
садитны кө
таладор берегас
пожомъяссö,
быдмасны оз?
А ялаыс?

* Зойта, звöйкө (диал.) — зэв джуджыд да веськыд, öткыза дiна-йыла пуяс йылысь; тшöкыдджыка сись кодь пожомъясöс тадз шулöны.

* * *

Ветлі ме Шойнаты сиктö выль кывла...
Школаын вöлім да кывлі ме, кывлі:
«Вöдитліс небöгсö»,— велöдысь шуис,—
Горт йөрö менö тай нöбöдіс-нуис:

Вöдитліс ыджыд мам сёркни да кушман,
Небöг эз вöдитлы. Гашкö, эз кужлы.
Вöдитліс мам менам унакодъ пывсян,
Небöг эз вöдитлы. Вöлі кö, кывсис.

Мойвиис небöгтö вöдитны меным —
Кыздз сэсся кужа. Эн дивитöй менö...

* * *

Колök, важөн нин мунны колö
сэтчö,
көн тöлыскöд сывъясьö рас...
Колö... Колö.
...Да сöмын пола,—
Колök, важөн нин сэн
абу ас.

Колök, локта, а гортöй кöдзыд,
Колök, локта, а öдзöсас пас.
Кильчö помас сэк ковмас жöдзны.
Дерт жö, көнкö нин, абу ас...

И оз лэдз менö гортöй пырны,
И оз восьт ассъыс иган-тас.
Ёна водзджык тай колöма мунны,
Öнi, дерт жö нин, абу ас...

Колök, важөн нин мунны колi
сэтчö,
көн тöлыскöд сывъясьö рас...
Колi... Колi.
...Да сöмын полi,—
Колök, важөн нин сэн
абу ас.

* * *

Пыдын, пытшкын, лов пыдöсам
Овмöдчис дой.
Он, небось, нетшышт —
Пыдын лов пыдöсыд...

❖ ❖ ❖

Шудсö быдөн ас ногыс кылö*

ПОВЕСТЬ

11

РОВД-са кильчö вылын сулалісны некымын полицейскöй да шпуткисны-куритчисны. Öти көсöя видзöдліс зонкаяс былö.

— Тiянылы мый колö?

— Миянлы колö РОВД-са начальник,— Васьö кутчысис öдзöс вугйö.

— Сідзкö, матыстчöй дежурнöй дорö.

Райотделса дежурнöй, полицияса капитан, пукаліс вежöс с-йын. Вежöсыс öшиня, көрт тасъяса. Уліас ичöтик форточка. Капитан шензьöмөн видзöдліс локтысьяс былö да юаліс, мыйла налы начальникыс. Корис петкöдлыны паспорт.

— Кутшöм могөн, аслыс висьяалам,— Васьö копыртчыштіс форточкалань да мыччис паспорт.— Миян зэв тöдчана шыöдчöм.

Дежурнöй нюмдіс, гижис-пасйис журналö зонкаяслысь ним-овсö да лэптис телефон трубка.

— Полковник ёрт,— шуис сійö трубкаас.— Тані кык том морт вöйысьöны тiян дорö. Мыйла? Шуöны, мый шыöдчöм пö эм. Зэв тöдчана. Бур.

Дежурнöй пуктіс телефон трубка, сетіс зонкаяслы паспорт-нысö.

— Сод кузя кайöй мöдöд судтаас. Жежöй веськыдыв, öдзö-сас гижöма «Приёмнöй».

Зонкаяс кайисны вылыс судтаö, тотшкöдчисны да пырисны. Приёмнöйын пукаліс томиник ныв, полицияса лейтенант. Сійö индіс начальниклөн öдзöс былö.

— Пырöй.

Полковник Яковлев пукаліс пызан сайын да сёрнитіс телефон пыр. Довкнитіс юрнас пырысьяслы: пуксьöй пö. Зонкаяс меститчисны кузь пызан сайö.

Полковник Яковлев помаліс сёрнисö да сюся видзöдліс во-ысьяс былö.

— Кутшöм нö мог суис?

— Миян шыöдчöм,— бара водзмöстчис Васьö.

— Вайöй.

— Миян сёрниа шыöдчöм.

— Кывза,— шуис полковник да видзöдліс нырувса каба-ла былö.— Марков Данила и Моторин Вася?

— Да, сідз.

— Тайö тi орчча районын кольöм гожöмö отсалінныд кутны банк грабитысьяссö? Отчётысь лыддьывлі.

— Да, тайö ми,— öтпырйö артмис зонкаяслөн.

* Пом. Заводитчöмыс тавоя 1 да 2 номеръясын.

— Та бõрын Васьõ и думыштис лоны полицейскойõн,— петис вомсыс Данилалõн.

— А тэ?

— Ме батьõ моз кõсья велõдчыны инженерõ.

— Бур, а кõни оланныд?

— Васьõ важинас, а ми õни олам танi, Карбердын,— водзõ висьтасис Данила.— А пырим ми тiян дорõ наркотикъяс кузя.

— Да?— чуймис полковник.— Нолтõ, висьталõй водзõ.

Данила падмылис, быттõ эз тõд, мыйсянь заводитны. Васьõ ышõдана довкнитис юрнас.

— Данила, висьтав ставсõ, эн пов.

Данила кызõктыштис да кутис сёрнитны. Нинõм эз дзеб. Весиг Таня Ивашкинакõд бõръя паныдасълõм йылысь висьталис. Эз вунõд казтыштны асланыс классысь Ваня Майскийõс, кодi регыд на петис больничаясь.

— Васьõ чуйдис тiян дорõ шыõдчыны,— помалис Данила.

— Бур, мый миян дорõ локтiнныд,— телефон трубка лэптiгмоз ошкыштис Яковлев да корис секретарсõ.

Жырйõ пырис томиник лейтенант.

— Кывза.

— Корõй Ивановõс.

Регыд мысти пырис майор Иванов. Здравыйтчис да чуймõмõн видзõдлис зонкаяс вылõ.

— Тайõ том мортъясыс миянлы бур отсасысьяс,— индис зонкаяс вылõ полковник.— Кольõм гожõмын отсалисны тшапнитны грабительясõс. А õни локтисны наркотик разõдысьяс кузя. Ми дыр нин вõтлысям Баро бõрся. Но некыдз ог вермõй прамõй-джыка топõдны.

Полковник Яковлев дженьыдика выль пõв висьталис, мый кывлис Даниласянь, да юалис:

— Пётр Васильевич, кутшõм тiян мõвпъяс эмõсь?

— Колõ видлыны Данила отсõгõн кыйны. Дерт, сõгласитчас кõ ачыс зонка. Дай мам-батьыс кõ паныд оз сувтны.

— Меным тайõ жõ мõвпыс юрõ воис,— полковник сувтис да некымынысь кытшовтис пызан гõгõр.— Кыдз, Данила, тэ абу паныд?

Данила видзõдлис Васьõ вылõ да чõв олис.

— Данила, кõсийсь. Ставыс лючки лоõ,— шыасис Васьõ.

— Тэныд лõсьыд тадзитõ сёрнитны. Мунан ас сиктõ да ылын лоан.

Жырйын пуксис чõв-лõнь. Быдõн мõвпалис ас кежас. Збыльысь, «ворсõмыс» абу челядълõн. Кõть кутшõм бур план он лõсьõд, верман и олõмнад пудъясьны. Нõшта зонкаыс тыр арлыдтõм. А Баро да сыõн босьтõм нывка быдтор вермасны вõчны...

— Да, танi ёртыд орччõн оз ло,— торкис чõвлунсõ полковник.— Ставыс ас кõсийõм серти. Дай бать-мамыд мый на шуасны.

Майор Иванов видзõдлис часi вылõ.

— Вай вõчам тадз. Квайт час рытын ме вола Данила дорõ гортас. Мам-батьыс локтасны удж вылысь, да õглаын варовытыштам.

— Бур,— полковник Яковлев мыйкõ пасйыштис аслас блокнотõ.— Данила, кõни олан?

— Чойвыв улича, витõд керка.

Яковлев сувтис да мыччис зонкаяслы кисö.

— Иван Васильевич рытнас пыралас,— кывкöрталіс полковник.

РОВА-ысь петöм бöрын зонкаяс восьлалісны чöла. Данила бара на итöкатіасис: колö-ö вöлі волены полицияс? Сійöс ньöти эз кыскы туясяна уджыс. Дай жаль Таня Ивашкинаыс. Эз эскыссы, мый нылыс ас вöляысь котыртö дурмöдчанторнас вузасьöмсö. Сылөн вежөрö йиджис мөвп, мый Таня веськаліс Баро кипод улö да оз лысьт висьтасьны. Ставсö ас вылас босьтö. Данила серти, сöмын Баро мыжа. Сійöс и колö пуксьöдны дзескыдінас. А Васьö, друг морт, Танясö мыждö: синтö пö восьт, нылыс дзик мöд. А та пöрйö Васьö абу прав.

— Абу прав!— ас тöдлытöг гора шусис Данилалөн.

— Коді абу прав?— Васьö бергöдчис ёртыслань.

— Тэ. Ме эска, мый Таняыс веськаліс Баро улö да мöдыс мырдөн тшöктö сьöд уджсö вöчны.

— Синтö вай восьт. Тэ он кöсйы нинöм аддзыны. Найö кыкнанныс мыжаöсь.

— Ог эскы. Кöсйыся кö майор Ивановлы, сöмын мед Баросö тшапнитны.

— Позьö и таdzi. Сöмын оз ков повны.

— Тэ бара ассьыд ныран. Оз ков пö повны... От тöд, тэ эськö мый вöчин?

— Ме эськö кöсйыси, отсалі наркобаронсö да сылы отсасысьяссö дзескыдінö йöртны.

— Ладнö, мый на мам-бать шуасны,— вензьöмсö орöдіс Данила.

Рытнас Пётр Васильевич Иванов индöм кадö воис на ордö. Здравойтчис, киасис Данилалөн батькöд, пöрччысис да дзор юрсисö шыльöдігмоз юалис:

— А көнöсь зонкаясыс?

— Мыйкö неладнö вöчисны али мый?— повзис Данилалөн мамыс.

— Эз, найö зэв бур зонкаяс. Но менам сёрни эм...

— Кывзам.

— Гортадöсь кö, чукöстлöй питö.

— Вылынöсь найö, час кора,— батьыс кайыштис содйöд да чукöстис.

— Данила, Васьö, волöй татчö!

Зонкаяс кусöдісны компьютер да лэччисны улі судтаас. Сувтисны, видзöдісны бать-мам вылö. Найö, дерт, тöдісны, мый могөн локтис майорыс. Но первойөн сёрни эз кутны панны.

Майор Иванов кызöктыштис. Сійö эз тöд, кыdzi паныдаласны сёрнисö зонкалөн бать-мамыс. Вежавидзысь мортөн вöлі да эз пыр крапкы-висьтав, заводитис ылысянь: гарыштис велöдчöм, спорт да прöст кад колялöм йылысь. Юасис, кыdzi Данила отсасьö гортын.

Мамыслөн, тыдалö, терпенньöыс быри. Кисö гöшкөвикö чышкигмоз бара юалис:

— Да шу нин вай, мый могөн воинныд?

— Сідзкö, кывзöй.

Майор висьталіс дурмöдчан зельö паськалöм йылысь. Карбердын тайö пакосьтыс ылькйöмөн разалö, помыс оз тыдав. Кымынысь нин босьтчылісны тшапнитны наркобаронöс, но быд пöрйö сійö уйкнитліс. А та дырйи пыр унджык том йöз усьöны-

веськалöны дурмöдчан гуö, кытысь унджыкыс петны оз нин вермыны.

— Со весиг тiян пилы Баролөн босьтöм нылыс вöзйöма ноксьыны дурмöдчанторнас,— помалiс майор Иванов.

Данилалөн мамыс чуймöмөн видзöдлiс локтысь вылö. Сэсся бергöдчис пиыслань.

— Тайö збыль?

— Да,— довкнитiс юрнас мöдыс.

— Мыйла либö Баросö онö пуксьöдöй?— мамыс стрöг чужöмөн юалiс майорлысь.

— Унаысь заводитлiм, но Баро век сяммылiс мынны.

— Сiдзкö, лёка уджаланныд!— крапкис мам.

— Корам тiянöс, медем Данила кöсйысис отсасьны Баро нывлы. Сэки ми кутам тöдны налысь быд воськов да быть нин тшапнитам. Öтчыдйөн бырöдам тайö лёкторсö,— эскöдiс майор.

Керкаын лои шы ни тöv.

Данилалөн батъыс видзöдлывлiс пи вылас, но чöv олiс. Тыдалö, тшöтш жö майшасис. Васьö та пöрйö шы эз лэдзлы. А мамыс бара стрöга чöвтлис синсö первой майор вылö, сэсся пи вылас.

— Некутшöм делö Барокöд оз ло. Кыдзкö-мыйкö асьныд уджалöй, а менсьым пиöс татчö эн гартöй-лякöсьтöй.

— Но, тi кö паныд...— майор чеччис улöс вылысь да лöсьöдчис петны.

Васьö видзöдлiс ёртыслы синмас. Быгтьö мыйкö кöсйис шуны, но кутчысис. Сöмын видзöдласыс сотыштiс: «Эк тэ, повзин. Нямöд вөлöмыд».

Майор Иванов эз на удит петны, виччысьтöг Данилалы звöнитiс Толя Карпов.

— Ваня Майский кулöма, передоз,— кылiс телефонын гөлöс.

Данила шöйöвошöмөн бергöдчис батъ-мамлань. Чöвтлис синсö майор вылö.

— Ваня Майский пö кулöма, наркотикысь,— сöмын и артмис зонкалөн.

Сэсся чужöмыс вежсис, лои зумыш.

— Ме сöглас. Сöмын велöдöй, мый колö вöчны,— чорыда шуис майорлы.

— Бур, аски асывсянь матыстчы РОВД-ö. Сэни и сёрнитам.

— Ме тшöтш,— вöзйысис Васьö.

— Да тэ мый? Кытчö юртö сиалан?— мамыс повзяна видзöдiс Данила вылö.

— Колö Баросö тшапнитны. Сiйөн и кöсйися.

— Кöсйисян? А тэ мый чöv олан?— вувзысис мамыс батъ вылö.— Пиыд вöсна оз öмöй вись сьölöмыд?

— Ог, ог лэдз!— водзö шуасис мамыс.

Медбöрын батъыс лэптiс юрсö. Веськыда видзöдлiс майорлы синмас да юалiс:

— Тi верманныд видзны менсьым пиöс быдсяма виччысьтöм-торйысь?

— Да. Ми сы бöрся кутам кыйöдны лун и вой.

— Сiдзкö, ме тшöтш сöглас.

— И ме сöглас,— эз вермы водзö кутчысьны Васьö.— Каникул помöдз Данилакöд öтлаын лоам. А тайö быдса нель лун. Гашкö, и сяммам тшапнитны Баросö.

— Бур, кутам зільны-уджавны, медым тайё каднас ставсё помавны,— майор кутчысис өдзёс вугйё.

Данилалён мамыс пыр на пыксис да броткис вомгорулас. Майорлы мышкас нин горөдіс:

— Сёмын мыйкё кө лоё Данилакөд, ті мөданныд кывкутны!

12

Тулысыс таво нюжаліс. То кынмалё, то зэрё. А сэсся войтөв-тас да весиг шляча петалё. И юыс воссис сёрөнджык.

Васьё регыд на лэччыліс Эжва дорё. Видзөдіс, кызди кылалісны посныдык йи пластыяс да тувсовъя лөптыс.

Регыд заводитчасны гожа каникуляс. Коли вежон котравны школаё. Васьолён өдва тырмё терпенньоыс: виччысьё гожа лунтяс. Позис кө эськё, талун жё кывтіс Нёбью кузя.

Мойму өткөн олысь Опонь пөль козыналіс Васьёлы ассьыс чөс туйсё да вөр керкасё. Угоддьоыс меститчөма Нёбью пөлөн верст вит ылнаын. Пөльыс пөрысь нин, эз кут вермыны вөрасьны, а ныв-пи, коды позис эськё сетны чөс туйсё, абу. Шуис козынавны суседыслы, Васьёлы: отсасьомсьыд пө. И збыльысь, зонка то пес поткөдлас, то вала котөртлас. Пывсян кө ломтасны, Опонь пөльөс быть чукөстлас.

Сэки, аръявылыс нин, найё пыжөн катлісны Нёбью кузя. Опонь пөльыс сьолөм вылас воис пыжё сувтөдөм төвдөраыс. Кор петісны ю шөрө да төвдөраыс зэвтчис, заводитіс шпорөдчыны, а пыжыс мөдіс шлывгыны-поткөдны юыслысь отсё, сэки Опонь пөль эз вермы кутчысьны ошкыштөмысь.

— Молодеч, мый тайөс вөчөмыд.

— Эг өтнам, Данилакөд,— вочавидзис Васьё.

Пыжас төвдөрасё ачыс, дерт, пысаліс. Аддзис интернетысь серпассё да сы серти вөчис. Данила тайё каднас Карбердын керка лэптіс.

Опонь пөль чөс туйсё бура петкөдліс. Висьталіс, көні да кызди сиасьліс. Велөдіс Васьёос. Быдса вежон олісны вөрас, кыйсисны.

Пөльлөн вөр керкаыс важмөма нин. Подулыс сісьмөма, а керкаыс ляпкалөма.

— Көсийи подуvsё выльмөдны, но вынөй эз тырмы. Сөмын керсё сямми лөсьөдны. Тэныд нин ковмас подуvsё вежны.

Опонь пөль индіс немын кырсьём кер вылө. Найё куйлісны керка бокын ут вылын, важиник толь улын.

— Вежам. Локтан гожомө Данилакөд вежам,— көсийсис зонка.

И со коли кузь төв, сэсся гөгөр ловзьөдысь тулыс, да пуксисны мича гожа лунтяс. Васьёлысь батьсё удж вывсянь гожомбыд кежлө мөдөдісны командировкаё.

— Öтнад вөрад эн кай. Виччысь Данилатө либө менө,— мунигас велөдіс батьыс.

— Тэ өд арнас нин воан. Сы дыра ог жө виччысь. Данилаөс нуөдла. Сыкөд вөр керкасё дзоньталам,— вочаасис мөдыс.

Васьё кольөдіс батьсё да пыр жө звөнитіс ёртыслы. Висьталіс вөр керка йылысь. Но Данила мыйкё ланьтіс, мөжгыны кутіс. Сэсся бура дыр чөв олөм бөрын пычиктіс:

— Васьё, ме локнытө ог вермы.

— Мыйла?

— Ме колонияö муна.

— Сы дорö?

— Да.

— Тэ йöймин али мый?

— Эг. Но меным быть колö ветлыны.

— Быть?— бара чуймöмön юалис Вася.— Артмö, мый сійö донаджык друг дорысь.

— Эн дöзмы. Коркö бöрынджык вола.

— Эк тэ, другтö юбка выlö вежин,— дивитана шуис Васьö да дöзмöмön помалис.— Ладнö, кызкö тэтöг нин. Сідзкö, төвнас, кор волі, тэ меным сідз-тадз сöрин, мый гожомнас Нёбью кузя выlöджык кайлам. Зарни куд корсыны. А со, вöлöм, кöні тэнад зарни кудыйд!

Васьö збыльысь дöзмис Данила выlö. Сылөн чайтöм серти, позьö öмöй ёрттö öткодявны либö пуктыны кутшöмкö нывкаысь улöджык? Оз, дерт, позь! Ни öти нывка свет вылас оз сулав друг доныд. И нöшта, вöлі кö код бöрся котравны.>Addзöма, коркöя наркобаронесса! Дöзмис, ок ёна дöзмис Васьö! Ас кежсьыс ёртсö весиг предательöн нимтіс.

Водз асывсянь дöзмöмön и лöсьöдчис катны Нёбью кузя. Чукöртіс сёян-юан, вöчасян кöлуй. Гаражысь перйис домкрат, мед лэптыны вөр керка пельöссö. Лэдзліс ю выlö ассьыс пыжсö, сюся видзöдаліс гөгөр, оз-ö кыткö ваыс пыр.

— Гашкö, он мун, виччысьлан Данилатö?— заводитліс öлöдны сійös мамыс.— Дерт, тэ абу нин ичöt. Дай ветлін сэтчö, но мыйкö менам сьöлөмöй абу местаын.

— Эн шогсы, мам. Ставыс лючки-бур лоö. А менö вузалысь-тö ог кут виччысьны.

Васьö кутыштліс мамсö пельпомöдыс да чукöстіс понсö. Мамыс саявтöдзыс кольбöдіс пыжаös синнас, чөвтис пернапас. «Верст-яммис менам пийö,— думыштіс ас кежсьыс.— Мед сöмын сылөн ставыс удайтчас да Ен сійös видзас».

Пыжыс кокниа поткöдіс юыслысь отсö. Тöлыс зэвтöма төвдö-расö да öдйö катöдö-йөткö визулыслы паныд. Пыжлөн öтар-мöдар бокъясö шлачкöдчöны посныдык гыяс. Найö уна рöмön ворсöдчöны гожся шондi улын.

Васьö пукалö пыж бöжын да веськöдлö пелысөн. Бим сюся видзöдывывлö кöзяин выlö. Радпырысь никöстлö, кор берег-дорса бадь пытшкысь лэбзяс утка чукөр.

Вөр керка меститчöма дзик ю дорас. Орччөн, неыджыд кушины, сулаліс пашкыр пожöм. Быдмöма сы выйöдз, мый лыс лапъясыс вевтöмаöсь керка джынсö. Ичötик öшинь водзын Опонь пöль пöвйысь тувйышtlöма пызан. А бокас, пуклös пыди, кык чурка йитöма пöв помön. Дерт, пуксьытöдзыс колö видлыны крепыдлунсö. Ёна нин важмöма пöвйыс да, сэсся и чуркаясыс сісьмöмаöсь...

Кодыр пыж ныр сатшис алькöсіник берегö, Бим пырысь-пыр чеччыштіс косінö. Увтыштіс да котöртіс вөр керкалань. А Васьö домыштіс пыжсö да босыгчис ректысьны. Петкöдіс зыр, чер, пила, домкрат. Ящикысь перйис сёян тыра нопсö. Ставсö катöдіс вөр керкаö. Сэсся öзтіс бипур да öшöдіс сы весьтö ва тыра пöрт. Кузь туй бöрад окота лои тшай пузьöдны.

Видліс пызанлысь да пуклӧслысь крепыдлунсӧ. Весиг дзирня-сьыштӧс пуклӧс вылас. «Ӧти вотӧ олас на»,— думыштӧс ас кежысь.

Чай юигмоз, кружкасӧ киас кутӧмӧн кытшовтӧс, видзӧдалӧс керка гӧгӧр. Мӧвпалӧс, кыдзи бурджыка подуvsӧ вежны. Кытӧ зырийӧн кодйыны, а кытӧ домкратӧн лӧптыштны. Сэсся пуксис пызан сайӧ. «Вӧлі кӧ Данила, эськӧ ӧдйӧ позис дзоньтасыны. «Предатель,— бара скӧр думъяс воисны юрас.— Ме быд пӧрийӧ сы дорӧ котӧрта, а Данила? Оз эшты, колонияӧ мунӧ! Предатель!»

— Сӧмын тэ менам медбур ёрт,— небыдика шуис Васьӧ да малыштӧс Бимӧс, кодӧ сулалӧс пызан дорын да никӧстлывлӧс. Тыдалӧ, ас ногыс атгӧбалӧс Васьӧӧс, кӧсйысис нэм чӧж лоны бур ёртӧн.

Васьӧ босьтӧс суйӧрсайса пила да вундӧс нель чурка. Сэсся зырийӧн кодйыштӧс керка пельӧс увсӧ. Кодйӧминас сюйис домкрат да лӧптӧс пельӧссӧ весът мында кымын. Лӧптӧминӧ пуктӧс муртса на пилитӧм чурка да вӧляысь лӧдзис керка пельӧссӧ сы вылӧ. Тадзи жӧ вӧчис и мӧд керка пельӧскӧд. Ӧнӧ вӧр керка катовтчис боквыв. Сісьмӧм подуvsа керйыс бурсыс торъяліс. Васьӧ кер кузяла подуvsӧ кодйышталіс, мездӧс топалӧм эжмӧм муысь, медым кокныдджык лои перйыны сісьмӧм керсӧ. Та бӧрын зорйӧн лӧптыштӧс керсӧ ӧтар-мӧдар помӧдыс. Сэсся босьтӧс чер да мый вынсьыс сатшкис керъяс. Черыс варс пырис голяӧдзыс дзик. Сы выйӧдз сісьмӧма пуыс. Ковмис крукыштны пыдӧсаныыс да сідз кыскыны кер помсӧ. И мӧдар помнас тадзи жӧ вӧчис. Перйӧм керсӧ кыскис бокӧ. Та бӧрын матыстӧс-кыскис бунтысь выль кер, кодӧс лӧсьӧдлӧма Опонь пӧль. Ӧтар-мӧдарсӧ зіль мортыд тшуплӧма. Ӧнӧ коли сӧмын пуктыны выль керсӧ перйӧм местаӧ, нитшкавны да домкрат отсӧгӧн бӧр лӧдзны керкасӧ, пуксьӧдны оланінсӧ суйӧм кер вылӧ. А медым керкаыс кыптыштӧс, куимлаӧ сюйис чуркаысь шӧри поткӧдӧм плака.

Тадзи колӧс вӧчны нельнан стен подулӧн. Но талун Васьӧ сяммис вежны сӧмын кык воча стенлысь подуvsӧ.

Шондӧыс заводитӧс саявны пожӧм да козьяс сайӧ. Васьӧ перйис пыжысь вугыр шатин. Самалӧс да чӧвтӧс вугырсӧ юӧ. Ачыс мӧдӧс лӧсьӧдны бипур. Ӧшӧдӧс ва тыра пӧрт. Кор пузис чай, пӧртийын шонтӧс мамысӧн пуӧм шыд. Мыйтакӧ кысьтыштӧс Бимлы да ачыс пуксис нуръясьны.

Пӧт кынӧмӧн нин матыстчис вугыр шатин дорӧ. Ковмис виччысьыштны, чериыс эз на сӧй да. Но регыд мысти серпасыс вежсис. Ӧти бӧрся мӧдӧс зонка заводитӧс лӧптавны кельчи да мык. Весиг ӧти ком пысасис. Но сэсся другӧн чери дугдӧс сӧйны.

«Юква пумӧн лоӧ»,— кыйдӧссӧ керигӧн мӧвпыштӧс Васьӧ.

Войсӧ узьмӧдчис вӧр керкаын. Первой тшынӧдӧс, медым вӧтлыны номъясӧс. Керка подуvsӧ тупкаліс. Вольсалӧс нар вылӧ Опонь пӧльлысь вольпась.

Бим водӧс ӧдзӧс дорӧ. Пуктӧс нырсӧ лапа вылас да мӧдӧс вугравны. Но пельясыс вӧрисны ӧтарӧ-мӧдарӧ. Сійӧ и шойччигас видзис ассыйс кӧзяинсӧ кортӧм гӧсьтъясысь.

А Васьӧ куйліс вӧр керкаса нар вылын да думайтӧс. Унмыс ньӧти эз лок. Тӧд вылӧ уси тувсовъя каникул дырйи Карбердӧ лӧччылӧм.

Сэки Данила звöнитлöм бöрын Васё кыв шутöг воис ёрт дорас. И, сылөн чaitöм серти, эз весьшөрö. Сийö бура помнитö налысь РОВД-ö волöмсö да майор Ивановлысь Данилалөн мам-батькöд сёрни. Ок сёкыда мамыс муніс налы воча. Дай Данила, тöдöмысь, катласис. Но гөрöдсö разис Толя Карповлөн Ваня Майский кулöм йылысь юöрыс...

...Сэки, мöд лун асыводзö, зонкаяс пукалісны майор Иванов-лөн уджалан жырйын. Найö сюся кывзисны сылысь велöдöмсö.

— Со татшöм лыдпасъяс серти кутам йитчывны телепон пыр,— майор мыйкö гижыштис кабала выlö да мыччис Данилалы.

РОВД-ысь петігөн на Данила звöнитис Таня Ивашкиналы. Висьталіс, мый сийö сöглас, мöдас отсасыны нывлы.

— Сöмын видла. Оз кö артмы — торйöдчам.

— Хм,— кыліс телефон трубкаын.— Там видно будет.

...Ваня Майскийöс дзебны локтісны унаён, а налөн классыс пöшти дзоньнас. Данила нуöдіс Васёöс: вай пö тшöтш ветлам. Найö матыстчисны керка дорас, кор гортсö вöлі петкөдöмаöсь нин öшинь улö. Öні Ваня куйліс дзоридзьяс пиын. Копыртчöмөн бөрдісны мам-батьыс. Нывкаяс да зонкаяс горт гөгöрыс сулалісны кытшолөн. Кодсюрö чышкаліс синсö. Тані жö вöліны школаса велöдысьяс. Найö öти бөрся мöд мыйкö шуышталісны, мыжалісны дурмөдчанторйөн вузасысьясöс. А сэсся кыв босьтіс Таня Ивашкина.

— Ми ставным мыжаöсь, мый эг вермöй Ваняös кутны неминучаысь. Ме, кыз старöста, сета кыв, мый асьным кутам туясьны да кыскам кывкутöмö наркотик разöдысьясöс.

— О, бляха, кыз сөрö,— Данила кыліс пель дорсьяс Толя Карповлысь гөлөссö.— Яндысьтöм наркобаронесса!

Таня Ивашкиналөн сёрни бöрын ставныс шызисны. Кутісны öта-мөдкөд вензыны. А сэсся керка йөрö кежисны катафалк да школьной автобус. Йöз мөдөдчисны шойна выlö.

Данила да Васё көсийсны жö пырны автобусö. Но на дінö тэрыба матыстчис Таня Ивашкина.

— Эм сёрни, талун нель часын лок кинотеатр дөрö.

Ныв сюся видзöдліс Васё выlö да содтіс:

— Öтнад лок.

Данила видзöдліс часі выlö. Вöлі первой час лун. Сідзкö, адзысьлытөдз коли куим час. Мый вöчны, мунны йöзыскöд шойна выlö либö кольччыны?

— Колö йитчыны майоркөд,— небыдика вöзйис Васё.— Вай вешъям татысь. Тэ кулöмаыскöд прöщайтчин нин.

— Збыль, ме думысь, колö звöнитны,— öткывъясис Данила.

Зонкаяс кежисны бокö да петісны керка йöрысь. Данила перйис телефон.

— Пётр Васильевич, Таня Ивашкина корис нель часын кинотеатр дөрö.

— Бур,— кыліс майор Ивановлөн гөлөс.— Ми орччөн лоам. Эн вунöд — тэнад дөрöм киззын микрофон да камера. Найös нинöмөн эн сайöд.

— А-а.

— Данила,— шыасис Васё.— Ми öні быттö кино вылынöсь, сыщикъясöс ворсам. Шерлок Холмслы татшöмторйыд весиг вöтөн эз усьлы.

— Эз, дерт. Сэки, тӧдӧмысь, татшӧмторйыд эз вӧв.

— Да?

— Вунӧдін, кор Шерлок Холмсыс оліс?

— Да, тэ прав. Сійӧ кадӧ, збыльысь, наркотикнад тадзитӧ эз дурны.

Нель часӧ воигӧн Данила сулаліс кинотеатр дорын. Кыдзи и водзынсӧ, Таня Ивашкина матыстчис зонка дорӧ гусьӧн, тӧдлытӧг.

— Привет,— небыдика шуыштис сійӧ.

— Привет,— вочаасис Данила да паськыда вашмуні.

Нывка дорын Данила бара на шӧйӧвошлі. Тыдалӧ, сы понда, мый ӧна воӧ сӧлӧм вылас. Гашкӧ, та вӧсна эз и казьявы, кор Танялӧн синмыс югнитлывліс ӧся да кӧдзыда.

Со и ӧні, кор Данила юаліс, кысь Ваня Майский босьтис дурмӧдчанторсӧ, кыліс чорыд вочакыв.

— Эн юртӧ гудрав. Этшаджык тӧдан — дырджык олан.

Сэсся гӧгӧрбок кыйкнитліс-видзӧдліс. Тыдалӧ, нинӧм повзбӧ-данасӧ эз аддзы да мыччис гартыштӧм каба́ла.

— Тані тэныд сьӧм. Ӗнісянь тэ ме вылӧ уджалысь.

— Абу ӧмӧй Баро вылӧ?

— Мӧдысь шуа: тэ уджалан ме вылӧ. А со тані гижалӧма, кодъяслы кутан сетны наркотиксӧ да босьтны налысь сьӧм. А тайӧ дозаяс, суй зептад.

Таня Ивашкина бара гӧгӧр кытшовтіс синнас да кутчысис Данилалы сойбордас.

— Вешъям бокӧджык,— нуӧдіс кильчӧ сайӧ.— Выхь пӧв лыдды гижӧмасӧ да бӧр вай меным. Тайӧ йӧзсӧ колӧ кутны вежӧрад. Миян уджын кымын этшаджык гижӧд, сымын бур. Гӧгӧрвоин?

— Гӧгӧрвои.

Данила тшӧтш бергӧдчыліс. Кӧсйис тӧдмавны, кодкӧ на бӧрся кыйӧдчӧ оз. Кӧні нӧ Васьӧ? Но матігӧгӧрын некод эз тыдав. Весиг другыс кытчӧкӧ саймовтчӧма.

Данилалы тӧд вылӧ усьны майор Ивановлӧн кывъясыс: «Колӧ тӧдмавны, коді налы юӧрталӧ облаваяс йылысь».

— Таня, а лоӧ кӧ облава?

— Лоӧ кӧ, ми водзвыв кутам тӧдны. РОВД-ын эм миян ӧти капитан.

— Коді?

— Тэныд сійӧс нинӧмла тӧдны,— Ивашкиналӧн гӧлӧсыс бара чорзис.— Но ставыс. Кор мӧдысь аддзысям, звӧнитла. Со тэныд выль телепон. Та кузя кутан мекӧд йитчывны. Сэні ӧти номер и эм, менам.

Таня суйыштис зонкалы зептас выль телефон. Сэсся кыв шутӧг бергӧдчис да збо́я тотшиктис-вуджис туй мӧдар бокӧ.

Данила дыр колльӧдіс нывкаӧс синнас. «Кытчӧ ме суйси?— ас кежсьыс думыштис зонка.— Оз, татшӧм ворсӧмыд сылы оз кажитчы. Данилаысь ни Шерлок Холмс, ни Анискин оз артмы». Эз казьяв, кыдзи бӧрсяныыс матыстчис Васьӧ да тапнитис пельпомас.

— Но мый, ЦРУ-са агент?

— Кытчӧ дзебсьылін?

— Эстӧн, кыдзьяс сайын вӧлі. Сэсянь зэв бура тыдалӧ. Сӧмын оз кыв, мый сёрнитінныд.

— Мунам.

Зонкаяс, кыдзи сёрнитчылісны майор Ивановкөд, надзöникөн кежисны школалань, сійö сулаліс шор саяс. Шорсö вуджигөн триньöбтіс телефон. Шыасис майор Иванов.

— Ме виччыся школа дорас,— кыліс трубкаын.

И збыльысь, школалөн öдзöс дорын сулаліс важиник паськö-ма мужичöй. Тайö вöлі майор Пётр Васильевич Иванов.

— Пырöй,— восьтіс сійö школа öдзöс.

Иванов зонкаяс водзвылын шавксöдіс школа калидорöд да пырис директор жырьö. Директор Иван Иванович пыр жö чеч-чис пызан сайысь.

— Час, завучöс кора,— петігмозыс чöвтіс сійö.

Та серти позис гөгөрвоны, мый директор да майор костын кутшöмкö сёрни вöлöма нин. Пётр Васильевич пуксис да индіс зонкаяслы пызан дорын сулалысь улöсьяс выlö.

— Пуксьöй. Öні локтасны прокуратураысь тшöтш понятöйяс да оператор.

Збыльысь, минут-мöд и коли. Воссис öдзöс да пырисны директор завучкöд, прокурорöс вежысь и оператор, коді киас кутіс снимайтчан камера.

Майор Иванов сувтіс.

— Кора операторöс ставсö снимайтны. Татчö корим понятöйясöс да прокурорöс вежысьöс. Медым миян уджным лöсяліс странаеса оланпаслы. Тайö зонкаясыс лöоны отсасысьясөн. Прокурор тöдö,— майор видзöдіс прокурорöс вежысь выlö.— Данила, ме кора перйыны зепсьыд ставсö, мый сетіс тэныд Таня Ивашкина.

— Со тайö,— Данила пуктіс пызан выlö кабалаö гаровтöм сьöм, неыджыд тубрас да телефон.

Майор Иванов разис кабаласö да перйис сэтысь сюрс паса сьöм чукөр. Лыддис, ставыс лои дас сюрс шайт. Иванов пыр жö пасйис протоколö. Сэсся восьтіс тубрассö. Сэні вöлі бура уна ичöтик пакет. Пуртөн писькöдіс öтиöс да босьтіс пурт помö рудовъеджыд порошок, видліс кыв йывнас.

— Героин,— эскöдана шуис Иванов да перйис портпельсьыс ичöтик вески.— Вит грамм. Кыскö ыджыд партия выlö.

Иванов ставсö пасъяліс протоколö да корис понятöйясöс кырмавны.

— Ми нуöдім оперативнöй удж. Гижöдсö кутам видлавны РОВД-ын. Прокурорлы, чайта, юöртасны. Да,— Иванов нимвичнас шыасис завуч да директор дорö.— Ме нöшта öтчыд казгышта: мый татысь аддзылінныд да кывлінныд, некодлы оз позь висьтавны.

Мöд луннас полковник Яковлев да районас прокурор видзöдісны майор Ивановөн вайöм флэшка вылысь Данила да Таня Ивашкиналысь аддзысьлöмсö. Полковник мыйкöдыра пукаліс зумыша.

— Коді капитан погона крысаыс?— торкис сійö чöвлунсö.— Пётр Васильевич, колö тöдмавны.

— Тöдмалам. Уджыс мунö нин. Коли видзöддыны кык мортöс, кодъяс унатор тöдöны наркотикъяс кузя.

— Та могысь мый вöчанныд?

— Кыкнан капитаныслысь кывзам быд телепон сёрни. Быть сетам ылöдлана юөр. Думаyta да, кодi уджалö Баро ыылö, асьсö öдйö эрдöдас. А бöрынджык и Бароос кутам.

— Бур, сöмын оз ков нюжмасьны. Данила Марковлөн заводитчас ыль четверть. Колö, мед ми эг торкöй сылысь велöдчöмсö.

— Ме чайта, матысса лунъясö пуктам пом,— майор Иванов чукöртis кабалаяс да чеччис.

— Верма мунны?

— Мун,— докнитis юрнас Яковлев да бергöдчис прокурор-лань.— Со тайö наркодилеръясыслы Таня Ивашкина тшöктis вузавны дурмöдчанторсö. Данила лыддьöма сылысь гижöдсö да кутöма вежöрас.

— Тайö пежсö быть колö бырöдны,— прокурор видзöдліс гижöдсö да аслас папкаысь перйис кабала.— Со тані колана пасйöдъяс, прöверкаыс абу на помасьöма. Тöрыт дас час рытын кувсис Витя Некрасов, кодi кутis топыд йитöд Барокöд. Сьöлö-мыс сувтöма. Оз эскыссы, мый ачыс кувсис. Тыдалö, сылы отсалісны мунны мöдаръяугыдас. А тані Толя Карпов батълөн шыöдчöм. Тöрыт жö, гортас локтiгөн, писö чорыда нöйтöмаöсь тöдтöм йöз. Öнi зонмыс больничаны куйлö.

— Ме тöда та йылысь,— шыасис полковник.— Миян оперативникъяс корсысьöны. Менам чайтöм серти, тайö кыкнан лöмторйыс топыда йитчöма наркобаронкöд.

— Вот-вот. Сійөн и колö öдйöджык пуксьöдны, медым пуктыны неминучаяслы пом.

...Майор Иванов воис полиция отделö да корис ас дорас оперативникъясöс, кодъяс корсисны дурмöдчантор разöдысьясöс. На лыдын вöліны капитан Старцев да капитан Новиков.

— Ёртъяс,— шыасис Иванов.— Талун квайт час рытын лö облава. Кöсьям кутны Бароос. ОМОН-лы юөртöма, найö дасьöсь. И тiянлы тайö делöас тшöтш ковмас отсасьны. Инструктажсö нуöдам сёрöнджык.

Майор дорысь петöм бöрын öти капитаныс пыр жö перйис асьыс мобилниксö. Но сэсся бөр суйис зептас. «Мыйкö тані абу сідз,— думыштis ас кежысь.— Облава кö, мыйла нö инструктажсö эз öнi нуöд. Татшöмыс некор на эз вöвлы. Гашкö, подстава — конйыштöм? Ог, ог звöнит».

Майор Иванов виччысис, кодi капитанъяс пиысь йитчас Барокöд. Но вöлі чöv-лөнъ. Телефон пыр капитанъяс сёрнитisны дзик мöдтор йылысь. «Гашкö, Таня Ивашкина ылöдліс Даниласö?— кутis майшасьны Иванов.— А эз кö да капитаныс мыйкö гөгөр-воис да сійөн чöv олö?..»

Майор Ивановлы юрас воис нöшта мöвп. Кор часі петкöдліс вит час да нелямын вит минут, сійö тшöктis оперативникъяслы пыр жö чукöртчыны сы дорö.

Погонаяс кык минут мысти нин вöліны майор жырыын. Сöмын капитан Старцев сёрмöдчис. Но и сійö здук мысти воис. А бöрсяныыс пырисны ОМОН-ысь куимөн да УСБ-ысь майор Маркин. Сійö докнитis юрнас Ивановлы да матыстчис капитан Старцев дорö.

— Капитан Старцев, вы арестованы, сдать табельное оружие,— рочөн шыасис Маркин.

Капитан Старцевлөн чужöмыс лои кабала кодъ еджыд. Сувтис да мыччис ассыс лыянсö майор Маркинлы. Мортыд гөгөрвоис, мый ворссис...

Майор Маркин ачыс пысалис Старцевлы наручник да тшöктис нуöдны камераö. Сэсся матыстчис майор Ивановлөн пызан дорö да гораа висьталис:

— Капитан Старцев сöмын на юöртис телепон пыр Баролы, мый квайт часын локтас полиция. Мед пö дась вöлн.

— Аттьö,— Иванов топöдлс кисö Маркинлысь да шыасис чукöртчöмаяс дорö.— Да, Старцев вузалис мянöс. Сийö торкалс мянлысь удж. Талун кежлö ставыс. Операция оз ло. И кутöй тöд выланыд: ассыд нимтö да сöвестьтö лякöсьтны кокни. Сьöкыд бур нимтö бөр бергöдны.

Мöд асылö майор Иванов пырис полковник Яковлев дорö да пунктис пызан вылö некымын кабала.

— Со капитан Старцевлөн висьтасьöмыс,— шуис сийö.

15

«Капитан Старцевлөн сьöлөмсянь каитчöм»,— лыддис полковник Яковлев.

I

«Öтчыд, ме, капитан Старцев Николай, пукалi райотделса жырйын да думайтi. Мөвпалi сы йылысь, кыдзи асавны тырмымөн сьом, медым, кор эновта ментовскöй уджсö, эз ковмы вишкыны. Капитанöдз воöдчи, а сiдз эг и вермы чукöртны озырлун. Тайö менсьым сьöлөмöс ёна дойдалис. Медсясö сэк, кор паныдасьлисны улич вывтi журъялысь суйöрсайса дона машинаяс. А ме öнöдз на пукала важиник «жигулиын»...

Тайö да ичöt нажötка менö йötкыштис торкны закон. Но ме гөгөрвои, мый мыжа да каитча. Кора правосудиеöс мекöд öтвылысь уджавны. Та вöсна висьтала ставсö, кыдзи веськалi лёк туй вылö, да кора кокньöдны менсьым мыжöс...

II

...Николай Старцев велöдчис дасöд классын, кор киссис Сöветскöй Союз, а власть бердö воисны йöз, кодъяслы медтöдчананас лои мортлөн озырлун. Кымын унджык сьом, сымын ыджыд-джык позянлун мортыслөн,— татшöм кывкöртöд чужлис Николай вежöрын телевизор видзöдöм бöрын.

Лавкаса джаджъяс тырисны быдсяма «видикъясөн». На пöвс-тын вöлины и полицейскöйяс йылысь кинояс... Кор вуджис дас öтиöд классö, сийö тöдiс нин — велöдчас оперö, мöдас шышгясöс кутавны.

Буретш школа помалiгас осьтiсны Сыктывкар бердса Эжва-ын училище. Сэтчö и сюйыштис Николайöс батыс, аслас тöдсаяс пыр. А куим во мысти том зон пысалис пельпом вылас лейтенант-лысь погонъяс да заводитис уджавны Карбердса РОВД-ын.

Сэки нин йöзыс бугжыла видзöдiсны погонаяс вылö. Абу дивö, горш да шыш кодъ «ментъяс» йылысь передачаяс кадысь

кадö мунісны телевизор пыр. Гашкö, мыйкö и содталісны, но унджыкыс вöлі збыль. Весиг ас гөгöрын служитысьяс пытшкын кыптывліс сёрни: эсіё пö калым босьтöма, мöд мыж вöчысьсянь «мавтас» виччысьö.

Веськыда кö шуны, бөръя кадö ментъясöс быдласянь чужъялісны. Йöзсянь, медсясö том войтырсянь, кылан лёк кывъяс: «СУКА», «МЕНТ», «ПИДР». Пырав интернетö, мыйсö сэтысь сöмын он аддзы. Кымын видео петö, кодöс телефонö снимайтöны и пыр жö пуктöны интернетö: видзöдöй пö, мый погона пез ловъяс вöчöны.

Ставсö тайöс аддзöны медвойдөр том йöз, челядь. Сюркнялöны пель саяс, а сэсся на моз жö зільöны овны.

Служивöйяс, кодъяс чужлісны Сöветскöй Союзын, быдмылісны чужан му радейтан пас улын, кодъяс кутшöмакö кутісны на лёксыйс öнйя том милиционеръясöс, регыд ставныс муналасны пенсия вылö. А коді кольö да локтö на пыдди?

На пыдди локтасны том зонъяс, кодъяслөн вежөрö суйöма телевизор пыр петкöдлана фильмъяс, кöні висьтавсьö сы йылысь, кызди жульничайтöны погона войтыр. Вöчöны сьом кызд вермöны, нинöмысь вежавидзтöг.

«Сідзкö, мыйла и вежавидзтыны?— ас кежсьыс мөвпаліс Старцев.— Ставныслы бурөн он ло. Кодкö да кодкö век шуас: со пö муно «жулик-мент».

Сылы, Старцевлы, öтчыд-мöдысь мыччывлісны жö сьöма конвертсö. Но Николайлөн этшаник шайтъяснад сьölöмыс эз бурмыв. Сійö көсийс босьтны уна и кызд позьö öдйöджык.

Öтчыд чеччис пызан сайысь, игналіс сейфсö да петіс РОВД-ысь. Сулыштіс здук-мöд, сэсся тэрыба вуджис туй мöдарас. Сійö веськöдчис сикт помлань, кöні вочасөн кыптісны выль стрöйбаяс, унджыкыс брусыйс.

Старцев матыстчис чиганлөн кык судтаа керка дорö. Места вылö воигас сьölöмыс заводитліс чеччыны. Но регыдөн лönис. «Мый лоас, ло»,— гусьөн мөвпыштіс Николай да повтöг личкыштіс заборö öшöдöм звöнок кнопкасö.

Баро паныдаліс сійöс кильчö дорын. Тыдалö, кодкö семьясьыс водзвыв казялöма локтысьсö да висьталöма көзяиныслы.

— Чолöм, Николай Давыдович.

— Чолöм, мог суис,— капитан дзебис синъяссö.

— Кутшöм?

Старцев здук чöv олыштіс. Сэсся дженыдика висьталіс, мыйла воис чиган дорö.

Баро аслыснога нюмдіс.

— Көсьян меным отсасьны?

— Ог. Көсья öта-мöдлы коланаөн лоны. Дерт, мынтысьмөн.

Баро ланьтліс. Тыдалö, вежöрас арталіс-мурталіс, мый сетас сылы капитанкöд ладмöдчöмыс да дона-ö тайö сувтас. Медбöрын шуис:

— Гөгөрвои, виччысьлы.

Баро пырис гортас, сэсся регыд мысти петіс. Киас кутіс конверт.

— Тайö аванс.

— А-а,— Николай видзöдліс конверт пытшкас да нюмдіс.— Бур, ладмöдчим.

— Кутан меным водзвыв юöртны ментъяслөн плантъяс йылысь, кодъяс меным инмöны. Со татшöм телефон кузя,— Баро чöвтліс синсö Старцев вылö, мыччис кабалатор да лöсьöдчис пырны.

Сувтыштліс кильчö вылас, бергöдчöмөн кольöдіс синнас капитанöс. Зывöка вашмуні да восьтіс керка öдзöссö.

А Николай Старцев тэрыба мöдöдчис сикт шöрлань. Питшöгас суйöм конвертыс морöссö шонтіс. Первой воськовсö лои вöчöма. «Важөн нин коліс кежавны. А то öтияс жыруйтöны, а мöдъяс вишкöны. Öтчыд олам, колö юксыны öта-мöдкöд»,— тадзи мөвпаліс Старцев удж вылас восьлалігөн.

Полиция жырыйн некод эз вöв. Ёртъясыс разöдчöмаöсь коді кытчö. Старцев пуксис пызан сайö. Перйис конвертсö да горша лыддис шарöдчысь долларъяссö. «Тадз кө нöшта, он и тöдды, позяс и аслым суйöрсайса машина ньöбны»,— нимкодя вашмуні капитан.

Та бöрын наркобарон да Старцев костын збылысь заводитчис öта-мöдды колана да сьöма ёртасьöм. Капитан кутіс быд пöрйö явитны, рочөн кө, «стучитны» Баролы.

А талун, кор майор Иванов юöртіс, мый квайт часын лоö облава Баро вылö, первойысь сы пытшкын мыйкö вöрзис. Кутшöм помка вöсна Иванов инструктажсö эз нуöд сэки, чукöртчылігас? Öд пыр водзвыв юöртліс, коді мый кутас вöчны. А öні шуис: дзик операция водзвылын пö. Тані мыйкö неладнö. Гашкö, тайö пöръясьöм? Ог, ог звönит.

Но кор воис урчитöм кадыс да майор Иванов вылысь чукöртіс оперативникъясöс, капитан Старцев эз нин вермы чöв овны. Сійö кольччыштіс мукöдысь, перйис телефон да звönитіс Баролы.

16

Васьö садьмис пон увтöм шыö. Зіля чеччис да петіс вөр керкаысь.

Бим аддзöма орччөн быдмысь пожöм йылысь урöс да лёкысь увтчö. Урыс сöмын кыйкнитывліс пон вылö, эз пышйы. Но кор пон дорö матыстчис Васьö, урыс звирк чеччыштіс ылынкодь сулалысь пу вылö.

— Но и но,— ас тöддытöг петіс Васьöлөн.— Сы ылна чеччыштіс.

Сійö кытшовтіс керка дорын быдмысь пусö. «Вывті матын сулалö, да нöшта нёрöма,— думыштіс зонка.— Кутас мешайтчыны керкаыслысь подув керсö вежигөн. Быть ковмас пилитны. Век нин пес лоö».

Васьö öзтіс бипур да öшöдіс сы весьтö ва тыра пöрт. Кор ваыс пузис, пукталіс пöртийö рытъя кыйöм чери. Регыдөн и юк-ва лои дась. Вердіс понсö да сэсся ачыс пуксис нуръясьны. Пукаліс ывла пызан сайын. Чатöртчывліс вывлань. Енэж пасьтала кывтісны рудов нисьö еджыд кымöртoryяс. Муртса кежлö сайöдлісны шондісö да бара шлывгисны водзö.

«Гажа луныс лоö»,— Васьö койыштіс кружка пыдöсысь сук тшайсö. Босьтіс тасьті-пань да ю дорын мыськаліс. Недыр мысти петкöдіс керкаысь «Штиль» пила да заведитіс. Матыстчис керка дорын быдмысь пожöм дорö.

Сійö коркö батыскöд пöрöдчыліс. Заптисны тöv кежлö пес.

Кужо вөдитчыны пилаон. Но өткөн пөрөдчыны эз на удайтчыв. Та вөсна польштискодъ, он өд төд, кодарө пуыс пөрас.

Бергөдіс пиласө, копытчыштис да заводитис пилитны. Выльон төчитом чептыс кокниа йирис пусө. Со нин джынсө пилитис. Нөшта пырыштис чептыс. «Кыз на»,— Васьө видзөдліс пу вылө да ёнджыка личкыштис пиласө. Но тайө здукө дзик виччысьтөг пуыс пилитөминөдыд ратшмуні-чеги. Пожөм помыс йөткыштчис бөрвыв да зургис зонкалы веськыд кокас, коклутшсяныыс неуна вылөджык. Зургөминас мыйкө трачмуні, а сэсся сэтшөма доймис, мый зонкалөн синсьыс быттө би петалис. Ставыс лои сэтшөм өдйө, мый Васьө эз слөймы чепөсйыны бокө.

— Ой!— горөдсис сөмын зонкалөн.

Көсйис воськовтны, но эз вермы. Уси муас. «Лыыс чегөма»,— югнитис вежөрас. Ньюжөдчыліс лёка эргысь пилалань да кусөдіс сйөс.

Кор Васьө заведитис «Штильсө», Бим вешйыліс бокө. Сйө оз терпит ломтас-мавтаслысь лёк дуксө да пилалысь гора эргөмсө. Но пила шы ланьтөм бөрын пыр жө матыстчис көзяин дорас.

Васьө куйліс мыш вылас. Видліс вөрзёдны веськыд коксө, но эз вермы. Кокыс сэтшөма доймис, мый весиг синваыс петис. Ки вылас мыджсьөмөн кыпөдчыштис. Син улас уси доймөминыс. Гач кок пөлыс коссиясьөма, яйыс тыдыштис. Зургөминсьыс кучикыс кульыштчөма, а кокыс лөзөдөма да заводитөма пыктыны. Быд вешйыштөмысь дойыс юковтліс став тушасө. «Ог, ог вермы немтор вөчны,— югнитис вежөрас.— Весиг пыж дорөдз кыссьыны ог сяммы. Колө отсөг».

— Бим, гортө!— тшөктіс сйө.

Васьө чайтис, мый сйө горөдіс вөр тырнас. Но збыльвылас артмис сөмын шөпкөм. Та вылө видзөдтөг, Бим кыліс Васьөөс. Сйө нюлыштис зонкалысь чужөмсө да котөртис ю дорө. Сувтыштлис, бергөдчыліс му вылын куйлысь зонкалань. Гашкө, ас ногыс мөвпалис, позьө-ө эновтны сйөс. Но сэсся повтөг ызмуні-пырис ваө да кутис вартчыны мөдар берегө. Буретш мөдлапөвті-ыс и муніс сиктө петан туйыс.

Юсө вуджөм бөрын Бим пыркнитчис да котөртис сиктлань. Вит верстыд понлы абу кузь вөлөк. Час джын мысти сйө пырис нин аслас керка йөрө. Аددзис Васьөлысь мамсө да увтыштис.

Мөдыс чуймис.

— Тэ кысь усин? Көні Васьөыд?

Бим эз куж вочавидзны. Сйө кватитис вомас нывбабалысь платтө бөжсө да кыскыштис дзирья өдзөслань. Котөртлас, косалас, бара босьтас вомас платтө бөжсө да нетшыштас. Тадзи сөмын сйө кужис нуөдны мамсө пи дорас.

— Адйө,— бөрддзис нывбаба.— Мыйкө Васьөкөд лои!?

Сйө котөртис сусед Иван Иван дорө, коді неваж на воис чери кыянінысь.

— Криста ради, мезды,— шыасис нывбаба.— Васьөкөд мыйкө лоөма. Со понйыс өтнас локтіс.

— А көні сйө?

— Кайис вөр керка дзоньтавны. Кодөс тай Опонь пөль козь-навліс.

— А, төда. Сйө матын. Час, горөдла пиөс да кайлам.

Иван Иван пыраліс керкаас. А сэсся регыд мысти мужикьяс мөдісны ю дорө.

- Ме тшöтш,— вöзйысис Васьölөн мамыс.— И Бимös босьтам.
— Босьт. Пыжас ставным тöрам,— вочаасис Иван Иван.

А тайö кадö Васьölөн кокыс дзикöдз пыктис. Туысь пыкöсыс зэлöдис гач коксö. Чегöминыс зэв ёна ёнтö. Зонкалөн заводитис гудрасьны-вошласьны юр вежöрыс. Син водзас кутисны бергавны быдсяма серпасъяс.

Со кымынöдысь нин уськöдчылис Данила другыс. Тöд вылö бара уси тувсовъя каникулъяс дырйи аддзисьлём...

...Коли школаö пыртöдз дзик öти лун. Талун Васьö рытья автобусөн каяс гортас.

Асывсяньыс найö паныдасьлисны майор Ивановкöд.

— Кутам помавны операциясö,— висьталис сийö.

— Операция?— эскытöма артмис Данилалөн.

— Тайö абу больничаса операция,— нюмдис майор Иванов.— Тайö миян профессиональной термин, мöд ногөн кö, шуанног. Тi дасьöсь та вылö?

— Дерт, дасьöсь.

— Бур.

Воддза луннас Таня Ивашкина звönитлис Данилалы да висьталис, кор да кöни аддзисьласны. Та дырйи тшöктис кежавны сы ордö гортас: эм пö сёрни.

Урчитöм кадö зонка пырис кык судтаа чиган керкаö. Таня тöдмöдс Барокöд. Став сёрнисö лои гусьон гижöма, да та дырйи снимайтöма кыкнаннысö, Бароос и Таняös. Данила вочавидзис Баролөн юалöмъяс вылö сiдзи, кыдзи велöдис майор Иванов. И, тыдалö, наркобарон нинöм эз казав.

Керкаыс петигөн нин Таня Ивашкина кутыштлис сийös сой-бордöдыс да шуис, мый найö паныдасясны аски кык час лунын школа дорын.

— Тадзи бурджык, мед думайтасны, быттьö школаö волім расписание видзöдлыны. А татчö сэсся эн волы. Нинöмла весьшöрö йöзсö шызьöдны.

Данила чуймыштис быдён. Мыйла нö Таняыс вежис паныдасян местасö. Эз-ö казав сыкöд ворсöдчöмсö? Но сэсся юр вежöрас колян сёрнисö бергöдлём бöрын лöньыштис: эз, сийö нинöм сэтшöмсö эз шу, код вöсна эськö Ивашкина повзис.

А Баро, кор зонка бöрысь пöдлассис öдзöсыс, чукöстис Таняös.

— Таня, матыстчыв ме дорö.

— Да.

— Тэныд кажитчö зонкаыс?— веськыда юалис Баро.

— Да ну,— көрлис нырсö мöдыс.— Лох, деревенщина.

Баро мыйкö нурбыльтис вомгорулас, сэсся öвтыштис кинас.

— Ладнö, верман мунны.

Аскинас Данилалы колис сетны дурмöдчантор вузалöмысь сьöм да босьтны наркотиклысь выль чукөр. Зонка, кыдз тöдам нин, воддзаяссö некодлы эз вузав. Найös босьтисны понятöйяс дырйи. Но медым водзö «ворсны», сылы РОВД-ын сетисны паса сьöм. Буретш сы мында, мыйта колö вöли чукөртны.

Таня Ивашкинакöд торйöдчём мысти Данила звönитлис майор Ивановлы.

— Бур, ми лоам дасьöсь,— кылис телефонын.

И со кык час гөгөр другьяс мөдөдчисны школа дорө. Ылы-сянь на эськө торйөдчисны, но кор Данила паныдасис Таня Ивашкинакөд, мөдыс пыр и юалис:

— Другыд өмөй тані на?

— Талун рытнас автобусон мунас.

— Оз кажитчы сійө. Став мыгөрыс висьталө: «ментон» лоө.

— Ог төд, ми та кузя эг сёрнитлөй,— пөрийөдліс Данила.

— Ладнө, ладнө. Сьомсө вайин?

— Вайи,— Данила мыччис ёкмыльтор.

— А со мөд партия,— Таня Ивашкина суюыштис зонкалы пальто зептас кык ичөтик тубрас.— Тайө кык лун кезлө. Сэсса бара лоө. Отарас тэнад уджон.

— Ага,— довкнитис Данила воча, но пыр жө кыліс, кыдзи бөрсяньыс горөдісны рочон:

— Стоять, полиция!

Таня Ивашкинала да Данилалы ОМОН-саяс пысалісны на-ручникьяс да өдйө пуксьөдісны муртса на воом «уазикө». Кык-наннысө нуисны РОВД-ө. Таняөс да Данилаөс пыр жө вайөдісны майор Иванов жырйө. Сэні найөс вичычисны нин да воддза моз жө, понятйөяс дырйи, гижисны протокол. Майор Иванов юасис.

— Тэ тайө порошоксө да сьомсө сетін Данилалы школа йөрын?

Таня чөв оліс. Сійө вичысьтөг кутөмысь шөйөвошис. Майор Ивановлы ковмис выльысь юавны.

— Эг,— кутіс соссыны Таня.— Сьомсө да порошоксө ме первойысь аддза.

— А кутшөм могысь паныдасин Марковыскөд?

— Нем вичысьтөг. Ме локті расписание видзөдлыны. Сійө тшөтш. Со и вочаасим.

— А та вылө мый шуан?— майор кыскис Таня сумкаысь сьом тыра конверт.— Сэні тэнад чунь туйясыд.

— Сьомсө ті асьныд меным пуктінныд.

— Тэнад чунь туйон?

Майор Иванов босьтис кутшөмкө прибор да нуөдіс Таня ки кузя. Приборыс петкөдліс, мый нывкалөн кийн эмөсь аслыспө-лөс краска туйяс.

— А тайөс кыдзи гөгөрвоны?

Таня нинөм эз вочавидз.

Майор матыстчис пызан дорө, көні сулаліс компьютер, да суюис флэшка. Монитор вылын тыдовтчисны Таня Ивашкина да Данила Марков. Снимайтөма и гижөма налысь бөрья паны-дасьлігөн сёрнисө.

Таня гөрдөдіс. Сійө мыйкөдыра оліс чөв. Сэсса лөгпырысь видзөдліс Данила вылө да пинь пырыс сөдзтіс:

— Сука! Ме нинөм ог висьтав, кора адвокатөс.

— Камераө,— довкнитис юрнас Ивашкиналань майор.

Таня петігас бергөдчыліс на, содтөд сотыштис синнас Данилаөс. Сылөн видзөдласын вөлі сымда лөглун да зывөктөм, мый зонка быдөн йөжгыльтчыштис.

РОВД-ысь петігөн Данила паныдасис наркобарон Барокөд. Сійөс наручникөн вайөдісны дзескыдінө.

А регыд школаса линейка дырйи Данила Марковлы сетісны грамота да дона козин. Полковник Яковлев челядь водзын шуис:

— Данила Марков сетіс мянны ыджыд отсөг, отсаліс кутны дурмөдчантор разөдысьясөс.

Классö пыригөн Толя Карпов матыстчис да сетліс веськыд кисö.
— Сьölөмсянь чолөмала, Данила. Тэ, вölөмкö, повтöм морт. Тэкöд позьö биö коть ваö пырны.

Толя збыльысь нимкодясис. Сылөн весиг синмыс югъяліс. Бур-дöдчанінын куйлігөн на тöдмаліс Бароöс да Ивашкинаöс дзескыдінö пуксьöдöм йылысь. Сюрöмаöсь и найö, кодъяс мыжаöсь сійöс нойтöмын. Сэки нин радлыштіс: ставныслы сюри, мый корсисны...

Но та пöрйö Данилалы грамотасьыс да дона козинысь эз вöв нимкодь. Сійö кöдзыда видзöдліс Толя выlö. «Мыйысь рад-лö?»— думыштіс ачыс. Сы пельын пыр на кыліс Танялөн лөг тырөн шуöмыс: «Сука!»

...Тöлысь мысти муніс суд. Данилаöс сэтчö корлісны кыз мыждан адззылысьöс. Кöрт таса öдзöс сайын пукалісны Баро да Таня Ивашкина. Суд шуис пуксьöдны Бароöс дзескыдінö дас кык во кезлö, а Таня Ивашкинаöс мöдöдны тыр арлыдтöма-яслөн колонияö.

— Кор мыждöмаясöс петкöдісны суд жырсьыс, Таня весиг синсö эз чöвтлы ме выlö,— друкыслы висьталіс Данила.— Сылөн чужöмыс вöлі скөр, быттö измöма.

— Эн жалит, шыбит сійöс юрсьыд,— такöдіс Васьö.

Но Данилалөн, тыдалö, видзöдласыс мöд вölөма. «Колонияö муна,— Васьöлы юрас бара воисны ёртыслөн кывъясыс.— Не-кыз оз гөгөрво, мый найö абу öткодьöсь. Туйясыс öтар-мöдарö кезöны».

18

Вөр керка дорын Васьö паляліс, кор Бим заводитіс нювны чужöмсö. Зонка осьтіс синсö. Адззис копыртчöм мамсö да су-седьяссö.

— Мый лоин?— чуймöмөн юасис мамыс.

Но кор адззис пыктöм коксö, кутіс гораа ойзыны.

— Адöй, кокыс пыктöма да. Чегöма, тыдалö. Кори öд, эн, мися, öтнад кай. Эн кывзысь.

— Ог вермы сувтны,— муртса пычиктіс ас пытшсьыс Васьö.

Иван Иван пуртөн вожöдіс зонкалысь гач коксö. Тыдовтчис лöзöдöм кок лапайс. Пыкöсыс кайöма нин пидзöсöдзыс.

— Кардъялам.

Иван Иван керыштіс куим бедь да топыда кöрталіс найöс доймöм кок бердö. Сэсся пиыскöд кык потшкысь да керка бердö сувтöдöм пöв помъясысь вöчисны нöсилка. Водтöдісны доймöм зонкаöс сы выlö, видзчысьöмөн лэччöдісны пыжö.

Кор Васьöös нуисны юрсиктö, больничаö, суис рыт. Татчöс хирургъяс öдйö вöчисны асьыныс уджсö.

— Бурдас оз?— юасис мамыс.— Öд сійö полицейскöйö көсйö велöдчыны. Гашкö, та вöсна оз и шогмы?

— Бурдас, и армияö босьтасны. И полицейскöйö вермас велöдчыны,— такöдіс хирург рентген снимоксö видзöддöм бöрын.

Васьöös водтöдісны торъя жырйö. Сылысь коксö кардъялісны да öшöдісны гираяс. Колö пö вöчны сідз шусяна «вытяжка», гөгөрвоöдіс врачыс.

Öтчыд Васьö садьмис да адззис дінсьыс ёртсö.

— Привет,— шыасис Данила.— Ме мыжа, мый эг лок, кор корин. Вои кö, тайö неминуचाыс эськö эз ло. Прöстит таысь.

— Ладнө, проехали,— рочыштіс Васьö.— Ачым мыжа, виччысь-төг лои доймöмыс. Бурджык висьтав, кыдзи колонияд ветлін.

Данила дусыдмис чужöм вылас. Мыйкöдыра чöv оліс.

— Ме инö эг öшйы, кор пуксьöдісны Тая Ивашкинаöс. Тэ тöдан, мый эг вöv веськодьöн сы дорö. Бөртя здукöдыс эски, мый ставсьыс мыжа Баро.

Дум вылö уси Öксинь пöч йылысь дедушлөн коркөя висьтыс. Локті сы дорö, да бура дыр сёрнитім. Сійö менö и чуйдіс ветлыны колонияö.

«Верман тэ татшöм нывкаыскöд лоны шудаөн?— юалис менсьым дедушöй да шуис: шудсö пö быдөн ас ногыс кылö. Мортыдлөн шудыд кок улын оз туплясь. Сэки эськö зэв кокни вöлі. Копыртчышт да лэпты сöмын. Но тайö абу тадзи. Шудсö колö аслыд корсьны. И унджыкысьсö сійö оз кокниа шед».

Данила бара ланьтыштлис, көсйис кывкөртавны сёрнисö:

— Тайöс тöд вылö кутöмөн и мөдöдчи колонияö. Начальствоыслы висьтаси воча вокөн. Мед, мися, лэдзасны Тая дорö.

— Но и мый, аддзин ассыйд шудтö?

— Аддзи?.. Эг. Кор Таяöс вайöдісны колонияса аддзысьлан жырийö, ме усыкöдчи паныд. Көсйи кутыштылыны. Но аддзи чужöмсö да джөм сувті. Таялөн мича чужöмын тöдчис шензьöдана чорыдлун. Кутшöмкө кöдзыд, ёсь видзöдлас югнитіс сылөн лөз синтясын. А вомыс вежыньтчис да зывöка вашмуні.

— Убирайтчы! Эн лөсьöдчы некор менам туй вылö,— скöрысь шуис сійö да бергöдчылöмөн содтіс.— Сука!

Тайö лёк кывсö меным мöдысь нин шуис. Ме шай-паймуні. Вöлисти сэні гөгөрвои: ме öд куті сьölöмын эг тайö нывсö, а мөдöс, кодöс чужті да лелькуйті аслам вежöрын.

Кор петі колонияысь, сьölöм вылын дільсвидзис. Быттö сьökыд из личкис. Эг, эг тадзи көсйы аддзысьлыны Тая Ивашкинакöд. Тыдалö, прав вöлін тэ. Первойсянныс öд сувтін нылыслы паныд. Эн öтчыд шулы, мый сылөн сöмын кышöдыс мича. Пытшкыс тшыкöма, сьöd. Сöмын тайöс ме эг көсйы кывны да аддзыны.

— Но öні палялін, синмыд воссис?

— Да. Ме ставсö гөгөрвои.

— Ну и кутшöм мөвпгяс водзö вылö?

— Кор бурдан, дзоньталам вөр керкатö, сöлам «Бригантинаö» да мөдöдчам Нёбью кузя. Ю йылöдыс,— тайöс шуигөн Данилалөн чужöмыс югдіс, а синмас тöдчис долыдлун.

— Зарни тыра сундук корсьны?— серöктіс Васьö.

— А-а.

— А ог кө аддзöй?

— Ог кө сэтысь, то мөдлаысь тшук сюрас.

— И миянлысь ёртасьöм некод оз дзуг?— Васьö веськыда видзöдліс другыслы синмас.

— Да,— чорыда шуис Данила.

И кык ёрт топыда киасисны.



Екатерина Дмитриевна Матвеева чужис 1998 воын Емдін районса Семуков грездын. Велөдчө Көжмудорса шөр школаын 11-өд классын. Олө Семуков грездын. Ас йывсыс Катя вись-талө: «Прөст кадө радейта ворсны волейболысь, серпасасыны, исласыны сноубордөн, ветлыны вөр-ваті. Кажитчө веськөдлыны машинаөн да тракторён. Гижлывла кывбуръяс, проза, статьяс, кодъясөс йөзөдлывлөны районса да республикаса газет-журналын.

Гижөд артмө сэк, кор синмыд öзйö да бандзибыд сотчö».

Сетам «Войвыв кодзулын» Катялысь медводдза гижөдъяс. Бур туй, том ёрт!



Екатерина МАТВЕЕВА

Кор сьölöмыд сылас...

В И С Ъ Т

Ок, и гажа асылыс! А енэжыс... енэжыс быттьö кельыдлөз шöвк чышъян мян сиктлөн пельпом вылын. Шонді пым югөръяснас меліа малыштö став му веркөссö, быд ловъя лов дорö сибавлө. Гильөдчö, синтö ёрö, чуксалö радлыны...

Вөр-ва юралö быдпөлөс шыөн: дзизгöны гут-гаг, дзользёны лэбачъяс, кургö Васька кань, аттьöалö көзяйкасö мөс вöра йöлысь. А видз вылын кылö сигудöклөн кодь вöсни гөлөс. Тайö ичöтик Таня ливкйөдлө некодлы тöдтөм сьланкыв веж турунті көмтöгыс котралөмөн. Дзоляник ки пыдöсас нывка тэрыба чукөртö гырысь лысва войтъяс. Полö бокö уськөдöмысь, көть и сылы чайтсьö, мый чукөртны кө лысвасö, Эжваысь паськыджык ю визувтны пондас. Таня тэрмасьö, мед эськö шонді югөръясыс оз удитны нюлыштны дона излань мунысь югыд да сөдз мольяссö.

Нывкалөн чикыла веж юрсинас ворсөдчö небыдик төвру, да и ачыс Танюш ышмö быттьö сыөн, пуксьылас му бердö, дзебсьылас, бөр чеччыштлас, быд дзоридзлысь шмаксö исыштас морөс тырнас. Пырас пашкыр лапъя коз улö, му оз кокалö. Гашкö, та вöсна дзолюклөн вом дорыс кыа кодь алöй. Но оз став тусьсö вомас пукты, а ки пыдöсас öктö-чукөртö пöчыслы гөснеч, томмөдны көсйö, мед сы кодь жö мольыд чужөмбана лоö, а то мыйкö чукурöсь.

Таня пышйөн* локтö гортас китыр озйөн, а пöчыс виччысьö

* Пышйөн (диал.) — котөрөн.

нин тасьті тыр пым шонаа рокон. Му оз сорнас и чосмасысны. Сэсса дыртө весь оз овны, ноксьоны керка гөгөр баба-ныла: уджыд өд тыр, да и асылыс абу зэв гебъя-номъя, шондіыс оз пөж.

Біджыд шыон лэччө вадорө гырысь ныв-зон чукөр, вак-вакөн сералө, казтылө колян купайтчөмсө. Тайө сёрнисө кылө и Танюш. Зэв окота сылы на бөрся вөтчывны, да өд вывті ичөт на, муртса квайт ар тыри. Пөчыс гөгөрвоө внучкаыслысь көсйөмсө, босьтө ки пөлөдыс да нуөдө том войтыр бөрся.

Ю дорад еджыд лыаыс помтөм-дортөм, кок пыдөстө чишкалө, быттьө пачысь кыскөм өгыр кузя восьлалан. Ваыс пөжөм йөв кодъ: небыдик, шоныд, сөстөм, некутшөм суйөр сай оз ков, татчөс «саридзыд» медся на бур. Мөдлапөлын муркакылө. Тыдалө, зэрыштөма: өшкамөшка сунсьөма юө, горшсө веськөдө.

Локтігмозыс шойччысыяс кежавлөны кыддза раскө, гөрд гоб гөгөртөны, мыччысыяны пө пондөмабсь да. И збыль, то өти, то мөд... молодечьяс кодьбсь. Чышгьян тыр шеді — пумөн.

Нимкодьясьө Тания статя, кудриа юра, еджыд сарапана кыз пуясөн, өд найө дзик рочаканьяс кодьбсь, а дзюлюкы ок кутшөм окота мунны налань: вөччыны быд празникө югыд платтьөө. Налөн со и турунвижөн, и зарнийөн, и еджыдөн волялө. Сөмын абу гөгөрвоана, мыйла өткымын кызсө сөйөн тапкөдөма? Но пөчыс ставсө төдө и висьталө, мый уна вын сетө тайө пуыс мияны. Йөзыс вийөдөны пучерсьыс зарава — зэв чөскыд юантор, а дойсө мавтөны сөйөн. Өд сідз кө эновтан, уна и синва кысътас тайө еджыд кока нылыс.

Раскысь петігөн вотчысыяс копыртчылөны вөрлы, аттьөалөны тшакысь, став бурсө сиөны да мөдөны гортлань...

Рытланьыс шонді ыпнитіс гөрд биөн, мавтыштіс енэжсө алөй рөмөн да ньөжйөник дзебсис джуджыд козъя вөр сайө. Өшинь сайын вочасөн пемдіс, енэжыс шебрасис лөзов, пушыд эшкынөн. Пондісны мыччысыяны кодзувьяс, но Тания тайө кад кежлас шоныд вольпасын квайтөд вөт нин вөталіс, морөс бердас медратейтана чачасө топөдөмөн.

...Бара воис выль лун. Садьмис Тания, нюжөдчыштіс да тэрыба чеччыштіс вольпасьсыс, уйкнитіс ывла вылө да тшөкмуні. Мый нө тайө? Гөгөр шы ни төв. Енэжыс пемдөма, мисьтөммөма. Шонді дзикөдз чусмөма. А кыгчө нө вошөма помтөм-дортөм вөрыс? Ставсө пусь-пасьвартөма скөра югьялысь пиньяса пила.

Полігтырийи восьлалө нывка төдса берегті, көдзыд лыа вывті, чим съөд, сирөссьөм ю бокті. Водзынджык ю пөлөныс куйлөны пудьясөн чери ловьяс. Налөн оз нин югьяв эзысь сьөмыс, весиг өдва ловья кырнышгьяс оз пажнайтны тайө сөяннас.

Оз дөзмөдчы гут-гаг: пөим моз койыштөма кок улө.

Танялөн синваыс шорөн лэччө. Нывка оз төд, мый карны, уськөдчылас то өтилаө, то мөдлаө... Ставыс кусөма, кулөма. Сөмын кылө юр вемө пырысь техникалөн увгөм да бушколөн лэбөдөм деньга кышкөм, а ылынджык — лөкысь ойзөм, сыркьялөм.

— Тайө ме, Му шар... — медбөрья вынсө чукөртөмөн шыасьө Му шар. — Ме көсья, мед ті, йөз, кывзыштінныд менө. Бура олігад садьтө воштанньыд, некодөс он кылө, ставыс веськодь. Куш деньга судзөданныд, быд ур вылө усьласянньыд, метра му вөсна дурмөм понгьяс моз пурсянньыд, вартанньыд да лыянньыд...

Ме йылысь и думныд абу. Вермис тай ыджыд вына горшлуныс да лёклуныс кусодны муслун, бурлун, зильлун, веськыдлун. Тайо медьёна сьолөмөс дойдө. Став вирөс юинныд, тыясөс нетшкинныд... Пöда...

Таня нинөм эз вермы гөгөрвоны. Сийо копыртчис да шензё-мөн видзөдліс бобув бордысь кольөм лестукьяс вылө. Бөрсянныс кыліс валөн бузгөм. Эз удит нывка бергөдчыны, сийөс нылыштис аддзывлытөм ыджда вал...

Дрөгмуніс Танюш эшкын улын, мый вынсьыс топөдіс чачасө ас бердас, восьтіс синсө... Юрсиыс нылөдөма. Нывка чеччис да котөртис кильчө вылө. Дыр сулаліс вөрзьевтөг, синнас лапниттөг, пельсө чошкөдөмөн, ловсө кутыштөмөн. Поліс, зэв ёна поліс тайо олом вошөм вөсна.

Пөчыс аддзис чуймөм внучкасө да юаліс, мый нө пө сьолөмтө татшөмасө вөрзёдіс. Таня чөла кутчысис сылы киас да юксис вөтын аддзылөмторнас. Пөчыс кыв шутөг кывзис нормөм сьолөма нывкаөс да мольөдіс кудриа юрөдыс, мед лөньөдны пузьөм сьолөмсө.

Вөтсө висьталөм бөрын Танюш кытшовтіс синнас гөгөр, нимкодясис вөр-валөн мичлуннас, кыпыдлуннас. Эз вермы төрөдны ас пытшкас радейтана парма дінас став муслунсө, бандзибөдыс исковтис синва войт. Таня юаліс пөчыслысь:

— Збыль-ө та ыджда Му шарсө вермас мыйкө бырөдны?


Олөма морт вочавидзис тадзи:

— Зарни нылөй, өнія йөзлөн көдзыд сьолөмөн да горшлунөн вермас лоны быдсяма дивөыс. А коркө кө йөзыс небзясны да кыласны Му шарлысь дойсө, бөр на ставыс воас ас лад вылө.

* * *

Ичөтик ты бокын
Быдмө джуджыд коз.
Пашкыр лапъяс улас
Овлө юмов оз.
Кор вола ме коз бердө,
Сьолөм радлө дыр:
Чөскыд озйөн вердө,
Вынтө сетө пыр.
Коз пу улын шоныд чом:
Төлысь дзебсьө ичөт ном,
Кодзувкотлөн ыджыд кар,
Сэтчө волө мудер тар,
Шырпи аддзө чөскыд вөт,
Урлы шедө кынөмпөт.
Тадзи кольө лун и вой,
Коз пу өтнасөн оз коль.

❖ ❖ ❖



Андрей ВЛАСОВ

Курыд шуд

КЫК ЮКӦНА ДРАМА

ВОРСЫСЬЯС:

САВӦ — крестьянин, 90 ар.

ТАСЯ — сылӧн нучка, 18 ар.

ПАВЕЛ ЛАТЫШЕВ — пельшӧр, 20 ар.

БАКУР — сёрниттӧм бурлак зон.

ӦНИСЬ — дӧва, 30 ар.

РАССЫХАЕВ — колхозӧн веськӧдлысь, 50 ар.

ОФИЦЕР — ОГПУ-са, арлыда мужичӧй.

САЛДАТЬЯС — сэтысь жӧ, нель кымын том мужичӧй.

ЙӦЗ — грездса.

НЫВЪЯС

МИРОН — ӧш, 7 ар.

МЕДВОДДЗА ЮКӦН

Медводдза серпас

Водзладорас — сцена вомӧн туй. Туй саяс — юкмӧс; юкмӧссиянь шуйгавыв, туй бердас — неыджыд льӧм куст. Бӧрладорас, веськыдывлас — джуджыд кильчӧа, сарая керка. Керка пытшкас тыдалӧ кутшӧмсюрӧ гӧлиник эмбур, крӧвать да стенас ӧшалысь гираа кӧка часі. Кильчӧ пос помас — неыджыд пызан, лабич, кык улӧс; джоджас — самӧвар. Кильчӧ бердас — ыджыд чугун пӧрт да важ корӧсь.

Мича гожся рыт. Крӧвать вылын узьӧ Савӧ: морӧс вылас — восьса «Вӧрлэдысь» газет. Юкмӧс дорын Тася: лэпталӧ ва, новлӧ ворйӧ. Йӧрас корсюрӧ кывлӧ ӧшлӧн буалӧмыс.

ТАСЯ (*кисьтö вoрйö вa, мeлiа кoрö öшкöс*). Лок, Миронушко, лок!.. Лок, дзоля тусюкöй, лок!..

МИРОН (*кыза, раминика*). Ö-ö-ö... Ö... Ö-ö-ö-ö...

ТАСЯ. Лок, тусюкöй, юышт ключ вежа ватö! На, медся кö-дзыдсö вайи, юышт, ыркöдчышт... Жар тэныд, тыдалö, жар... Мый, чеччыны он кöсйи? Дышöдчан?.. Мый нö лоöмыд?.. Вись-мин али мый?.. А?.. Миронушко?.. (*Тася потшöс костöдыс пырö йöрö, мунö сарай сайö.*) Вай ныртö видла... Ой, кутшöм васöд! Ой, кутшöм кöдзыд! Пöръясян, тусюкöй... Ок тэ-э... Кутшöм мича! Кутшöм ён!.. Вай кудриа чужöмбантö гыжъялышта да окалышта!.. Ноко... Кутшöм небыд!.. Но, кажитчö оз?.. Кажитчö?.. А тэ мудерысь-мудер вöлöмыд!..

МИРОН (*раминика*). Ö-ö.

Тася петö йöрысь, ведрасөн локтö юкмöс дорö, бара лэпталö ва. Другысь горöктö кыпыд маршөн ывлавывса радио, но мыкталіг кусö. Тася лэптылö юрсö шуйгавывлань и водзö уджалö. Савö садьмö, оч-салö, гыжъялö коссö, петö кильчö вылö, кисö плеш вылас кöзырөн пуктöмөн видзöдö гöгöрбок. Шуйгавывсянь тыртöм ведрaйн локтö Öнись, но юкмöс дорö оз мун: сувтö льöм пу сайö да пельсö чошкöдöмөн килльö семечки. Савö оз аддзы Öнисьöс.

САВÖ (*аслыс*). Шондi пуксьöма нин да... (*Тасялы.*) Тася, самö-вартö пуктив, ужнайтам сэсся!..

ТАСЯ. Пузис нин.

САВÖ. Миронтö вердін?!

ТАСЯ. Оз ю ни оз сёй, талун бара сарай бердас водöма да оз чеччы мыйкö!

САВÖ. Но мед куйлыштас... Мудзис, гашкö... Эз кö висьмы?

ТАСЯ. Нырыс кöдзыд, дзик сола тшакывывса из кодь...

САВÖ (*ышловзё*). Да-а... Мем бöръя кадö оз жö тай сёйсьы... Тыдалö, öтпырйö пöрысьмим...

ТАСЯ. Миронушкоыд абу на пöрысь.

САВÖ. Сизим ар таво тыртiс. Öшкыды тайö кузь нэм нин. Мый мем öкмысдас, мый сылы сизим... Сылы шойччыны нин колö, а йöй председатель пыр шуасьö, Мироныд пö партиялы паныд мунö, колхоз стадаас оз лок... Быттьö ме сійöс кута?.. Ачыс тöдö, көн шöйтнысö!

Тася катöдö ведра ва кильчö пос помö, сэсся лэптö пызан вылö самö-вар, пырö керкаö. Öнись петö юкмöс дорö.

ÖНИСЬ (*Савöлы*). Бур рыт, Савö дед! Чай юны лöсьöдчан-ныд? Ывлаын?

САВÖ. Да. Юыштам. Танi гажаджык. Тöвбыд гортись эг пe-тавлы да...

ÖНИСЬ. Дерт, ывлаын бурджык, поводдяыс зэв тай мича! Таво бур туруныс лоö! Мöсьяс пöтмөн йирсясны!

САВÖ. Йирсясны, дерт. (*Бокö.*) Лясас тай öкаяннöй бабаыс, öнi дыр он мын...

ÖНИСЬ. Кывлін эн, мöсьясыс пö нач тырсявтöмöсь, пыр гу-ляйтöны?

САВÖ (*Öнисьлы*). Тайöс председателыдысь юав. Ме öд фермаад ог кайлыв.

ӨНИСЬ. Юавлі нин. Висьталө, мый Миронушкоыдлы колхоз мөс ыло мустөм кайны.

САВӨ. Пөрысьмис.

ӨНИСЬ. Мыйкө тай войдөрлун Трөш кулакса Гөрдань ыло слөн тушанас зэв зіля чечыштліс?!

САВӨ. Гөрданьыд Мироныдлы коллективизация водзын на ёна кажитчис! Пемөсьясыд муслунтө бур йөз моз төдөны жө... Абу өд кутшөмкө кырсаысыяс!

ӨНИСЬ. Да тэ.. да ме... Тэ ме ыло индан?!

САВӨ. Ватө босыт и мун син водзысь.

ӨНИСЬ. Тешитчан?! Энлы, ме тиянлы, саботажник чукөрлы, пужтө петкөдла на! *(Тыртөм ведранас котөртө бөр: уськөдчө отарө, бергөдчө, котөртө мөдарө.)*

САВӨ *(Өнисылы мышкас)*. Зырымбедь!

Савө скөрпырысь гумовтө көшөн ва, юө, пуксьө поскө, босытчө гартны чигарка... Петө Тася, тэчө пызан ыло вөлогатор, шөралө нянь. Савөлөн некыз оз артмы гартыштны чигаркасө: кийс тіралө, табакыс киссьө.

Савө лэччө пос помө, пуксьө пызан сайө. Тася пуксьө орччөн.

САВӨ. Кывлін, миянөс саботажник чукөрөн шуис?

ТАСЯ. Коді?

САВӨ. Ёнись.

ТАСЯ. Мыйла?

САВӨ. Мирон пө колхоз стадасө зывөктө, оз тырсьөд.

ТАСЯ. Завидысла косьмө! Колхозас омөлик көзанас пырөма да, прамөя оз уджав, сөмын председателькөд гажөдчө, а трудоденьсө медуна босытө... Видзчысь сыысь, дедө!..

САВӨ. Мый керсьө му ылас? Мый керсьө? Ёта-мөдөс йирам... Шулывлісны тай пөрысь йөзыд: ном кө курччас — вир тусь петас, а чукөрөн кө уськөдчасны — вирнад мыссян... Ёні ыджыд партия чукөртчө, сідзкө, уна вир киссяс... Мырдөн тшөктөны колхозө пырны, өтув овны... А коми мортыд нэмсө семьянас оліс. Артельясө недыр кежлө чукөртчывлісны жө, но сэн ас пөрадок лөсьөдісны, мед некодөс не дзескөдны.

ТАСЯ. Дедө, важөн бурджыка олісны?

САВӨ. Важөн?.. Важөн быдсямаыс жө вөлі, но кызд ёні мөда-мөдөс виёны, татшөмыс некор на эз вөвлы... Ленин мыжа, юкис миянөс уна пельө кутшөмкө югыд коммунизм ради да усьөдө мөда-мөд ыло. Тыпу!.. Төрытъя газет листалышти,— тырыс явитөм!.. Гижны уськөдчим ставным!.. Да өд нимсө кутшөм сюсьөс босытөмны, шуам: «Серп Молотов», «Төдысь», «Дзодзөг», «Син», «Пель». И быдсяма страмсө газетас ыстөны — коді мый гусяліс да мыйта юис. Кызвыныс асланыс йөйлун ыло норасьөны да шогмытөм веськөдлысыяс ыло... Со мый партия керө... Важөн некутшөм партия эз вөв... *(Кост.)* Ётувъя шудтө морт виөмнад он шедөд.

ТАСЯ. Мыйөн шедөдны?

САВӨ. Шудыд воас, кор быд морт кутас радейтны мустөмсө.

ТАСЯ *(чуймөмөн)*. Верман өмөй радейтны мустөмсө?

САВӨ. Он. Та вөсна өтувъя шудыд некор оз ло, но век жө быдөнлы колө водзмөстчыны сыланыс: өти воськов, мөд — и олөмным кутас вежсьыны бурланьө.

Мыччысьоны туй кузя мунысь нывъяс, сувтлөны, горөдөны: «Тася, купайтчыны лэччылам?!»

ТАСЯ (*нывъяслы*). Ог көсйы!..

Нывъяс заводитөны сывны частушкаяс.

Сигудөкыд нора ворсө —
Балалайка тальö кок!
Кильчö помас пукалөны
Невеста да старичок!

Ок! Ок!
Невеста да старичок!
Ок! Ок!
Балалайка тальö кок!

Катшасин, катшасин
Керөс вылө петөма!
Мича ныв, мича ныв
Том пельшөрлы шедөма!

Ма! Ма!
Том пельшөрлы шедөма!
Ма! Ма!
Керөс вылө петөма!

Кильчö дорас чугун доз —
Чугун бердас корөсь!
Корасысьыд оз кө лок,
Ме вылө эн норась!

Ась! Ась!
Ме вылө эн норась!
Ась! Ась!
Пельшөр пөвтö пышйөдам!

Юркмунö серам. Сэсса кутшөмкө ныв юалö: «Нывъясöй, кыр улö котөртамө?!» «Котөртамө-ө-ө-ө!» — горөдөны öтув и саялөны...

САВÖ. Тасюк, жөникыд талун волас оз?
ТАСЯ. Көсйысис тай.
САВÖ. Суа ог корасьөмсö, дзик нин слабми да?
ТАСЯ (*яндысьөмөн*). Ог тöд.

Туй вылын мыччысьö Бакур, киас сьöкыд ноп. Сувтö юкмөс дорö, корö кинас Тасяөс.

САВÖ (*Тасялы*). Воис нин жөникыд. Мун ветлы, юав, мый көсйö.

ТАСЯ. Тайö абу менам. Ме мөдöс виччыся.

САВÖ. Мөдыс, гашкө, оз нин во! Тайöс босьт дай! Коді медводз локтис — мед жөникнад и лоö! (*Серөктö*.)

ТАСЯ. Но, дедö, шуан жö.

САВÖ. Мун, мися, абу лөсьыд тадзитö!

Тася матыстчö Бакур динö.

ТАСЯ. Чолөм, Бакур. Мый колө?

Бакур перйө нопсыс кык гырысь ёді, сетө чуймөм Тасялы и өдйө мунө. Тася недыр сулыштө черисө сьёкыдырысь кутөмөн, сэсся мунө керкаланьыс.

ТАСЯ (Савёлы.) Бара чери вайис! (Нюмъялө.)

САВӨ. Вот тайө жөник! Вот тайө көзяин! Татшөм верөскөд тшыгла он кув! Ноко, петкөдлы черисө! (Виглалө.) О-о! Бур! Весиг гөрдоват! Бур! Но, пырт керкаө, аски черинянь пөжалам.

Тася пырө керкаө, здук мысти петө, чугунын мыскалө кисө, косөдө, пуксьө пызан сайө.

САВӨ. Со өд кутшөм бур зонмыд, тыдалө, радейтө тэнө, а тэ пыр ышнясян. Мында во ола, а нывбабатө гөгөрвоны эг и велав! Мый тиянлы колө? Дзик синтөмөсь ті. Колө өд сьөлөмтө кывзыны, а оз синтө... (Ышловзё.) Ок тэ... Шудыд ныр улад — оз ков,— колө этатшөмөс! (Чургөдө чуньяссө, петкөдлө кодөскө. Ёвтыштө кинас.) А-а!.. (Кисьтө чай, юө.)

Тася тшөтш кисьтө аслыс чай, пуктө сакар да думыштчөмөн дыр гудралө. Пукалоны чөв. Көнкө юрөбтө ныв сьылөм.

Шонді лэччис, луныс кусі,
Тёлыс летө лыска пусө,—
Пуксьө вой...
Пуксьө вой...

Черань везсө зарни тусьөн
Кодкө мичмөдөма гусьөн,—
Быттьө мойд...
Быттьө мойд...

Өтка юсь моз нора сьыла.
Муса ёрт, тэ менө кылан?
Татчө лок...
Татчө лок...

Юмов октө окөн юа,
Топыд сывъяд лөня шуа:
Кынмө кок...
Кынмө кок...

Мыччысьө Латышев. Киас кутө катшасинъяс.

ЛАТЫШЕВ. Видза оланныд, Савө дядь! Чолөм, Тасюк! Позьө тиянө кежавлыны?

САВӨ. А-а, мөд жөник воөма! Пырав-пырав, пызан сайө лок! Тшук тэ йылысь сёрнитам! (Киасьёны.)

ТАСЯ. Чолөм, Паша. Эн кывзы, дедө шмонитө. Татчө пуксьы. (Сетө улөс.)

ЛАТЫШЕВ (Тасялы). Тайө тэныд. (Сетө гзоригзьяссө.)

ТАСЯ. Аттьө... (Нюмъялө, дукыштө гзоригзьяссө. Шөйөвошө-мөн.) Часлы, пырала, выль тасьті вая. (Котөрөн пырө керкаө, лөсьөдө юрсисө да паськөмсө рөмпөштан водзын.)

САВӦ. Павел, тэ, кӧнкӧ, велӧдчӧм, тӧлка морт, а пыр меысь дзебсяян. Нывкакӧд кӧ волысян, первой пӧльыскӧд колӧ тӧд-масьны-сёрнитны, бать-мамыс кӧ абу...

ЛАТЫШЕВ (*пуксьӧ пызан сайӧ, перйӧ вина гоз*). Прӧща кора, Савӧ дядь, ме ӧд первой кӧсии Тасякӧд сёрнитчыны, вӧлисти корасьны.

САВӦ. Но... эн дӧзмы... пӧрысь броткысь вылад. Ме, кыз шуласны, пӧрадок вӧсна тӧждыся. Тэ ӧд пӧръявнытӧ он куж: ӧнтай Тася ошйысис...

ЛАТЫШЕВ. Ог дӧзмы, Савӧ дядь. (*Босьтӧ сулеясӧ, кӧсйӧ восьтыны.*)

САВӦ. Винатӧ мем оз позь. Сьӧлӧмӧй висьӧ да. Вай бурджык сідз сёрнитам. Ас йывсьыд висьтав: кысь тэ, кӧн велӧдчин, кы-дзи татчӧ веськалін?

ЛАТЫШЕВ. Чужлі сиктын, помалі карын пельшӧр-акушерьяс-лысь курсьяс, а уджыс татысь сюри... Бать-мам абу: кувсьыліс-ны нин... важӧн... Татшӧм менам олӧм...

САВӦ. Гажтӧм олӧмыд.

ЛАТЫШЕВ. А кодлӧн ӧні гажаыс?..

САВӦ. Сідз эськӧ да... Ок-ок-ок... Тыш бӧрся тыш мунӧ, вир бӧрся вир киссьӧ... Тэ партийнӧй абу?

ЛАТЫШЕВ. Абу-у... Партийнӧй кӧ вӧлі, карас колисны...

САВӦ. Ссылка пыдди ӧмӧй сьӧд вӧр шӧрӧ суйисны?

ЛАТЫШЕВ (*нюммуно*). Сідз тай артмӧ.

САВӦ. Мыйкӧ керин?

ЛАТЫШЕВ. Да сідз... Ӧти чиналы пель бокас лӧсыштӧ, нывка дорӧ вӧлі кызмырдӧн сирасьӧ да.

САВӦ. Ме тэ кодӧн жӧ вӧлі томдырйи, и ӧні, ковмас кӧ, верма быдӧнлы шковгыны! А-ха-ха! (*Серӧктӧ.*)

ТАСЯ (*вайӧ тасьті, пуксьӧ пызан сайӧ*). Менам дедукӧй дзик повтӧм морт.

ЛАТЫШЕВ (*Тасялы*). Тэ татшӧм жӧ?

ТАСЯ (*наяна нюмъялӧмӧн*). Ме абу! Быд шыысь пола да!..

САВӦ (*мудера*). Полан кӧ — бур дорйысь колӧ!

ТАСЯ. Ок, эськӧ колӧ да... Кысь босьтнысӧ? (*Ышӧдана вигдӧ-гӧ Павел вылӧ.*)

ЛАТЫШЕВ. Ме ог шоґмы ли мый?

ТАСЯ. Дорйысьӧ вӧзйысян?

ЛАТЫШЕВ. Кажитча кӧ?

ТАСЯ. А тэ тӧдмав...

ЛАТЫШЕВ. И тӧдмала! (*Окыштӧ Тасяӧс бан бокас*). Петан ме сайӧ?

Тася тупкылӧ чужӧмсӧ кинас.

САВӦ (*гыжйыштӧ тош увсӧ. Нимкодя*). Но и бур! Ме рад! Вай инӧ, Пашӧ, вость винатӧ, татшӧм выльтортӧ колӧ мыськыштны! Тасюк, сола черитӧ гӧбӧчысь судзӧд, котӧрӧн! (*Тася пышйӧ. Савӧ кутлӧ Латышевӧс пельпомӧдыс.*) Ме пӧрысь нин, а тӧянлы овны да овны на... Кыззы... Кӧлысьтӧ арнас вӧчам, сэсся гозйӧн олӧй. Керка, став эмбурыс: ружье, порок, дрӧб, ботангяс, пыж да мый да — ставыс тӧянлы кольӧ.

ЛАТЫШЕВ. Ме вӧравнытӧ ньӧти ог куж.

САВӦ. Тася велӧдас. Батыскӧд дзолядырсянныс вӧрын олӧс. Мамыс зэв водз кувсьыліс. Тася — збой нывка, ошгьяскӧд паныдасьліс и ӧні нинӧмысь оз пов... (Аслыс.) Экма, сё шудӧй усьӧма! (Малыштӧ юрсӧ.) Шондібанӧй том гажӧй... Вай кисьтав нин!..

Тася вайӧ пызан вылӧ сола чери. Куимӧн юӧны-сӧйӧны, кутлысьӧны да окасьӧны, сэсся Тася Павелкӧд колльӧдӧны дедӧс узыны, идрасьӧны, петӧны туй вылӧ, окыштӧны, кутчысьӧмӧн кытчӧкӧ мунӧны...

Мӧд серпас

Рытсёр. Колхозса контора. Ӧшинь весьтын пызан. Пызан вылын телефон, тшӧті, кабала чукӧр. Ӧти пельӧсын сейф, сейф дорын сімӧм таз; мӧд пельӧсын — ичӧт пызан вылӧ пуктӧм виль радиоприёмник. Стен бокин лабич, улӧс. Стенын ӧшалӧ Сталинӧн портрет.

Пызан сайын пукалӧ Рассыхаев. Мыйкӧ гижӧ. Радио пыр юргӧны вьльторъяс: «...Медся ӧпаснӧйӧн да жестокойӧн вӧлі и кольӧ водзӧ кулачество, та вӧсна кулакъяслы воча ми панам гражданскӧй война (Ленин)...

Другысь радио заводитӧ мыктавны. Кусӧ.

РАССЫХАЕВ (аслыс). Но! Бара лешаклӧн горавсис? (Чеччӧ, бергӧдлӧ радио гӧгыльяссӧ, эновтчӧ, пуксьӧ пызан сайӧ, бара мыйкӧ гижӧ.)

Пырӧ Бакур.

РАССЫХАЕВ. А, Бакур?! Бур, мый ачӧд локтӧн. Тӧдан мый? Колӧ заводитны войснас зӧр видзны. Талун кытшовті муяс — уналаын ошгяс таялӧмаӧсь. Ӧні жӧ кай Ракапашняӧ, медджу-джыд пу вылын вӧч лабаз, да вылӧджык, мед тэӧ ошгяс оз сӧйны анькытш пыдди! (Сералӧ.)

БАКУР. А, а! Мӧ, мӧ!.. К!.. К!.. (Петкӧдлӧ кинас пищаль.)

РАССЫХАЕВ. Пищаль абу! Сы пыдди со мый сета. (Сетӧ таз. Жергӧдчӧ.) Пуктан позъяд, кутан тайӧн гымавны! (Нюмъялӧ.) Ӧттшӧтш гусясьсысяссӧ кыйӧд. Кутан — премия сета! (Бара жергӧдчӧ.)

БАКУР (бӧр сетӧ тазсӧ). Ы!.. Ы!.. (Бергӧдлӧ юрнас.)

РАССЫХАЕВ (скӧра). Босьт, мися, кытчӧдз тэ вылӧ эг гиж ошгясслысь пакӧститчӧмсӧ да эг йӧрт сутуга сайӧ!.. На! Эн ышнясь!.. (Мыргӧн мыччӧ тазсӧ. Бакур босьтӧ.) Мун, аски вола, видзӧдла, кызди службаыд мунӧ! (Бакур петӧ. Рассыхаев пӧдлалӧ ӧдзӧссӧ, броткӧ.) Со и сет татшӧмлы пищальтӧ, ачымӧс жӧ и чергӧдас, ӧкаяннӧйыд... (Пуксьӧ пызан сайӧ.) Мӧ-мӧ, мӧ-мӧ! Но и йӧз! Нинӧмысь оз повны!.. (Босьтчӧ гижны.) Мӧ-мӧ, мӧ-мӧ... Тьпу!..

Пырӧ Ӧнись.

ӦНИСЬ (бӧргитыр, скӧра). Пукалӧ! Гижӧ! А мый колхозас керсьӧ — оз тӧд!.. (Чышкалӧ синсӧ.)

РАССЫХАЕВ *(веськоя)*. Кывза, висьтав, коді талун муса чипукёс кокыштёма?

ОНИСЬ *(стрёга)*. Сералан? *(Ярзьё.)* Но-но, серав, вай серав!

РАССЫХАЕВ. О! Со и сыланкыв артмис!.. *(Гижимоз нюжодё)*. Серав, вай серав... нюмды, вай нюмды... шыбита дөрём... окала юмтё... *(Жергөдчиг лэптылө юрсё.)*

ОНИСЬ *(гузьялёмён)*. Лэдза кө...

РАССЫХАЕВ. Талун виччысь, удж бёрын пырала муса чипук ордам, топёдла...

ОНИСЬ *(сыркьялө)*. Тэд ставыс веськодъ... И менё дивитёны, и тэнё... и колхоз вылө нин сёласёны... *(Скёра.)* Немтор сылы оз ков! Пукалө! А сэтчөдз кө кывсяс?.. *(Мудера индө пөтөлөкас.)* Сэк юртө нач орөдасны!..

РАССЫХАЕВ *(повзыштө)*. Ноко, волы татчө... *(Корө чуньнас. Ёнись матыстчө. Рассыхаев кватитө сійөс юрсидыс, топөдгө пызан бергө.)*

ОНИСЬ. Ай-яй-яй-яй!.. Лэдз!.. А-а-а-а!..

РАССЫХАЕВ. Кодды висьтавлін та йылысь?.. Но!.. *(Зурөдглө пызанас.)* Карө звөнитлін?..

ОНИСЬ. Лэдз!.. Доймө!.. А-а-а!..

РАССЫХАЕВ. Но! Висьтав, кытчөдз татчө эг лязөд гадинаяс!.. Но! Мый төдмалін?!

ОНИСЬ. Савө... Савө тэнө йөйөн шуө... А-а-а!.. Тешитчө... А-а-а!.. Мирон өшкыс, шуёны, колхоз мөстө зывөктө, оз тырсьөд...

РАССЫХАЕВ *(лэгзыштө)*. Коді төдө?!.

ОНИСЬ. Юрсиктөдз воис...

РАССЫХАЕВ. Кысь төдан?! *(Бара личкө.)*

ОНИСЬ. Ай!.. Ачым висьтавлі-і!..

РАССЫХАЕВ. Вижля! Гадиная! Лудікөс моз лязөда!.. *(Зурөдглө.)*

ОНИСЬ. А-а-ай! Ё-о-о... *(Бөргө.)*

РАССЫХАЕВ. Гашкө, юркарөдз нин кывсис?! А?..

ОНИСЬ. Ог төд... Лэдз... Некодды ог висьтав...

РАССЫХАЕВ. Он висьтав, дерт. Ёні оз и ков, гашкө, район пасьтала нин төдөны... *(Швачкө кыз сітанас. Лэгзө.)* Мун! Гортсьыд некытчө эн пет! Бөрти пырала...

Ёнись лөсьөдыштө платтьөсө, юрсисө и синвасө чышкаліг тэрыба петө. Рассыхаев майшасьө: лэптылө телефон трубкасө, тшолкйөдлыштө тшөтінас, восьтылө сейф, видзөдлө өшиньө, петалө ывлаө, ветлөдлө конто-раөд өтарө-мөдарө.

РАССЫХАЕВ *(аслыс)*. Юөрта кө — йөйөн лыддясны... А ог кө — вредительствоысь статья сетасны... Сэки быть чергөдасны... А гашкө, и оз?.. Чергөдасны! Быть чергөдасны! Саботажник чукөрнас пө веськөдлө!.. Юөрта! *(Босьтө телефон трубка. Бөр пуктө. Другысь звөнитө телефон. Рассыхаев грөгмунө. Босьтө трубка.)* Алло! Рассыхаев кывзө!.. Бур рыт, төварыш секретар. Уджалам, зілям мый вынысь!.. Да, пөртам оломө!.. Мыйла омөля? Йөв сетам, заём нуөдам, кулачитам, «Коми танк» вылө деньга торйөдім, «Римскөй папалы вочакыв» фондас и... Омөля?!. Ставсө төданныд?! Ылөдлөны, төварыш секретар... *(Кост.)* Кулак агентъяс ылөдлөны! Провокация вөчөны!.. *(Кост.)* Кывза!.. Чистка лоас?!

Партия шленгясös и?! И менö тшöтш?.. (Бокö.) Вештасны, чергö-
дасны нем жалиттöг. Водзвыв юöрта! (Трубкаö.) Тöварыш секре-
тар, татөн миян виччысьтöм ситуация лöма — воссис саботаж!..
Да, вредительство! Корам отсöг, асьным огö вермöй. (Тупкö
трубкасö ки пыдöснас. Шуö бокö.) Ньöти оз кыв. (Горöдö труб-
каас.) Коді?! (Кост.) Мирон, мися!.. Овыс?! Холмогорса сійö!
Холмогоров гижöй дай!.. Хол-мо-го-ров!.. Да-да, Мирон Холмого-
ров!.. (Кост.) Гөгөрвои! Öкöверт! Аддзысьлытöдз!.. (Пуктö труб-
касö, косöдö пöсялöм плешсö, ышловзö, кыйкнитö Сталинлөн
портрет вылö. Шняпкысьö улös вылö, гусьөн пернапасасьö.)

Коймöд серпас

Гожся вой. Чöv-лөнъ. Лысваасьöм ытшкöм видз. Гөгөр турун юрьяс,
рас, кузь кыр. Уліас — руалысь Эжва. Мöдлапöлас юсянь енэжтас-
öдз — сук вөр.

Мыччысьöны Латышев да Тася, сувтöны турун юр дорö.

ЛАТЫШЕВ. Вай тані пукыштам.

ТАСЯ. Вай. (Пуксьöны юр вылö.)

ЛАТЫШЕВ (турун няклялігмоз). Тася, а коді нö гидад баксö
вöлі?

ТАСЯ. Мирон... Аддзылін, кутшöм ыджыд?!

ЛАТЫШЕВ. Эг на. (Пуксьö).

ТАСЯ. Дедö ньöбліс куканьöн на. А öні кутшöм мича лоис!

ЛАТЫШЕВ. Он пов?! Люкыштас кө?!

ТАСЯ. Менö тöдö. Оз люкышт. Зэв раминик да вежöра.
Ставсö гөгөрвоö...

ЛАТЫШЕВ. Мыйла нö йöрас олö, ли онö лэдзлöй?

ТАСЯ. Лöддзысь полö. Петалас недыр кезлö дай бөр котөрөн
локтö, сараяс дзевсьö...

ЛАТЫШЕВ. Мыйкö пö колхоз стадаö оз мун?.. Збыльысь
али мый?..

ТАСЯ. Сөрöны. Аддзылін, грездса мösъясыс кутшöм йöлаöсь?
Унджыкыс Миронушкосянь чужисны. Мукöд грездъясысь весиг-
тö мöснысö вайлöны тырсьöдны. Мукöддырйиис лун кык-куим
миянын олöны: виччысьöны, кор мöслөн окоталуныс воас, мед
бура тырсялас... Нянь-рысь вайлöны, а кодкö и сьöм сетлö, эм
кö...

ЛАТЫШЕВ. Сідзкö, тіянын — племзавод?! (Серöктö.)

ТАСЯ. Племзавод... (Нюмдö воча.) Чайтан, öшкыд куш тырсьö-
дысь?..

ЛАТЫШЕВ. А коді нö? Дерт, тырсьöдысь.

ТАСЯ. Абу-у... Ме серти, Мироныд — тайö мыйкö мöдтор...
Мыйкö этатшöм... (Лэптö синсö енэжланъ.) Ыджыдысь-ыджыд
и югыдысь-югыд, весиг висьтавны ог куж... Дедö шуö: нывбаба —
тайö му, а мужичöйыд — тайö көдзысь... Мый пö көдзас, сійö
пö и воас... Көдзас кө ёг — воас ёг. Көдзас кө нянь — воас
нянь...

ЛАТЫШЕВ. А көдзас кө кага — воас кага. (Нюммунö.)

ТАСЯ. Кага сöмын чужö, а мый воас — Енмыс тöдö...

ЛАТЫШЕВ (шöпкөмөн). Тасюк?..

ТАСЯ (шöпкөмөн жö). Мый?..

ЛАТЫШЕВ. Радейта...

ТАСЯ. И ме... *(Сывъясъёны-окасьёны.)*

Көнкө муртса кывмөн нюркнитö ныв сьылём.

**Эжва саяс... кыа петö...
Кыа петö... войсö летö...
Войсö летö... дöра востö...
Дöра востö... нывсö бостö...
муса зон...**

ЛАТЫШЕВ. Тасюк, öнтай дедыд висьталіс, тэ пö дзолядыр-сянныд батыдкöд вöрын олöмыд? Збыльысь öмöй?!

ТАСЯ. Да, олі... Важөн и дедö, и батьö ёна вöралісны. Öнi ме öтнам ветлывла лэч туйöд. Кык вөр керка миян эм: öтикыс матын, а мöдыс ылын, ёль бокö пуктöма. Гөгöрыс нюр, паськыд, а нюр шöрас, кос мыльк ылын, пожöма ягтор. Местаыс мича, озыр. Пув-турипув гырысь воö, сэтысь и вайывла век...

ЛАТЫШЕВ. Кымын лунöн кытшовтан?

ТАСЯ. Кык лунöн воа, кык-ö-куим лун сэні ола, сэсся бөр локта лун кык...

ЛАТЫШЕВ. Дыр. Он пов?

ТАСЯ. Ог. Вöрад вöля.

ЛАТЫШЕВ. Арнас кыкөн ветлам? Велöдыштан көть вöрса олöмас... Ме öд кар кындзи немтор ог тöд. Квайт арöсөн аптекаö бать-мамöй сетісны. Сэн слуга пыдди олі, сэсся öти врач ас ордас бостіс: зэв пö тölка зонкаыс, велöдны пö колö...

ТАСЯ. Аптекарыд лэдзис?

ЛАТЫШЕВ. Вöтліс!.. Вузасьны пö он сяммы, растрата вöчин... А врачыс, Яков Михалыч, прамöй морт вölöма. Школаö сетіс. Луннас велöдча вöлі, а рытнас отсая гортас: пачьяс ломта, ид-рася, тöвъяснас лым весала... Сэсся пельшөр курсъяс помалі, йöзö петі... А сэсся и тэнö паныдалі. Кор тэнö первойысьсö ад-дзи — юрöс вошті... *(Окыштö паръяс.)*

ТАСЯ *(нюмбана)*. Йöюк... *(Окыштö воча.)*

ЛАТЫШЕВ *(нюмсорөн)*. Тася, вай висьтав йöюкыдлы, кодi тэнад первой жöникыд?

ТАСЯ *(чуймöмөн)*. Кутшöм жöник?

ЛАТЫШЕВ. Кодöс дедыд казъывліс.

ТАСЯ. Дедö? Сійö абу жöник, сійö ёрт, Бакур, чужöмсянныс немöй.

ЛАТЫШЕВ. Коді тай тiянсянь талун петіс, важиник руд пин-жакаыс?

ТАСЯ. Да, сійö.

ЛАТЫШЕВ. Паныдалі öнтай, тiянö мунігөн. Зэв стрöга ме былö видзöдліс.

ТАСЯ. Да, сійö крут сяма, вермас и нöйтны. Он пов?

ЛАТЫШЕВ. Ме?... *(Серöктö.)* Менö оз нöйт.

ТАСЯ. Мыйла?

ЛАТЫШЕВ. Ме ачым косясьнытö кужа... *(Сывъялö Тасяöс.)*

ТАСЯ *(стрöга)*. Вежöгтан али мый нин?

ЛАТЫШЕВ. Хö, шуан жö!.. Вежöгта!.. Ок тэ, мусукöй!.. Немöйыскöд öд ог жö кут вежöгтыны! *(Серöктö.)*

ТАСЯ (*скора*). Мый?! Немой кө — абу морт али мый?!

ЛАТЫШЕВ (*лөня*). Но, эн лөгав, прөща кора.

ТАСЯ. Сійө зэв бур!..

ЛАТЫШЕВ. Бур кө и бур...

ТАСЯ. Водзө эн сёрнит мекөд тадзитө — торйөдчам.

ЛАТЫШЕВ. Ог. Но и тэ менө гөгөрво...

ТАСЯ (*торкө*). Заводита нин.

ЛАТЫШЕВ. Мый?

ТАСЯ. Гөгөрвоны!

ЛАТЫШЕВ. Эн скöрав, мусукöй, эн дивит. Вай вунöдам.

ТАСЯ. Бакурöс некор ог вунöд, сійö — нэмöвöйся ёртöй, и пыр татшöмнас кольö.

ЛАТЫШЕВ. Мед кольö... Но висьтав либö, мыйла нэмöвöйся ёртыд вой кeжлö кытчöкö мöдiс сiмöм тазйөн да черөн? Кодöс кeравны кöсйö? А?

ТАСЯ (*мөвпалана*). Ог тöд... Сійö тешкодь... Асруа... Мыйкö думыштöма... бара... (*Нюмгылö.*)

ЛАТЫШЕВ. Бакурыс тэныд кажитчö?

ТАСЯ. Ог тöд... Дeдöлы кажитчö... Пыр тшöктö сы сайö вeрöс сайö петны да.

ЛАТЫШЕВ (*чуймöмөн*). Но!.. А тэ мый?

ТАСЯ. Ме? Ме — ог кöсйы. Прöста дзoлясянь ёртасям. Зэв авъя-тöлка детина эськö, но — немöй. Первой классас кык во велöдчис, сэсся вöтлiсны школасьыс да, пастукавны мöдiс. Став съöд уджыс сылы вичмö: тöвнас вöв-мöсьяс дiнын олö, тулыснас кылöдчö. Съöкыд уджсьыс ошпи кодь лöма — ён да съöкыд вöраса, быттö тупыль. Гижны-лыддысьынысö прамöя оз куж ни. Съöмла локтас контораас, кырымпассö кабала пасьтала пуктас-нюжöдас чукыль-мукыль шыпаснас — Бакур пö. Молодеч, шуас кассирыс. Бакур плешсö косöдыштас, петас ывлаö, а сэн мужичöйяс виччысьöны нин, корöны вина юны, но Бакур оз сетчы — съöмсö мамыслы нуас. Батьыс томөн кувсьылöма. Кувсьöм водзас удитöма шуны сылы, ов пö, кыдзи Енмыс шуас; Енлысь тшöктöм-сö эн торк, омöль йöзлысь эн кывзысь, а кутасны кö крукасьны — йöй нисьö прöсужö усь дай... Кольны тэд дзик немтор: керкайö сись, мöскöй тырсявтöм — коля тэд ассым медбөрья ышловзьöмöс. Съöкыд кадад пö отсалас. Сидз тай и шуöма. Сэсся босьтас ситеч дöратор, ышловзяс сы вылö, көрталас ёкмывьö и кувсяс... Бакур пыр новлö бать ёкмывьсö сылiас, эз на разьыв. Мамыс корывлö, разьыв пö, дитяйöй, дзик няньтöг олам, — а мöдыс оз сет, съöкыд кадыс пö эз на во.

ЛАТЫШЕВ. Кадыс эз во? (*Думыштчö.*) Со мый... Кутшöм кад нö виччысьö?..

ТАСЯ. Ог тöд.

ЛАТЫШЕВ. Шуан, ёрт?..

ТАСЯ. Ёрт. Но, чайта, мый радейтö.

ЛАТЫШЕВ. Радейтö?!

ТАСЯ. Пыр отсасьö да. Тулыснас кылöдчигөн, кор менö сэнi мырдөн уджöдлiсны кулак нылöс моз, пыр отсалiс нормаöс вöчны, и бокöвöй мужикьясысь дорйывлiс, кор найö быдяма лөк сёрнинаныс ме дорö везьясьлiсны. Весиг косясис найяскöд.

ЛАТЫШЕВ. А найö мый?

ТАСЯ. Гөгөрвоисны, мый өбидао оз сет: кувсяс, но оз сет. Сэсся өвсисны... Вай чөв куйлыштам.

ЛАТЫШЕВ. Вай.

Водоны, видзодоны енэжө. Недыр мысти Латышев ланьтө, заводитө шкоргыны. Кост. Кост дырйи Тася гораа мөвпалө.

ТАСЯ (*пуксьө*). Но, ланьтис тай. Паныдасьлоны на вольной светас Бакур сяма мужичойяс, кодыас гусьон радейтоны, но некыз оз петкодлыны муслуннысө. Да ода нывбабалы ена петкодлынысө сийос оз и ков — ми кызкө асьным ставсө гөгөрвоам. Гөгөрвоам эськө, но воча — кыв ни джын! Обичаным сэтшом ли мый ли? Тшапитчам, мый миянос радейтоны, нырнымос лэп-талам: со по ми кутшом мичаось да мусаось — пыр тай мөвпалам ромпоштан весьтын бергалигмоз...

Помнита, гося мича асыв вөли. Ме садьми шонди петтодз: бать-мамтог олигон велавсьома чеччыны асывводз. Грездад ода мод ногон оз позы, став овмосыс куш ме вылын и. Дедо отсасьло эськө, но они энджыка сёрнинас нин: велодо овны-вывнысө.

Садьми сэки, восьти синмос и дзоргодчи потолокас, шудаа нюмдышти, чеччи, платтьоаси и петі ывлао. Мича асыв меліа сывьяліс менө. Лэчи Эхва дорө, шыбиті рышкыд лыа выло платтьоос да бузгыси лонь ваас.

Порччусиг-котортігкості весиг эг казаяв, мый пушкыр бадь саяс вөлом вуграсьө Бакур, и сомьин кывлі вутыр шательысь вао усян шысө.

А кор адзис менө — дзик пасьтомос, еджыд вир-яяос, гогрөс нөняос, шылыд бекъяос, ена жө, конкө, сьоломыс ёкмунис... Ваысь петігон кыйкнитлі гусьоник Бакур выло: сийө первойсө дзоргодчыліс ме выло синсө былөдомон, а сэсся одайө бергодчис модарө, мед садьсө не воштыны мичсьым... Ме одайө пасьтаси и мододчи гортө... Горт дорын нин менө вөтодіс Бакур, сюйис киам ыджыд едіос да пышйис. А ме, вильыд козинсө кутіг, мыйкөдыра сулалі вөрзьевтог и видзөді Бакур выло бөрсяныыс... И сэтшом шуда ме вөлі сийө здукас и оттшотш нор... Мыйла таdzi?..

Кост.

Югзыштө. Петө кыа. Сьылоны лэбачьяс. Кылоны пон увтчөм да мос баксом шыяс...

Турун юр дорө сувтө кык вөла додь; сэні пукалоны портупея-кобураа офицер да винтовкаа вит салдат. Офицер чеччө, матыстчө ныла-зонма дорө, кучкыштө бедьнас Латышевы кокас. Мөдыс садьмө.

ОФИЦЕР. Висьталой, том йөз, кон Рассыхаевыс оло?!

ЛАТЫШЕВ (*пуксьө, чышкало чужомас ласом турунсө, овтыш-тө кинас грездлань*). Сэн, вичко саяс коймод керкаысь юалой!..

ОФИЦЕР. Но-но, бур... (*Чечыштө додь выло.*)

Додьяс муноны.

ЛАТЫШЕВ (*аслыс*). Мыйла Рассыхаевыс налы ковмис? Мыйкө тані абу лючки-ладно... (*Тасялы.*) Кодөскө бара кулачитны локтисны-а... Тіян ода сомьин ош?..

ТАСЯ. Да... *(Кост бёрын чорыга.)* А мый нё юасян?..
ЛАТЫШЕВ *(лөня)*. Сідз прёста вомысь усис... Кулачитны, мися, воисны да... *(Очсыттө.)*
ТАСЯ. Усис, шуан?! *(Скөрмө.)*
ЛАТЫШЕВ. Код тёдас, гашкө, тиянө локтисны да?
ТАСЯ *(чеччө)*. Асьным олам, некодөс огө вөрөдөй!
ЛАТЫШЕВ. Ме ог жө мыжав.
ТАСЯ *(стрөга)*. А мыйла скөт йывсьыс юасян?! Миянөс кулакъясөн өмөй лыддян?! А?!
ЛАТЫШЕВ *(чеччө жө)*. Ог жө! *(Сывъялө.)*
ТАСЯ. Ноко-о! *(Мездысьө)*. Висьтав! Колхозас кө огө пырөй, сідзкө, ми врагъяс?! Сідз артмө?! Тешитчан ме вылын?! Нарошнө ылөдлін?!
ЛАТЫШЕВ. Кулачка, подкулачка,— мем веськодь! Радейта — дай ставыс!..
ТАСЯ. Эн матыстчы, веськодь кө! *(Бергөдчө мөгарө.)*
ЛАТЫШЕВ *(матыстчө, көсйө сывъявны)*. Тасюк...
ТАСЯ *(бергөдчө сылань, мый вынысь швачкө ки пыгөснас сылы бан бокө)*. Со тэд кулачкасьыд! *(Швачкө мөдысь.)* На!..
ЛАТЫШЕВ *(кутчысьө бангзибас)*. Йөймин? Тэ дорысь некод донаджыкыс абу! Тасюк нө?..
ТАСЯ *(кватитө юрбергса кыз майөг. Ыршасяна)*. Эн матыстчы, мися!!! Мун син водзысь, кытчөдз эг лөсышт! *(Воськовтө Латышевлань.)*
ЛАТЫШЕВ *(аслыс, чуймөмөн)*. Дзик йөймис бабаыд... *(Тасялы, кевмөмөн.)* Радейта өд!..
ТАСЯ. Эн сөр! Ме тэд абу пөв! *(Эргөмөн.)* Мун-н, мися-а... *(Кучкө майөгнас. Латышев удитө чеччыштны пельвыв. Майөг помыс инмө муө. Тася бара лэптө майөгсө.)* Мун-н-н!..

Латышев бёрынтьчөмөн мунө. Тася уськөдө майөгсө, пуксьө юр вылас, пөрө, курыда бөрддзө... Латышев сувтлө здук кежлө, ылысянь коньбөра видзөдө Тася ылө, сэсся бергөдчө, сьөкыда мунө.

МӨД ЮКӨН

Медводдза серпас

Асывводз. Ёнись керкаын жыр. Крөвать. Ёнись Рассыхаевкөд узыёны. Кодкө тотшкөдчө өшиняс. Ёнджыка тотшкөдчө. Рассыхаев броткөмпырысь тупыльтө узысь Ёнисьөс боквыв, чеччө, восьтө занавес,— и повзё...

РАССЫХАЕВ *(чуймөмөн)*. Локтөмныд нин?.. Но, пырөй, пырөй... Ақ, гачтөм на... Ёнись! Көн нө гачыс?! Кытчө шыбитін?! Чеччы вай! Мый сэн узян! Карса йөз локтөмаөсь, со тай... А ми век на узям... *(Аггзө гачсө, гачасьө... Ёнисылы.)* Пасьтась! *(Шыбитө сылы платтьөсө, петө.)*

Ёнись тэрыба пасьтасьө. Пырөны офицер да салдатъяс: зумыш, бриттөм чужөмаөсь.

РАССЫХАЕВ. Пырөй, прөйдитөй пызан сайө, шойччөй... *(Ёнисылы.)* Вай тэрыба, мый эм. Дона гөсьгьястө чөсмөдны колө.

Өнись перйö пачысь чугун рок, пуктö пызан шөрö. Вайö паньяс, шөр-
ралö нянь, кисьталö кружкаясö йöv.

РАССЫХАЕВ (Өнисьлы). Йövнад он жö юктöд, самöкуртö перйы!

Өнись вайö ыджыд сулея самöкур. Салдатъяс радлöны, варгöмпырысь
кистьалöны; юöны; панялöны рок.

ОФИЦЕР (Рассыхаевлы). Шуан, кулакъяс падмöдöны?

РАССЫХАЕВ. Да...

ОФИЦЕР. Бырöдам!.. (Жергöдчö. Салгатъяс тиöтш.)

РАССЫХАЕВ. Юй-сёйöй первой, кузь туй бöрын... Чайта, татшöм уджнад ёна мудзанныд?..

ОФИЦЕР (гимнастёрка кизь разялг). Вит лун вөрöд шöйтим, пышйöм кулакъяссö корсим....

РАССЫХАЕВ. Сюрисны?

ОФИЦЕР. Месянь некод на эз пышйыв. Öти вөр керкаысь сюрисны, став чукöрнас.

РАССЫХАЕВ. Арестуйтінныд?

ОФИЦЕР. Эгö, сэн лыйлим. (Жергöдчö.)

РАССЫХАЕВ. Судтöг?! (Повзьö.) Кыдз нö? (Чышкалö плешсö.)

ОФИЦЕР. Ми асьным суд да прокурор... (Салгатъяслы.) Дай адвöкат на! (Салгатъяс серöктöны. Рассыхаев тiралысь кинас пöрöдö вомас самöкур.)

РАССЫХАЕВ (офицерлы). Тöдан мый? Позьö оз кулактö арестуйтöм водзын чукöртны мыйкö дзoля митинг сям, йöзöс повзьöдлыштны?..

ОФИЦЕР (веськыда вигзöдö Рассыхаев вылö.) А-а, гөгөрвоа... Оз кывзысьны?..

РАССЫХАЕВ (майшасиг). Быдсямаыс овлö... (Гыжъялö бая-бöжсö.)

ОФИЦЕР. Чукöрт! Мед тöдöны, мый сöвет власът некодöс оз жалит!..

РАССЫХАЕВ (Өнисьлы). Мун юöрт, мед чукöртчöны Савöяс дiнö. Да кöть эн висьтав, мыйла кора!

ӨНИСЬ. Абу öд йöй!

РАССЫХАЕВ (кистьалö самöкур коляссö). Тайöс помалöй нин...

Юöны.

ОФИЦЕР (салгатъяслы, öшиньö вигзöдгiмоз.) Но, ёртъяс, муна-мö, кытчöдз кулакыд эз пышйы, бабаыд ёна жö ыззис!.. Со кыдзи туй кузяыс тövзьö!.. Бусйö, ядрёна вош!.. (Салгатъяс кыв шутöг петöны...)

РАССЫХАЕВ (офицерлы гусьön). Воанныд да, эн чуймав... Мироныд, кодла локтінныд... сюра!..

ОФИЦЕР (Рассыхаевлы пельпомас клопкөмөн нюммуно). Сюра кöть гöна, мем веськодь! Приказ серти олам!.. (Петö салгатъяс-кöд керкаысь.)

Мёд серпас

Асыв. Савё керка дорын уна йёз. Вёськыдвылас — винтовкаа салдатъяс, офицер, Рассыхаев. Шуйгавылас — грездаяс: на пёвстын — бед-
дя Савё да Латышев.

Туй кузя локтё Тася турун тыра мешёкөн; чуймаліг кыйкъялө гөгөрыс.

РАССЫХАЕВ (*горалё*). Ёртъяс! Ме чукөрті тиянөс со мыйла! Ті тёданныд, мый страна пасьтала вёсьлалё сплошнөй коллективизация! Став сознательнөй йёз пыртёны олөмас партия да правительство шуөмсö! Народнөй бать, меградейтана ёрт, товaрыш Сталин нуөдö мянөс югыд коммунизмö! Но эмöсь на лёк войтыр, коді падмөдö, кыз шуласны, гаг моз писькөдчö уджач йёз сьөлөмö, мед гусьөн пежавны Гөрд пролетариат да колхоз крестьяналысь бур олөмö водзмөстчөмсö! Энö шогсьöй, дона ёртъяс! Гөрд ОГПУ-са писькөс ки судзөдас гуся врагъясöс быдлаысь! Некод оз мын социалистическөй правосудиеысь! Кулакъяслы паныд пуктам асьнымöс ударникъясөн!..

ОФИЦЕР (*Рассыхаевлы*). Дженьыдджыка висьтась, абу Троцкөй!

РАССЫХАЕВ. Миян колхозö, кыз төдмалім дзик неважөн, вужъясьма саботажник, колхоз оласног торкалысь мо-о... (*Дзоля кост.*) Кулацкөй элемент!

Йёз гызьö.

РАССЫХАЕВ. Да, саботажник! И сійö ті пөвстаныд!

ЙОЗ. Ылөдлө!.. Коді?.. Мый нимыс?..

РАССЫХАЕВ. Мирон Холмогоров!

ЙОЗ. Холмогоров?.. Абу татшөмыс!.. Абу!.. Ылөдлө!..

РАССЫХАЕВ. Со! (*Ингö йөрас. Офицер перйö зепсыс кабала.*)

ЙОЗ. Но өд сійö!..

ОФИЦЕР (*торкө, лыгдьö*). Кывзöй приказ!.. «...Саботажникöс да вражескөй элементöс — Мирон Холмогоровöс — арестуйтны да йөртны юркаrsa дзескыдинö! Кывзысьтөмысь либö пышйөмысь лыйлыны нач!..» (*Йöзлы.*) Гөгөрвоинныд?..

ЙОЗ. Но өд сійö абу морт, сійö öш!.. Пемöс!.. Товaрыш офицер!..

ОФИЦЕР. Чөв!!! Приказ эм приказ!!! (*Салдатъяслы.*) Марш!!! Арестуйтöй саботажникöс!!!

Салдатъяс уськөдчöны йөрö.

МИРОН (*скөра равөстö*). Ö-ö-ö-ö-ö!!! Ö-ö-ö-ö-ö-ö-ö!!! (*Люкыштö кодöскö. Кылö матькөм сора горзөм.*)

Салдатъяс повзьöны, петöны йөрысь. Йөрыс шатласьö. Кылö пу чегъялөм шы. Офицер командуйтö салдатъяслы лыйны öшкөс. Салдатъяс метитчöны. Офицер кыпөдö кисö. Мирон скөра равөстö: «Ö-ö-ö!..»

ТАСЯ. Миронушко, дзоля тусюкөй!.. (*Уськөдчö Мирон гинö, кисö паськөдөмөн сувтö салдатъяслы паныд, кевмö*). Криста ради, энö лыйö!..

ОФИЦЕР (*салдатъяслы*). Вештöй нывкасö кытчөкө бокö!..

(Кык салгат мыргөн кыскёны нылёс, кутёны киёдыс. Офицер бара лэптё кисё.) Пли!!!

Лыйёны.

МИРОН (горёдчө кузя и нора). Ö-ö-ö-ö-ö... (Кулө.)

Тася воштё садьсё. Савё уськөдчө сылань. Латышев зырөдө офицер вылө, кучкө ныр-вомас.

ОФИЦЕР. А-а-а!... (Усьё.)

Латышев нөйтө офицерёс, салдатъяс уськөдчёны Латышев вылө — мөдыс оз сетчы, пөрөдөны муас, нөйтёны, чужьялөны, кучкёны прикладөн. Савё уськөдчө отсөг вылө, кучкө кутшөмкө салдатёс бедьнас — мөдыс бергөдчө да мый вынсьыс зургө прикладнас дедлы морёсас, Савё садьтөг усьё. Офицер сувтө, чышкалө соснас вирёсь ныр-вомсө, чужйө Латышевёс. Мөдыс оз вөр. Йөз гызьё, салдатъяс винтовкананыс йоткалөны найёс чукөрө, офицер лыйё наганьсыс енэжө. Йөз лөньё.

ОФИЦЕР (Савёлань вигзөдлөмөн). Со и коймөд контра шедіс... (Веськөдө нагансө йөз вылө. Скөра.) Но, нөшта дорйысысыс эм абу?.. (Йөзыс чөв олө.) Разөдчөй гортаныд!

Йөз разөдчө.

ОФИЦЕР (салдатъяслы Латышев да Савё вылө индөмөн). Тайясөс шыбитөй доддьё да бурджыка көрталөй!..

Салдатъяс кыскёны первой Латышевёс, сэсся Савё дедёс. Офицер Рассыхаевкөд матыстчөны садьтөм Тася дінө. Рассыхаев мыйкө шуалө офицерыслы Тася вылө индалөмөн. Мөдыс доккнитө юрнас, өвтшыс кинас,— и найө мунёны. Сцена вылын кольё куйлысь Тася.

Пемдылө.

Керка саяс кылө яй кералөм шы... Горалө Öнисьлөн вөсни гөлөсыс.

ÖНИСЬ. Мем небыдджыкөс керыштөй, мед лытөгыс вөлі!..

Кылө яй керыштөм шы... Керка сайысь мыччысьё Öнись — кузь еджыд дөрөма, көмтөм; кияс — вирёсь тубрас. Петө туй вылө, мунө... Бара кылө яй керыштөм шы — керка сайысь тыдовтчө татшөм жө паськөма морт кияс вирёсь тубрасөн и сідз жө мунө туй кузя. Татшөм ногөн туй кузя прөйдитө уна морт. Медбөрын петө Тася, мездорас кутө яй; ачыс — еджыд кузь дөрөма, юрсиыс идравтөм, чужёмыс блед — шатласиг локтө сцена шөрөдз. Сувтө. Коньёра видзөдө залө; лэптыштлө яйсө, быттьөкө кодлыкө мыччөдлө... Кусө би. Пыр гораммө и гораммө яй кералан шыыс...

Югзьё. Сцена шөрас — куйлысь Тася.

Тася воё саяс. Чеччө. Аддзё: йөрыс жуғлөма, пөртгыс пөрөдөма, керка стенис льякөсьтөма вирөн.

ТАСЯ (коньёра корө gedсө). Дедө!.. Дедө!..

Шөйтыштө йөрөдыс, шатласиг пырө гортас, воөдчө кроватьөдз, усьё

и бөрәдзё... Регыд мысти тыдовтчö код Рассыхаев. Юкмöс дорын юö сулея помсыыс самöкур, шыбитö тыртöм дозсö, пырö керкаас.

РАССЫХАЕВ (*порог увсянь, шаньпырысь*). Тася, оломтö бөр он бергöд... Öнi тэ народлөн враг. Тэнад местаыд дзескыдiнын. Но ме верма тэд отсавны, дай отсалi нин — кори кольны грездö. Мися, йöй нывкаыд, том, оз гөгөрво классöвöй тышсö. Мед, мися, татчö кольччö.

Тася чеччö крöвать вывсыс, сувтö жыр шöрас — чужöмыс блед, пыкталöм, зывöктöмөн дзоргöдчö председатель вылö.

РАССЫХАЕВ. Тася, кутан кö кывзысьны менсьым — медбура пондан овны... Ме тэ дорö бурөн локтi... Савö кувсис, а Латышев тюрмасыыс öдвакö петас, сiдзкö думайт, кодкöд овны кутан...

Рассыхаев другысь горша кутö Тасяöс да пöрöдö крöвать вылас, то-пöдö сьöккыд тушанас. Вöсни ситеч платтьöйс трачмунö ныв морöс вылын. Тася мый вынсыыс парсасьö да нöйтчö, но регыд слабмö. И друг ки улас веськалö стенас öшалысь часiлөн гираыс. Тася нетшыштö гирасö да кучкö Рассыхаевлы пель бокас... Рассыхаев акнитö, воштö садсö. Тася мездысьö лигышмунöм туша увсыс, чеччö.

ТАСЯ. Вии!!! О Енмöй, мый нö вöчны?.. Пышйыны?.. Но кытчö?! Вöрö? Карö? Кутшöмкö сиктö? Либö татчö кольччыны?.. Арестуйтасны! Ог сетчы, вöрö пышгья!.. (*Тэрыба сөвтö нопгьяс сов, шыдöс, кутшöмсюрö көлуй, пасьтасьö, босьтö пищаль и петö.*)

Коймöд серпас

Ракапашня. Пу вылын лабаз. Весътас таз öшалö. Лабазын куйлö Бакур.

БАКУР (*гораа мөвпалö*). Ме ог радейт шондiа лунгьяссö. Сэки вөр-валөн югыд рöма мичыс озыра петкöдчö оз меным, а куш шуда йöзлы. Мича лун дырйи ме вися и пыр корся вуджöра лөнъ места, мед кызкö коллявны лёк лунсö. И пета сэсса дзебсянiнысь сöмын шондi пуксьöм бöрын. А вот зэра поводдья ловзыыла! Сэки ловтырөн кывза зэрлысь, тöвлысь да мукöд «ёртлысь» муса шыяссö. Майбыр, сэктясьö шуда йöз дзебсясьöны, да некод оз падмöд овны вöляысь. Сöмын сэки кыла ачымöс збыль мортөн. Дерт, нывгьяс радейтöны варовджыктясьсö, кодi кужö сөрны... Йöзыс сёрнитöны öтув кывйөн, да мыйлакö тшöкыда оз гөгөрвоны мöда-мöднысö. И сöмын радейтигөн пыр жö воöны öти кывйö дзик сёрниттöг, думгьяс пыр... Сiдз жö и пемöс, и лэбач, и турун, и пу — гөгөрвоöны менö, и ме кыла налысь сёрнисö... Мөвпавны кокни и лöсьыд. Ме велалi юксыны гуса мөвпгьясөн вөр-вакöд.

Вөр-васö кыздзи ме радейта ангьясöс, весиг кыпыдала. Коркö важөн нин, öти тöвса рытпук дырйи, смелмöдчи корны Тасяöс йöктыны. Йöй!.. Шуйга киөн коскöдыс кутi, веськыднас — сылысь кисö да заводитi тапгьявны вальс Тасялы кок вылас тальчыны полöмөн... Ыджыдысь-ыджыд шуд волiс сэки. Муса чужöмыс вöлi вывтi матын, мича синмыс да; небыдик, муртса кудрит-

чөм юрсиыс корсюрё гильёддывліс пельёс; сэтчө жö сорласис сьёлөмшөрлөн аслыспөлөс чөскыд дукуыс,— и менам садьёй гу- дыртчис... Лёк лои... Абу лөсьыд... и яндзим... Думыштi, мися, Тася вермас казавны этатшөмтортö, да сэссия нывъясыскöд менö серам вылö лэптасны!..

И ме пышйи.

Мый сэки керсис менам лов пытшкын!.. Кыдзи висьтавыны аслам радейтөм йылысь? Мый вочавидзас Тася? Другысь мустөм- тас?! А збыльысь кө? Радейтö кө? Сэки мый?! Гашкө, сорси?.. Гашкө, тайö абу муслун, а мыйкө мөдтор?.. Ылөдлөма кө лоö, Тася нэм кежлö лоас шудтөм? И ме лоа мыжа, и кута мыжавны ачымөс нэм чөж?.. «Грекыд, грекыд кутшөм!..»— думайтi ме төвся пемыд ывлаын. И кори войыслысь, сёрниттөм ёртлысь, юалөмъяс вылö вочакывъяс...

Бакур пуксьö, лэптö кыз паличсö, мед кучкыны-грымöбтыны тазйö, но аддзö анькытш сёйысь мортöс.

БАКУР (*аслыс*). Гусясысь?! Энлы!..

Бакур лэччö муö, дзебсясьомөн, гусьöник матыстчö... Мөдыс оз казав, няклялö анькытш. Бакур төв ныр моз чеччыштö морт вылö мышсяныыс, пөрөдö-швачкö муö, бергөдö мышнас мулань. Төдмалö Тасяөс, яра окалö паръяс. А сэссия кытчö судзö. Другысь дугдö. Лэптыштö юрсö, видзöдö чужомас. Тася оз вөр — пыр кын шой моз куйлö. Бакурлы забеднö лоö, йөткыштчö бокö, пуксьö орччөн, öшөдö юрсö.

Дзоля кост.

ТАСЯ (*другысь кальöба серöктö: первой муртса, а сэссия пыр ёнджыка и ёнджыка*). Ой, талун коймөд жöник окалö!.. (*Дыр сералö, а сэссия бөррдзö. Бакур топöдö нылөс ас бердас, мелiа чышкалö синвасö.*)

Тася лөньö.

ТАСЯ (*синвасö косöдигмозыс*). Эн дивит, мем дзебсьыны колö. Ме талун мортöс вии... Некодлы эн висьтав, кытчö муна...

Тася сувтö. Бакур сувтö жö, колльöдö нылөс вөрөдз, кутыштö киöдыс, босьтö сьылісьыс ёкмыльсö, мыччö Тасялы. Ымзөмпырысь, кинас пет- көдлөмөн гөгөрвоөдö, мый сэн. Бур пö, отсалас! Сэссия индö лабазлань- ыс,— воы пö коркö! Тася нюмдö, öшөдö ёкмыльсö сьыліас, пырö вөрö. Бакур сулалö вөр туй вылас и гажтөма видзöдö ылыстчысь ныв бөрсянь.

БАКУР (*гораа мөвпалö*). Мыйла ылыстчөм морт поснялö, чинö? Ичөтдырйи меным батьö мойдліс: коркö важөн оліс-выліс сиктын эз озыр ни эз голь Ингулеч зон. Оліс бура, но öдйö дөзмис лөнь оломсьыс да шуис мунны кытчөкö шуд корсьны. Көсья пö мөд пөлөс олом төдмавыны, став мусö кытшовтны. Но кыдзи? Вөрті мунны — вөрпа сёяс либö лешак ылөдлас, а лэбавны оз куж. «Э-э-э, тешкодь морт!»— шуалöны сиктсаясыс, а Ингулеч некоддысь оз кывзы, некодкөд оз сёрнит: ветлөдлö öтарö-мөдарö дундук моз төлысь, мөд, коймөд, сэссия дзикөдз воши. «Э-э-э,— бара шуалöны йөз,— йөй нисьö прөсужыд вошис... Караул! Ка- раул!..» Корсисны вöрысь, вадорысь, нюрысь — некөн абу. А

Ингулечыд сэккості зэв ылö мунöма нин да медджуджыд из ылö кавшасьö, и кайигас пыр поснялö и поснялö. Регыд чут кодь лои. Пуксис гöра йылас, виччысьö мыйкö, кымөръяссö кыйöдö, кызди найö сылы кокас ниртчöны. А кымөръясыс посныдикöсь, кысульяс кодьöсь. Друг аддзö — ыджыд кымөр локтö. Крукасис изъяс кымöрыс, джөмдыліс здук кежлö. Ингулечыд дыр эз думайт — кыз тай чеччыштас кымөр ылö и вöйны мöдас. Ки-коксö паськöдас и дугдас вöйны, сэсса кок йылас сувтас, талялыштас гөгöрыс, мыйкö поз кодь лайков керас. «Кутö! Топалис тай! Южмис!..» — шуалö, сэсса босьтас пурт да кутас кымöрсö вундавны, мед чом вöчны. Дзодзөгъяс вöлі лэбöны да ёна жö чуймаласны-дивуйтчасны кымөр ылас овмöдчөм морт ылö.

Батьö шуліс, гашкö пö, öнöдз на Ингулечыс лэбалö, но мый ылыстчөм морт поснялö — тайö дзик збыль. Öд овлö, мый кадöн ылыстчөм, поснялөм морттö он нин казаяв, весиг матыстчас кö бөр. А зурасян кö ськöд, и сэки он казаяв — матькыштан да водзö мунан, быттö тайö эз морт вöв, а кутшөмкö вутш либö мыртор. Ми öд асьнымöс пыр ыдждöдам енэжöдз, а йöзöс поснөдам чутöдз. Тадзикöн и олам, тшапитчам...

Пемдылö.

Аръядор. Тася петö вöрысь. Бакур шыбитö му ылö ноп, лэччö лабазсыс, котöртö паныд, мыкталö, мыйкö петкöдлö кинас. Тася сувтö.

ТАСЯ. Мый шуан?.. Коді?.. Рассыхаев?..

Бакур довкйöдлö юрнас.

ТАСЯ. Рассыхаевыд ловъя?!

Бакур бара довкйöдлö юрнас.

ТАСЯ *(нимкодя)*. Слабог...

Бакур петкöдлö мыйкö кинас, карлань индалөмөн.

ТАСЯ. Мый? Нуисны карö? Больничаö?.. Эз?.. Арестуйтисны?.. *(Аслыс.)* Арестуйтисны... *(Бакурлы.)* Юрыс көрталöма?.. Пищаль костын нуöмаöсь?.. Мыйысь?.. Он тöд?.. Он... Нöшта мый? Ог гөгөрво... Виль председатель?.. *(Аслыс, ышловзьöмөн.)* Виль председатель... *(Бакурлы.)* Коді нö?..

Бакур дыр петкöдлö кинас, и Тася гөгөрвоö. Бакур гогйöдлö юрнас, чургöдлö ыджыд чуньсö; петкöдлö ас ылас, индö карлань, вöчö вом дорнас мотор шы, кинас бергöдлö руль.

ТАСЯ. Ыстö велöдчыны трактористад?..

Бакур довквöчö юрнас, индö Тася ылö.

ТАСЯ. И менö тшöтш?.. *(Серөктö.)* Корö локны бөр грездö?.. Оз арестуйт?.. Дорйö?.. *(Эскытöг.)* Ог тө-öд...

Бакур босьтö нылöс кидыс и кыскö грездлань. Тася оз сетчы. Бакур бара кыскö, петкөдлö чунькытшалом, индö ас вылас.

ТАСЯ. Верöс сайö коран?..

Бакур доvkйöдлö юрнас, кыскö нылöс кидыс. Тася бергöдлö юрнас, гажтöма нюмдö, мынтöдö кисö, ректö Бакур нопйысь кос яй, нянь-сов, сөвтö аслас нопйö, прöщайтчö.

ТАСЯ (*тешитчигмоз*). Аттьö, бур морт. Тэ медся бурыс. Вай окышта. (*Окыштö ворсöгчöмөн.*)

Бакур топöдö нылöс морöс бердас. Тася мынтöдчö, малыштö Бакурöс морöсöдыс, йоткыштö, нора нюмъёвтö и мунö. Бакур сулыштö, кайö поэяс и мый вынсьыс нöшалö тазсö, кытчöдз гезйыс оз ор.

Нельöд серпас

Ар. Вöрын. Тася пукалö бипур дорын, вундалö куштöм пöткаöс, пунктö пуны.

ТАСЯ (*аслыс*). Со и ар пуксьö. Кор вижöдö. Регыд төв. Но нинöм. Эн пов. Регыд гортö мöдöдчам. Öтнам кө вöлі — татчö кольччи, но öд тэныд, гашкö, врач ковмас. Ме öд вайсьыны ог на куж. Тэ менам медводдза. Кылан, пиук? (*Малыштö кынöмсö.*) Али нылук? Ме чайта, пиук. Чужан, быдман ён да мича. И кутасны тэнö шуны Лаврентий Павловичөн, а ме кута шуны Ларукөн. Кажитчö оз? Ларукөн кө?.. Мем тай кажитчö... Кылан?.. Кылан, дерт. И батытö жаль, и Бакурöс жаль жö, вывтi шань мортыс да. Пыр отсасьö. Татшöм верöскöд поэьö бура овны... А мый? Корасяс кө — пета сы сайö дай! Бать пыдди лоас. Кылан, Ларук? Бать пыдди, мися... Тешкодь Бакурыс. Ассьыс ёкмыльсö козыналіс, со... (*Петкөдлö ёкмыльсö.*) Грездас сералöны: ёкмыляс пö батыслөн медбөръя ышловзьöмыс. Батыс кувсигас сетöма, сьöкыд кадö пö отсалас. А Бакур мем сетіс. Сідзкö, радейтö менö. Тöждысьö. И, тыдалö, ёкмыльыд отсалö, öнöдз кө ловъяöсь ми, пиукöй. Кылан? Регыд грездö лэччам. Вичкоö пыралам дедöс казытыштны. Вичко бöрад öд тöдан кутшöм лöсьыд да кокни сьölöм вылад! О-о, лэбавны көсьян?! Менам öнi татшöм жö руй. Дедö кувсис, Латышев тюрмаын, а мем кокни. Эскыссьö, мый водзын олöмным бур лоö... Мый, мамтö мудзин кывзыны? Мудзин кө — водам узыны, ме мудзи жö. Аски туйö петам. Туйыд кузь, сьöкыд, колö шойччыштны... (*Вогö бипур горö.*)

Витöд серпас

Ракапашня. Рытъявыв. Лабаза пу. Му вылас некымын кольта. Тася локтö пу дінö. Видзöдö лабаз вылö, дзоргö гөгöрбок.

ТАСЯ (*аслыс*). Некод абу... Шойччыштам. (*Нопсö и пищальсö пунктö пу улö, пуксьö орччөн. Пөрччö юр вывсьыс чышъянсö.*) Некодлы ми огö колöй, сиротинушкаяс. Весиг Бакур абу... (*Дзоргö гөгöрбок.*) Урожайсö керисны, видзны немтор. Öнi бур йöз горта-

НЫС ВЫЛЬ НЯНЬ ПӨЖАЛӨНЫ ДА ЙӨЛӨН СЕЙӨНЫ.... (Майшасьөмөн малыштө кынөмсө.) А ми со... (Кост.) Көн нө Бакур? Кытчө нө вошис?... (Чеччө. Вигзөдө гөгөрбок. Ветлөдлө.) Абу... Мый сэсса вөчны? Кытчө мунны?... (Майшасьө. Горзө.) Бакур!.. Бакур!.. Көн тэ, шань мортөй?!.. (Кост. Аслыс.) Оз кыв. Оз шыась. (Горзө ёнджыка.) Бакур!.. Бакур!.. (Кост.) Бакур нө!.. Кылан?! Бакур!.. (Аслыс.) Оз кыв... (Бара горөдчө.) Бакур, босыт верөс сайө! Пета!.. (Кост. Горөдчө дөзмөмпырысь, надеятөг.) Босыт нин, мися... верөс сайө!.. Пета!.. (Гор джыннас.) Пета, мися... (Аслыс.) Йөй баба... Дзик йөй... Кодлы тэ колан... Öнi... (Бергөдчө, воськовтө пулань. Пуксьө. Курыда, лөня, сыркъялөмөн бөрдө. Лэптө юрсө, виглалө морөссө, перйө ёкмыльсө, вигзөдө сы вылө, разьө... Чеччө. Ёна горзө.) Бакур! Бакур!.. Бакур, бур мортөй! Босыт верөс сайө! Пета!.. (Бөрдөмпырысь.) Бакур! Пета нин, мися!.. Пета!.. (Кост.)

Раскысь тэрыба петө Бакур, сьөкыда лолалө. Тася шыбитчө паныд, өшйөдчө сьылиас, лөня бөрдө... Бакур топыда кутлө нывсө, быдсөн лэптыштө мусьыс, мыйкө мыкталө...

БАКУР. А... А... А-ася!.. А-ася!..

ТАСЯ. Бакур, тэ сёрнитан?! (Бара кутлысьөны.)

БАКУР (шөпкө). Ася!.. Ася!..

ТАСЯ (раглө). Бур, мусукөй, бур... (Лөня бөргигмоз.) А ме... А ме... Пөръялі тэнө... Латышевкөд узи... Нөбася нин... Ме лөк... А тэ... А тэ... бур... А ме... лөк...

БАКУР (мамалө, шөпкө). Ася... Ася...

ТАСЯ. Прөща кора... Верман кө... Прөща кора... Верман... кө... (Бөргө.)

Бакур нөшта ёнджыка топөдө Тасяөс, чабыртө сылысь юрсисө, но немтор оз шу: лэптө юрсө, куньö синсө...

ПОМ.

Павел Рудольфович Черкашин — поэт, прозаик, журналист, 2003 восянь пырö Россияса гижысь котырö.

Чужлöма сійö Ямало-Ненеч кытшын, Шурышкар районса Мыжы (Мужи) сиктын 1972 воын. Тайö сиктас джын олысьыс вöлöма коми-зыряна, сэсса рочъяс да йöгра. Дзолядырсяныыс зонка тшöкыда кывлöма коми сёрни, сыланкывгъяс, ёртасьлöма-ворслывлöма коми челядькöд. Тайö жö сиктас чужлöмаöсь-быдмылöмаöсь коми фольклорист Юрий Рочев, нималана гижысь Иван Истомин, кинорежиссёр да прозаик Фёдор Конев.

Павел Рудольфович школа бöрын помалöма Тюмень карын педучилище, а сэсса татчöс университетысь филология факультет. Велöдлöма школаын, уджавлöма газет редакциясын, радиоын, мукöдлаын. Гижö кывбургъяс, висътгъяс, публицистика. Роч кыв вылö вуджöдiс коми мойдгъяс да йöзöдiс найöс торгъя книгаөн. Олö Ханты-Мансийск карын.



Павел ЧЕРКАШИН

Найда ордын

ВИСЪТ

*Сиа менам пöль-пöчлөн,
Черкашин Михаил Фёдорович
да Йулиония Клавдиевналөн,
югыд паметлы.*

Мыжыын төвъясыс кузьöсь да кöдзыдöсь. Войвыв кытш дор. Сикт саяс матын — турöбгъяс, лымйөн шебралöм да төбöм парма. Медбörгъя из колясьяс. Водзлань, Обдорлань матöджык, позьö шуны нин, тундра, кöни вочаасьлöны гежöд да ляпкыд пуяса вör дiяс. Помтöм-дортöм, сизим, а то и кöкъямыс төлысь кежлö, лымйөн вевтъöм эрд. Ньöжйöникөн, нюжъялöмөн, быттьö сус пулөн чашкöдöм вожысь сöдзтысьысь сир войт, быйкнитчас-петкöдчас лунвывладорса эжтасысь декабр төлысся мудзöм шондi, дышпырысь нюлыштас Мыжы сайса козьяслысь йывгъяссö, сы бöрын здук кежлö лэбач моз пуксьылö рöмыдыс, а сэсса бара помасьлытöм вой.

Збыль шуöны, челядь паметыд пö медся ён да югыд. Мый Викторлөн йитчöма Мыжы сикткöд, челядьдыркöд, верстыöммöм-кöд, ставсö юрас кутö-видзö. Дыр катгысьöм-кольöм кад бöрас то öтитор, то мöдтор, кокни югыд кымөрөн ли, бур йöлöга шыöн ли, тöд вылас волас. Чужанiнладорсяныыс таркöдас öшиньö төвру, сывкнитас гыöра стеклöö кос лымйөн да вörзёдас-кыпöдас вой востымөн казгытылöмгъяссö, гажтöмсö и гажасö, но быдөн на пиысь мелiа малышталö сёлöм бердсö. Сiдз жö и тайö рытö.

Кык юкөна важ керка, көні и оліс Витялөн семьяыс, өнөдз на чөв-лөня вочаалө шонді петөмсө да, кольөм олөмсө мурталө-мөн, видзөдө важмөм өшинь стеклөяснас Об ю мөдлапөвса баддён тырөм берегө. Сөмын лөнь войясө гусьөн вашкөдчө нэмөвөйся, дзик туй дорас сулалысь кык козкөд. Тайө керкаыс да кык козыйс помнитөны Витялысь челядьдырсө, и дерт өд, сылысь став ворсөмъяссө и лоөмторъяссө. А торйөн нин, тайө тешкодьторсө.

Кымын ар нө сылы сэки вөлі? Ар вит, эз унджык. Ышмысь да быдтор төдны көсйысь зонка.

Сулалісны Рөштвоса трачкакылысь көдзыдъяс. Весиг пөрысь йөз юрнаныс довкйөдлісны, во кызь вит пө нин татшөмыс эз вөвлывлы. Витя коймөд лун пукаліс гортас. «Алёнушка» нима детсадсө, кытчө сійө ветлөдліс, көдзыдъяс радиыс пөдлалісны. Сійө ачыс аддзыліс, мый джоджас тувъялөм көрт тувъясыс кыза гыөртөмаөсь.

Кор мамыс удж вылын, Витя — пөль-пөч ордас, керкаыслөн воддза джынъяс. Люлля пөчыс пуксьөдө зонкаөс орччөн диван вылө, босьтө киас азбука да петкөдлө букваяс. Тайөс вөчны сі-йө ёна бура кужө. Олөм чөжыс өд велөдіс: медводз — школаын посни челядьөс, а сэсся детсадйын веськөдлысьөн уджаліс. И пыр войвылын, көні век унджык төжд-нокыс: школалы пес кералөмсянь да канцелярской көлуй да велөдчан небөг тырмымөн вайөм-дасьтөмөдз. Талун Люлля баб пөчөн шуысьыскөд «пэ» букваөдз воисны. Пөчыс петкөдлө серпас вылө да юалө:

— Мый татчө серпасалөма?

— Пу,— шуө Витя.

Люлля пөч бурпырысь шпыньмунас да бара юалас:

— «Пэ» шысянныс нө кутшөм кыв нөшта эм?

— Папа.

— Бур. А өні сюся кывзы, кыдзи ме мөда шуавны: п-ань, п-он, п-ас. Мый ме тэныд шуигас петкөдлі?

— «Пы».

— Сідз. Сөмын колө шуны «пэ».

— «Пэ»!

— Молодеч. Нөшта өти буква мөдін төдны. Верман мукөдъясысь торйөдны?

— Да.

— Быттьө табуретка.

— Сы кодь.

Люлля баб босьтө карандаш да мыйкө гижө кабалаө мича гырысь шыпасөн. Сэсся матыстө кабаласө Витялань.

— Нолы, лыдды. Мый ме гижы? Став шыпасыс тэныд төдса.

Зонка сьөлөмсянныс старайтчө гөгөрвоны гижөдсө, чуқыртө кымөссө да вөрзьөдө вом доръяссө.

— Пэ-е-лэ-и-кэ-а-нэ.

— Но, мый артмис?

Витя раминика шуө:

— Пеликан... А мый сійө лоө?

— Сійө сэтшөм лэбач,— гөгөрвоөдө Люлля пөч.— Ылын лунвылын олө. Сылөн голя улас ыджыд ноп эм аслас жө кучикысь.

— А мыйла?

— Пеликаныс ыджыд чериён пөткөдчө. Саридзысь кыяс черисө, да нопнас и лэбөдө берегас, мед сэсся аслыс сёйны либө пиянсө вердны.

Шыён воссьө керкаө пыран ыджыд, сьөкыд өдзөс. Пөчөн шуысьыс тэрыба чеччыштө диван вылысь да котөртө керка водзө.

— Миша дедө воис!— юөртө сійө, гашкө, аслыс, гашкө, пөчыслы.

Пöльыс ньөжйөнникөн вештө зонкаөс ассяньыс ылөджык да кызөктыштөмөн шуө:

— Энлы, энлы сэтшөма тэрмась. Кынман ме дорын. Медводз пөрччыся.

А Витя инас оз өшйы, дед гөгөрыс и гөгралө, чеччалө да кекөначасьө.

Миша пöльыс, мөдарө, оз тэрмась, лабутной, өд милицияын уджалө, но внукуыс дорө, кыдзи и пөчыс, став сьөлөмсяньыс. Вот öнi пөрччысяс, малыштас дзормөм юрсисө да мышкыртчас сьлөн пель дорө, кутыштлас да окыштас бан бокас. А сэсся ставөн пуксясны пажнайтны.

Пажын бöрын бара на гажа лоө. Пöльыс медводз шонтысяс, а та бöрын гынкөмасыс, пасясяс, тшөктас пөчыслы и вильышпозсө, Витяөс, шоныдджыка пасьтөдны. Сэсся найө петасны Найда понйөс вердны.

Найда пес чипас дорын чомйын олө. Войвывса лайка. Чомсө сылы дедыс ачыс лөсьөдіс. Ыджыдкодь артмис да ён, чукъя вевта, быттө керка. Пыранінас брезент тор өшөдіс, мед пытшкас лымсө төлыс оз нөбөд, чом пыдіас моздор тыр кос турун вайис.

Миша пöль босьтө пон вердан дозмук да петө зонкакөд ывлаө. Найда кылөма өдзөс шысө да деда-пиалысь кок уланыс лым дзуртөмсө, чомйысь нырсө нин мыччөма. Сэсся тэрыба чеччыштө пон чом водзвывса лым юж вылас да радпырысь легөдө бөжнас. Витя кымынөдысь нин видзөдө, кыдзи сійө, бөжсө да пельяссө топөдөмөн, горша да гораа тьпкөдчө-сөйө. Көдзыдысла сьлөн муртса тыдавмөн тірзёны кокъясыс.

— Дедө, Наيداыслы нө абу көдзыд?

Мöдыс мыйкө мөвпалігмоз лэптыштлө пельпомгьяссө.

— А сійө кө кынмас?— повзьө Витя.— Вай керкаө пыртөдам.

— Эн пов,— лөньөдө Витяөс дедыс.— Видзөд, кутшөм сьлөн гөныс сук. Сэсся оз лым вылын узь, а чомйын.

— Жаль өд зэв.

— Эн шогсьы. Сійөс öнi сёяныс тшөтш мөдас шонтыны. Пөт кынөмнад озджык кынмы. Лок пырам.

Найда азыма сөйис да тэрмасьмөн бөр пырис чомйө. Витя лажмөдчө да лэптыштө чом пыранін тупкысь брезентсө. Видзөдалө пытшкөссө. Найда чикыльтчөма, куйлө нырсө сук гөн пиас дзебөмөн, сөмын пельясыс сувтсаөсь, да сюся кывзысьө. «Буракө, век жө кынмө»,— мөвпыштө зонка да жалпырысь ышловзьө.

— Пырам,— горөдө пöльыс кильчө вывсянь нин, мöдыс сувтө да неокотапырысь довгө гортас.

Колян нэмса важ часі гораа да тэрмасьтөг кучкө нөльысь...

Артасьнысө Витяөс тшөтш Люля баб велөдіс. Збыльвылас сөмын кызьөдз. Кор кытчөкө петаласны, быть артасьны тшөктас,

мед внукуслы эз вöv гажтöм весь мунны, öд ачыс ньöжйöникөн нин ветлöдлö.

— Мун,— шуас,— водзлань, артав, тайö потшöсас кымын штaketник?

А зонкалы и рад. Восьлалö, кинас быд пöвторйö инмöдчö. Сэсся бөр тэрмасьö, горзö котöртигмоз, мед оз вун:

— Дас кыкысь кызь да нöшта кöкъямыс.

Бабыс сылы воча нюмъевтас да юрнас довкнитас. Воасны потшöс помас, сйö и шуас:

— Молодеч, стöча лыддьöмыд,— и мыйкö мöдтор тшöктас артавны...

Тайö рыгтя кадас важ керкаын лөнъ да лöсьыд. Люля баб ломтис пач да пуö ужын. Витя ас кежсьыс ноксьö.

Ывла вылын дзик нин пемыд, кор воö мамыс. Пиыс радпырысь котöртö сылы паныд. Гажыс бырöма. Мамыс да бабыс юксьöны лунся вьльторъясөн, сэсся Люля баб пасьтöдö внуксö; Витя мамыскöд петöны ывлаö да мунöны асланыс кильчöлань.

Мамыс Витялөн школаын велöдö да локтöм бöрас пыр и пуксьö аския урокъяс кежлö дасьтысьны. Ывлаас зэв кöдзыд, но гырысь класса челядь велöдчöны. Витя гөгөрвоö нин, мый дасьтысьны урок кежлö колö бура, да ас ногыс отсасьö мамыслы: оз дöзмöдчы. Пуксяс гыöра öшинь дорö да чунь помнас сывдö йисö, розь пырыс видзöдö ывлаын югъялысь бияс да кодзувъяс вылö.

Тадзи и талун вöли. Но збыльвылас Витя öнi инас эз öшйы. Найдаös казътылис, кызди сйö чомъяс öтнас татшöм кöдзыднас олö. Эз вермы терпитнысö, мамыс дорö котöртис.

— Мамö, позьö ме Люля баб дорö петала?

— Мый?— мамыс, мый йылысь кö мөвпалиг, орöдчис аслас уджысь.— А, дерт, петав. Вай ме тэнö пасьтöда.

Сьölöмыс зонкалөн ёвксис, кор сйö чепöсйис гортсьыс да котöртис Найдалөн чом дорö. Лэптыштис вевттьöдсö да розяс сюйис юрсö. А сэнi сап пемыд — синтö кöть перйы, немтор оз тыдав!

— Найда!— негораа чукöстис Витя.— Тэ ловъя? Тэ кöнi?

Чом пытшкын мыйкö вөрзис, и шоныд ульсöд кыв нюлыштис зонкалысь бан боксö.

— Тэ ловъя!— нимкодясис Витя чомйö төрöдчигмоз да мöдис мелiа шыльöдны гөн ньылыдыс. Найда нöшта öтчыдысь нюлыштис Витялысь чужöмсö да кутис гораа никсыны.

— Ме чайтi, тэ кынмин. Мусаникöй менам! Донай менам!— жалпырысь, нораа шуалис Витя да сывйыштис Найдаös сьылiöдыс.

Чомъяс эз вöv кöдзыд. Öвтис пöдöм турун көрөн да аслыспöлös, кöдзыдъяс дырйи овлысь, пон дукөн. Витя водыштис пон дорö да небыдика шыльöдис сйös. Пемыдсьыс да турун дуксьыс унмыс мöдис личкыны, сйö куткыртчис да нем виччысьтöг ву-гыртис.

Мый лои водзö, Витя тöдмалис бöрыннас нин — мамыслөн да бабыслөн висьтъяссь.

Кöкъямыс час рытын мамыс помалöма ассъыс уджсö да петö-мa дед-баб ордас.

— Со и ме. Пиукла вои,— порог дорсянь шуöма сйö.

Люля баб да дед чуймöмөн видзöдлисны öта-мöд выланыс.

— А сійö нö абу тэ ордын?

— Абу,— шай-паймуніс мамыс.— Час кык нин лоö, кыдзи ті ордö вöзйысис.

— О, енмöй,— повзöмпырысь швуч-швачкерис кинас бабыс.— Да сійö öд ми ордö эз пырав!

— Кыдзи эз пырав?

— Эз!— Люля баб лигышмунöмөн пуксис улöс вылö.— Көнi нö Витяыд?

— Ог тöд,— усьöм гөлöсөн шуыштiс мамыс да уськöдчис телефон дорö.— Михеевъяслы звöнитла, гашкö, Алёша дорас котöртiс, ворсны ылалi. Господи, татшöм поводдяö! Юасътöг-вись-тасътöг? Тi ордö, шуис, петалас. Вот öд вильышпозйыд!

Мамыс дзöрысь кинас босьтiс телефон трубка да личкаліс колана лыдпасъяссö. А сёрнитiгас пыр ёнджыка зумыштчис, кальöба курччышталіс вом доръяссö да майшасёмысла чунь помъяснас тэрыба вөрöдіс телефон проводсö. Сэсся ышловзё-мөн пуктiс трубкасö.

— Абу на ордын!

— О, енмöй! Витюк! Кынмис нин, көнкö,— мөдіс сыркъявны-бөрдны пöчыс.

А пöлыс, мөдарö, öдйö гөгөрвоис, мый колö карны, шуö:

— Тадз вöчам. Тэ, Людмила,— мамыслы индö,— суседъяс дорö петав, юась, гашкö, кодкö аддзыліс, а сэсся котөрөн бөр татчö лок. Некод кө эз аддзыв, ме уджвывса оперативнöй дежурнöйлы мөда звöнитны. Сöмын öдйö котөртлы. А тэ, Юля, Людмила ветлөдлігкості, аслад тöдсаяслы звöнитлы. Чупровъясöс эн вунöд, гашкö, Витя Аннаос либö Андрей Михайловичос аддзис да на ордö пырис. Найö эськö, дерт, звöнитлісны, а гашкö, эз гөгөрвоны ли эз слöймыны, вунöдісны.

Люля баб пыр и телефон дорö пуксис, а мамыс котөрөн уськöдчис суседъяс ордö, тэрмасигас дзиръясö гораа крапнитіс-пöдлаліс.

Крапнитöм шысьыс Витя и садъмис. И некыдз оз вермы гөгөрвоны, көнi сійö. Кылö, орччөн кодкö нускö-лолалö. Пөрччис кепысьсö. Инмөдчис — мыйкö небыд, юрси кодь. Сэки и гөгөрвоис, мый сійö Найда дорын, чомйын. Петіс ортсы — да öдйö-джык керкаö.

Люля баб, аддзис внуктö да, сідзи и кынмис киас телефон трубкаөн.

А дедыс зумыштчис, кыпöдчис улöс вывсьыс да стрöга юалö:

— Тэ көнi вöлін, пышйöгпоз? Кытысь татшöмыс воин, ставнас турунöсь?

Витя видзöдліс ас вылас — и збыль, пасяс и гынкöмас турун сі да йики гөгөр. Повзис, мый видны мөдасны, да няргөмсорөн и висътасис:

— Чомйын вöлі... Найда дорын...

— Пон чомйын?— чуймис Миша пöль.— Кутшöм мути нö тэнö сэтчö нуис? Мамыд мудзтöдз нин котраліс, кок сөнсö орöдіс, корсысьсö став Мыжы кузяыс!

— Ме Найдасö кодзыдсьыс шонті... Ме сэсся ог мөд...

— Оз сэсся мөд сійö! Дутды лөвтнытö!.. Но колö жö тадзи! Пон чомйö пырöма!.. Эн бөрд! Ойдан синванад, мужик! Тырмас дультö лэдзны.

— Но мед,— дорйыштіс бабыс.— Мый сэсся внукод вылө уськөдчин? Сійө и ачыс нин повзис, со тіралө ставнас. Аддзыс-сис, и бур!.. Вай, Витюк, ме тэнө пөрччөда, да вод узыны. Но?

Витя тэрыба довкнитө юрнас, ки кабырнас тільө синсө. Де-дыс здук кезлө ланьтлө да сөмын дөзмана видзөдласөн колльөдө баба-внукаөс. Сэсся бара на дивуйтчөмөн гораа шуө:

— Но, колө жө! Пон чомйө дзебсьөма! Сэтысь и милицияөн он пыр аддзы!

Люлля баб нуөдө Витяөс пыді жырийө, вольсасьө, водтөдө внуксө да лөсьөдыштө эшкынсө.

— Узь. Бур вой.

Унмовсигас нин зонка кыліс, мый воис мамыс, да ланьтөдчис, мөдіс кывзысьны.

Гажтөма, сибдөм гөлөсөн мамыс шыасис:

— Абу... Некод абу аддзылөма... Ставсө гөгөрті.

— Да гортын сійө,— негораа вочавидзис Миша дед.— Чөв, узьө нин. Тэ сөмын петін, а сійө — өдзөсө. Ышмөг!

— Көні нө сы дырасө вөлөма?

Де-дыс первойсө ланьтлө, мед висьталөмыс ёнджыка инас, а сэсся гажаа, серамсорөн нин вочавидзө:

— Көні вөлөма? Мөвпыштнытө он куж. Пон чомйын вөлөма! Найда дорын! Көдзыдсьыс сійөс шонтөма: мед пө оз кынмы.

— Ок, и сьөкыд меным ськөд, быдпөлөс майшасьөмыс өд сюрлө,— мүдзөмпырысь, но кокни руөн нин ышловзис мамыс да пуксис пызан дорө.

— Эн мaitчы. Мый нө сьөкыдыс! Бур сьөлөма зонка быдмө. Дерт, сы бөрся син да син колө, кыдзи и быд зонка бөрся. Не сөмын татшөмтор на артмывлө олөмад...

Мамыс сөгласа нюмуні.

— Но мед, сідзкө, ті ордын узяс. Ме пета, а то сы мыйта котралі көдзыд ывлатыс, өдйөджык эськө эшкын улө пырны.

Мамыс бара на ышловзис, сэсся сувтіс, шуис: «Бур вой» да петіс.

А кор пөль-пөчыс водісны, Витя чөскыда нин узис. И вөталіс сійө Найдаөс.

Видза олан, шонді!

В И С Ь Т

Мыжы. Юль шөр. Югыд войяса бласлөвитөм кад. Гөна да борда вөрся став ловъя лолыслы вөр-ваыслөн дыр виччысяна козин. Лунсө сывъявны он вермы! Со быттьө нин и сёр рыт, вод да шойччы лунся төждъяс бөрын, да шондіыс на эз пуксьы. Гильөдө, дөзмөдө мүдзөм синъяс, колана нин унсө скөнъ вөтлө. Мый тэ мөдан вөчны!

Сөмын вой шөрланьыс, кор шондіыс өшйө дзик вөртас весь-тас, лөньө сиктыс, сөмын радейтчысьяс да том йөз ньөжйөникөн ветлөдлөны-шөйтөны ланьтөм уличъяс кузя, нюркйөдлөны мыла сьыланкывъяс.

Войыслөн васөд рузумыс тэрмасьтөг разөдө войвывса енэ-жыслысь чим лөзсө, едждөдө ылі енэжтассө. А выліас — ни өти кодзув абу!

Мырпома да югыд войяса муён ыдждөдлөны тайо кадас мян-
лысь Войвыв пельосос.

Тайо Об ю джуджыд берегас, коркө парма вöрыслысь мырд-
дьом инас, чукая уличаяса сиктас, коли Толялөн челядьдырыс.
Мыш сайын и школа.

Но быд во воывлө Мыжыо университетын экзаментяс сдай-
төм бöрын. Тадзи жö таво.

Квайт лун коли, кызди петис Толя «Метеор» теплоходысь
кок улын gryмакылысь көрт дебаркадер вылө. Апыштіс морöсты-
рөн чужан сынөдсö да кынмис: сэтшөм югыд да кыпыд сьölөм
вылас лои, көть горзы кыскö друг воөм да ылькмунөм шудсыс.
Но сы пыдди вом доръясыс сöмын вашнитісны:

— Гортын!

Воөм бöрас Толя көсйысьліс дзояджык воыслы, Юралы,
мый тайо лун-вой ветласны шонді петөм видзөдны. Воыслөн
синмыс öйис. Быд рыт юасьö:

— Но мый, ветлам?

А Толялы немкö: көсйысьліс öд. А кызд мунан? Со вежайяс
воисны рыт пукны, то мыйкö бара манитас. Но со и прöст рыт
сюри. Воис кад чукөртчыны. Толя гартлө палатка, Юра сөвтö
сумкаö сөян-юан. Мамыс тані жö, керка водзын сулалө, видзөдö.
Гөгөрвотөм сылы, мый зонъяслы гортас оз пукавсьы.

— Номъясöс вердны мөдінныд?— бур ногөн шпыньмунö сійö.

— А ми аскөд мавтчан босьтім,— шыасис Юра.— Быдса
доз. Тырмас.

Нина, челядь пиысь шөркостыс, на дорö жö петис, мамыс
бöрся содтіс:

— Көнкө шөйтөм-ветлөм пыдди мед бурджык асланыд жыр-
йын идрасинныд.

Юра гажаа вочавидзö:

— Тэ гортö кольчан? Вот и идрась.

Чойыс чушнитіс да вокъяс вылас дөзмөм руаөн бөр пырис
керкаö.

— Ой, быттö и чушкөдчис!— сералö бöрсянныс ичөтджык
воыс.— Часі вылө видзөдлы. Дас регыд лоö. Кутшөм идрасьөм
вой улас.

Толя гусьоник чөвтліс синсö мамыслань, мый сійö шуас че-
лядьлөн вензьөм вылө, да ставнысö лөньюдіс:

— Аскомысь субөта. Сэки и идрасям гортын.

— Ставыс дась!— юөртö Юра да кашкигтыр көртавлө важи-
ник кроссовки көвъяс.

Вокъяс петöны ывлаö. Негораа сёрнитігтыр мунöны сикт вой-
ыввланьö. Петісны ёна сёрөнджык, мед йöзыс улич вылас эз
тыдавны. Сиктас джынвийö зыряна олöны. А зыряна — быдтор
тöдны көсйысь войтыр. Быдтор казялöны, нинөм наыс он дзёб:
коді кытчö муніс да кор локтіс, мый вöсна суседъяс вензисны,
кодлөн мөскыс на потшöс дорысь турунсö йирис. Көть быдөнöс
асывсянь разведчикö гижөд!

Йöзыс и збыль этша. Вывті жар вöлі луныс. Со и сикт пом.
Водзын, кузь зіб йылын, вөрзывтөг öшалö аэропортлөн визя

«чөрөс». Лөнъ. Өні луд вывтї воёдчан Юган ю берегдорса не-
ыджыд лыа визьөдз, сэсся кежан шуйгавыв, и сэні нин поэбө
зэвтны палатка.

Шонділөн биа сярис ньөжйөндзи гөгыльтчө войвывлань. Уна
рөмөн сывкмуном кыа водзвывса югөръяс улын дзебсьыштө вө-
рөн тырөм мыльклөн мыгөрыс; сэні, быттьө зарни тшын улын,
муртса тыдыштө дзоляник, дас кык керкаа, Ханты-Мыжы сикт.
Сынөдыс лунтырнас пымалөма, өвтө мелі шоныдөн да турун
көрөн, весиг номъяс абуөсь, дзебсьөмаөсь васөд увтас инъясө.

Вокъяс зэвтөны палатка, пестөны неыджыд бипур да пуөны
пөртйын яа кансерысь шыд, а кадыс нин вой шөр. Шондіс
өшйөма баддя ылі ді весьтө да асныралө, оз көсйы пуксьыны.
Шлывкнитө быгыд югөрсө паськыд ойдлана видз былө, төдчөдө
чукля вислысь да юыслысь кизьөр эзысь рөма визьсө.

— Уялыштам, номъясыс со абуөсь,— вөзйө Толя.

— Вай,— радпырысь көсйысьө дзоляджык вокыс.

Найө тэрыба шыблаөны паськөмсө да өта-мөд бөрсаяс чеч-
чалігыр котөртөны Юганлань.

Медводз юыслысь лөнъ визувсө торкө ён мыгөра Толя. Ньөж-
йөникөн, виччысьтөм көдзыдсьыс акайтөмөн, пырө ю шөрланыс
Юра. Юганыс эськө абу и джуджыд, но весиг жар лунъясө ва-
ыс шоналө сөмын метра судта, та вөсна кыкнанныс кутчысьөны
ю веркөсас, пыдөджык оз пырны.

Сэккості Юган дорө тэрмасьтөг матыстчис вөв чукөр.

— Буракө, юны воисны,— чайтіс Юра, ыджыдджык вокыс
бөрся берегө петігөн.— Гашкө, мөдлапөлө вуджасны.

Вокъяс дорті тэрмасьтөг, быттьө асланыс думъясө вөйтчөмөн,
мунісны нель вөв. Сувтісны дзик ю дорас, дышпырысь бергөд-
лісны юрнысө, сэсся корснитісны да өта-мөд бөрсаяс пырисны
юас. Тэрмасьтөг жө мөдісны уйны. На бөрся вөтчисны нөшта
куймөн. Ылісяныс налөн гөрдөв да ва пиын лөсталысь гөныс
видзөдсис биа-ыргөн рөмаөн, быттьө ачыс шондіс дзебсьөма
вөвъяслөн пөката кучикас.

Вокъяс кайыштісны вывлань, мед не уявны вөвъясөн гудыр-
төм ваас, да бара пырисны ыркыд юө.

— Тэ мыйла кольччин?— юаліс вокыслысь Толя, кор найө
бөр воисны ляпкыд инас нин.

Юра кызкө аслысногөн петө берегас да шлапсьөдө бипур
дорө. И лолалө сьөкыдпырысь.

— Коктө дойдін?— майшасьө ыджыдджык вокыс.

— Эг. Войтөв кыскаліс. Одва вои. Бур, мый берег дорас ма-
тын вөлі.

Юра висьтасьө лөня, но синъясас төдчө неважөнтя повзы-
лөмыс.

— Мун вай палаткаас, косөдз чышкась да өдйө пасьтась,—
тшөктө Толя да зумышмө.— Муртса эн вөй, а сэсся на висьмыны
верман.

— Мамыдлы сөмын эн висьтав!— шыасьө палатка пытшянь
Юра.

— Ладнө, асьным төдам, велөдчөм йөз.

Толя ачыс пасьтасьö жö, сэсся босьтö пань, паньыштö пöрт-йысь, пöлялö да видзчысьöмөн видлö.

— Лöсьыд тай шыдыс артмöма! Чöскыд!

— Тэ коть меным колышт!— шмонитöмөн шуö дзоляджыкыс, ки чышкöдөн зiля да кашкигтыр чышкасиг.

— Кымын пань?— гөгöрвоö воксö да нюмъялигтыр юасьö Толя, и вокъяс гораа ваксьöны.

— Ой, а шондiыд пуксьöма нин!— юрсö палаткаысь мыччиг-моз шызис Юра.

— Ок, эг и аддзылöй,— жалпырысь нюжöдö ыджыдджык вокыс.

Войвылас енэж джынiйöдзыс яра ломзьö кыа. Сэни, кытчö пуксис шондiыс, югыд бипурөн ыгъялö вöртасыс. Кажитчö, быттьö ыджыд биа гöгылыс дзик матын, сöмын дзебсис баддя дi сайö, и кайны кö мыльк вылас, то быть аддзан сылысь лямöм, выль лунлы вынъяс чöжысь кытшсö.

Пöттöдз сёйöм бöрын кык вок тэрмасьöмөн дзебсьöны дзизгысь номъясысь палаткаö.

— Час вой,— часi вылö видзöдлö Толя.

— Бур, да?!

— Мый?

— Шондiыс петö öти лунö, а пырö нин мöд луннас!

— Да-а. Стöча казялöмыд. Быттьö дзикöдз оз пыравлы.

— Обдорад, буракö, тадзи и эм. Сэни öд Войвыв кытш.

— Да. А Ямалас кутшöм лöсьыд. Гөгöр сöмын тундра, енэж да шондi! Сэни весиг еджыд войясыс оз овывыны. Сöмын лун и лун.

— Весиг оз эскыссы,— ышловзьö ичöтджыкыс.

Тöдлытöг кольö час. Кыаыс ньöжiйöникөн вешiйö дiыслөн öти помсянныс мöдарас.

— Видзöд,— казялö Юра,— тöлысь.

Толя синъяснас сюся корсьысьö югыд кымöртöм енэжтi.

И збыль, Об ю весьтын, öтнасөн, быттьö некодлы ковтöм, быгалöм алöй рöма, веськыдладорсянныс муртса дiнъялыштöм тöлысь. Войкытш енэжлөн вежлытöм месань. Быд здукö пыр ёнджыка гөрöдö му да енэж öтлаасяниныс.

— Быттьö Шурышкарыс ставнас сотчö!— нимкодпырысь горöдö Юра.

— Обдорыскöд тшöтш,— вашъялана содтö бöрсянныс Толя. Вокъяс петöны палаткаысь.

— Öни мыччыяс,— виччыситыр шуö ыджыдджыкыс да дугдывтöг дзоргö кыа вылö.

— О-о!— шензьö Юра.— А Мыжыад нин шондiыд петöма! Толя бергöдчылö да юрнас дзöркнитö:

— Сiдзи и эм. Сы вöсна, мый кыр йылын.

Медводдза югöръяс улас ланьтöм керкаясыс алöйгöрдöсь. Öшиньясын ворсöдчö асья кыа. Весиг сиктса администрация керка вестын еджыда-лöза-гöрда дöрапасыс ставнас алöйгöрд.

Өти здук вокъяс и нимкодясёны асланыс сиктөн да бара вештёны синсё войвывлань. Сійö жö кадö шондi югөр яра кучкö вок синъясö да мырдөн читкыртöдö. Первойсö ичöтик югзыысь шом, а сесся пыр ыджö и ыджö, паськалö-ломзёö, ломалысь гөрд сярөн торйöдчö вöртассыс, тыртö аслас югыдөн Облысь став увтассö.

— Видза олан, шондi!— радпырысь горöдö Юра да öвтö кинас.

Толя гажаа видзöдö вокыс вылö да тшöтш лэптö кисö:

— Чолöм!

Та бöрын серамсорөн содтö:

— Ми тэнö виччысим быдса вой! Стöч öти час да кызь минут!

Вокъяс выльысь пестёны бипур да пузёдöны чай. Ломзыысь бипурыс вöтлö номъясöс, и найö вералысь кымөрөн, дöзмöмпырысь вешйöны бокö. Тшыныслөн курыд кöрысь садьмöны вугралысь вöвъяс, найö тэрмасьтöг лэпталöны юръяссö да дыр апалöны чазöд сынöдсö.

Вөр-ваад кадыс мунö тöдлытöг. Со и водз асыв нин. Шондiыс кыпöдчö-кайö пыр вывлань и вывлань, заводитö нин гөгөр пöжны. Об ю веркöсын пöртмасьöны-йöктöны шондiлөн чепсасысь югөръяс.

И со нин ваён киськалöма ломалысь öгыръяс, чукöртöма палатка. Кад бөр мунны гортö.

Но медводдза мыльк вылö кайöм бöрын вокъяс бара на бергöдчылісны. Веж лудйыс тырöма кольквиж рöмөн. Тайö öта-мöд бöрсяыс воссисны да выль лунсö чолöмалöны вижъяурлөн дзоляник шондiясыс.

Узыысь на уличьяс весътi да ю увтасінöд разалис-паськаліс вöвъяслөн гораа гөрдлöмыс. Об ю вывсянь кыліс теплоходлөн кузя да гораа тутöстöм, сійö быттö тшöтш жö чолöмаліс выль гожся лунсö.

Комиöгіс Елена Козлова.



Серамбана висътъяс

Озырлуннад эн ошйысь

Зарни чунькытша либӧ чусіа аныд сиктад зэв на и пыдди пуктана. Видзӧдан да, кодлӧн быд чуньын дона чунькытш, сійӧ быттӧ и бур морт. Кӧть удж вылас, кӧть вадорӧ гожйӧдчыны либӧ купайтчыны мунӧ, чуньсьыс аныд донаторсӧ оз и пӧрччы. Йӧзсӧ аслас озырлуннас дэльӧдӧ: видзӧдӧй пӧ, кутшӧм ме мича да тшап.

Ӧти лунӧ татшӧм жӧ кокни сяма ар кызь вита Светлана тӧвзис-шутӧвтіс лунвыв саридз дорӧ шойччыштны. Пансионатад путёвкасӧ удж вывсаныс сетісны да, оз жӧ косӧд. Мунӧм водзвылас став мича паськӧмсӧ ыджыд сумкаӧ тэчис, эз вунӧд и зарни кунды-мундысӧ. Мамыс дай Люба нывтӧртыс эськӧ ӧлӧдісны, чусітӧ, сьылі чептӧ да чунькытшгъястӧ пӧ эн босыт сьӧрсьыд, вермасны и грабитны да вины на. Ӧні ӧд пӧ поездад и пляж вылад быдкутшӧм шпанаыс шӧйтӧ. Но налӧн велӧдӧм былӧ Света шер эз вӧч. Кокни руа аныдлы окота вӧлі ошйысьыштны йӧз водзас аслас озырлунӧн. Дай сьӧлӧм пыдӧсас дыркодъ нин видзис гуся мӧвп: петны бур зон сайӧ верӧс сайӧ, лӧсьӧдны шуда ӧлӧм.

Света мырсис-уджаліс бухгалтерӧн вӧр лэдзан озыр предприятиеын да сьӧмнад ӧліс бура. Мыгӧрнас абу жӧ мисьтӧм и. Туша и рожа, кыдз шулӧны, эм. Сӧмын жӧник оз тырмы. Света былӧ зон котырыд эськӧ и видзӧдісны, но нывлы некод эз мусмы. Коді сюра пӧ, а коді сера, кодкӧ ӧтарӧ вина-водка вомас кымлалӧ*, а кодкӧ нин муса гӧтыр дорын кургӧ-ӧлӧ. И ӧні Света кутіс лача корсьны мусуксӧ лунвыв курортысь. Сэні шойччысьыд тырмымӧн, да чайтіс крукавны мичаджык да озырджык зонмӧс. Мӧвпаліс на: гӧльяс да юысь-кодалысьяс курортгъясӧ оз ветлыны, а шойччӧны сэні бура уджалысь да уна сьӧм нажӧвитысь дядьӧяс.

И со Светлана лунвылын. Ӧлӧ пансионатын. Ӧти вежӧсын найӧ куимӧнӧсь: Галя — Москваысь, Светакӧд тшӧтшгъя кымын, ар нелямына Вера — Вӧлӧгдаысь. Света да Галя медводдза лунгъяссиян жӧ кутісны ёртасьны. Быдлаӧ кыкӧн ветлӧдлӧны: кӧть луннас саридз дорӧ, кӧть рытнас йӧктан рыт былӧ. А Вера накод ёна оз ёртась. Ньӧбӧма курсовка да ветлӧдлӧ врач дорӧ, бурдӧдчан ваын шполькӧдчӧ. Асывнас мукӧдкӧд гимнастика вӧчӧ, котралӧ, ёнмӧдчӧ.

Лунвылад гажа да шоныд. Нывтъяс ӧтарӧ саридз дорын гожъялӧны, сола ваын уялӧны-варччӧны. Налӧн, слабог, вир-яйыс том, дзоньвидзалун былӧ оз на норасьны. Света вадорӧ став зарниторнас ветлӧдлӧ, ошйысьӧ быттӧ, бур гӧтырӧн пӧ кодлыкӧ лоа.

Пляж вылын йӧзыд жуӧмӧн жуӧ. Кодкӧ нин лунвыв шонді

* К ы м н ы (диал.) — кымыньтны.

улад гожъялігөн съодасьома-пемдöма. Нач негр кодь. Выльöн воöмаясыс быттö кельдöдöм бобувъяс — лажгысьомаöсь лежак вылö — мышкунысö пöжöны. Света да Галя öдйö и гожъялісны, öта-мöднысö виддалöны, коднысö шондйыс ёнджыка радейтö, кодныслөн кучикыс ёнджыка съодасьома. Венöдз весиг волісны: öтиыс шуö, менö пö гожъялöмыс öдйöджык босьтö, мöдыс оз сетчы, ме пö тэысь съöдджык нин.

— Нывъяс, мый вензянныд?— дерт, рочөн жö, кывлысис на-сянь неылын лежак вылын куйлысь пемыд öчкиа зон.

— А тэныд кутшöм мог?— ыззис москвичка.

— Бурджык лоас, картіөн кө ворсыштам. Кадыс öдйöджык лэбас и. Менö Викторөн шуöны.

Нывъяс паныд эз лоны, мöдарö на, азыма босьтчисны ворсны. Викторöс Енмыс абу öтдортöма статьяс да кыв-ворнас, ворсіг-чöж зон гажöдіс нывъясöс анекдотъясөн, сэсся рытланыс кол-льöдіс пансионат öдзöс дорöдз.

Светалы да Галялы том мортыд кыкнанныслы воис съölöм вылас. Мича, муговсьöд гырысь синма дай гöтыртöм на. Сибы-рын геологөн уджалö.

Мöд луннас нывъяс бара мунісны пляж вылö. Виктор найöс виччысис нин. Öтлаын сэсся и гожйöдчасны картіөн ворсігмоз, но эз вунöдлыны и ваö сунгысьлыны. Виктор видзöдіс Света вылöджык, быдкучшöм мича кывъяс сылы шуаліс: кытысь пö татшöм мичаыс да шаныс татчö усин, тэнад синмад пö лöз саридзыс, сэтчö пö ме вöйи нин. А Светалы нимкодь. Небыд кывйыд öд и каньлы любö. Войвывса том ань öдйö и юрсö воштіс. Зонлөн мыла сёрниыс съölöмöдзыс йиджис. А кор сиби-ряк корис ресторанö, Света нимкодьысла нымөн кыв-ворсö эз вошты. Ошйысис на Галялы:

— Тарыт ми Викторкöд ресторанö ветлам. Ме öд ресторанад некор эг вöвлы да, көсйысьсö көть öтчыдысь сэтчö пыравны. А Викторлы ме, вölöм, кажитча, и сійö меным съölöм вылö воö. Ой, Галя, ме сэтшöм шуда, медводдзаысь на татшöм зонмыс-кöд паныдаси. Быд шань кывсö нин мен шуаліс.

А Галяös завидь босьтіс, оз сы вылö, москвичка вылö, сиби-рякыд видзöд да. Бöрйöма со кутшöмкö северянкаös. Но мед, та-тшöм зонмыс пляж вылад жуöмөн жуö, көть быд лун найös вежлав. А нывъёртсö век жö öлöдіс:

— Эн эскы быдөнлы, код төдас, мыйся морт тайö Викторыс. Сибырса геологөн висьтасьö-а. Но мен мыйлакö оз эскыссы. Пöръясьö, тыдалö.

— Кутшöм пöръясьöм... Зэв бур морт. Син сертиыс тыдалö.

— Ачыд төдан, Света. Мен мог абу. Но видзчысьны татшöмъ-ясьсыс колö.

Рытнас Света пасьталіс медся мича платтьöсö, ставнан чуняс пысаліс зарни кунды-мундысö, сьыліас öшöдіс кулона зарни чеп да долыд чужöма петіс ывла вылö. Виктор, съöд öчкиа, виччысис нин пансионат öдзöс дорын. Окыштіс нылös бандзи-бас:

— О-о-о! Да тэ жö нач королева, веж лудвывса еджыд ка-тшасин... И көні татшöм мичаясыс чужöны-быдмöны... Ылі вой-вылын...

Зонлөн кывъясысь Светалөн бандзибыс мöдіс öзйыны алöй

рөмөн. Съөлөмыс морөс кудсыс тіпкөмысла муртса ортсы оз пет.

— Светлана-лана, вай медводз лэччылам берегас, пукалыштам сәні, кывзыштам саридз гыяслысь мыла шыладсө, а бөрын-нас пыралам ресторано,— корис Виктор.

И со найө пукалоны нин гы жутөдысь вылын. Сибиряк пер-йис вөсни куртка зепсыс ичөтик коньяк доз да кык пластмас-сөвөй стөкан.

— Света, төдан мый, менам отпускө помассьө нин. Аски асывнас поездө пуксыны колө, зэв жаль, мый водзджык тэкөд эг төдмасьөй.

— Кыдз мунан?— чуймис Света.— Мыйла нө водзджык эн висътав? Ме сэтшөма надейтчи, мый өглаын дыр на кутам шойччыны.

— Эн майшась, Света,— такөдіс Виктор шогө усьөм нылөс.— Ассыд адрестө вай, ме сэссия гортсянь письмө гига, а ковмас кө, тэ дорө локта мөд отпуск дырйи, а гашкө, и водзджык.

— А он кө гиж... Он кө лок... Ме өд тэнө, Виктор, сэтшөма радейта...

— И гига, и локта, эн шогсы, ставыс лоас бур, вай коньяк-сө юыштам,— сибиряк кисьталіс стөканъясө янтар рөма курыд-тор да вөзйис:— Юоам брудершафт вылө.

Света коньяктө некор на эз видлы да, та понда ли мый ли, юрыс нөш кодь лоис.

— Ой, меным мыйлакө лёк, Виктор, юрөйлы сьөкыд...

— Нинөм, нинөм... Коньякыд абу водка. Кольтас* регыд, видзөдлы, кутшөм мича рытя кыаыс, шондіыс саридз сайө регыд дзебяс.

И збыльысь, рытя енэжыс сывкйис зарни рөмөн. Света ку-тіс нимкодясьны гыяс вылын шонділөн ворсөдчөмөн да эз и ка-зявы, кыдзи мусукыс кисьтіс юанторъяс еджыд порошок. Вик-тор мыччис Светалы стөкансө:

— Миян радейтчөм вөсна, Светочка.

Мөд стөкантө кымөм бөрын нылыд нөшта слабмис, да сійө пуктіс юрсө зонлы пельпом вылас.

— Виктор, меным мыйлакө лёк лоис, унмө личкө.

— Нинөм, нинөм...— сывйыштіс нылөс зон.— Кольтас, эн пов.

Света эз и төдлы, кыдзи унмовсис мусукыслөн морөс бердын. Садяс воис водз асывнас. Гөгөр — чөв-лөнь, сөмын саридз гы-ясыс шыалыштөны. Ныв бергөдліс юрсө отарө-мөдарө: мусукыс некөн эз тыдав.

— Виктор, тэ көні?— нора чукөстіс Света.

Некод эз шыась. Ныв чеччис да мөдөдчис корсьны зонсө, но мусукыс быттө му пыр мунөма. Света чуксалис-корис сійөс:

— Виктор! Тэ көні?!

Дыркодь виччысьөм бөрын Света мөдөдчис пансионатлань. Галя да Вера вөлөм чеччөмаось жө нин, асья сөйөм вылө тэрма-сьөны.

— Света, көні тэ войбыдсө шөйтін?— шыасис Галя.— Ми повзим да көсйим нин милицияө шыөдчыны.

* Кольтны (диал.) — лэдзны, кольны.

— Көні нө чунькытшгясыд?— чуймис Вера.— Тэ, буди, став зарнитө ас вылад вөлі пысаломыд...

Сөмын өні Света казяліс чунькытшгяс вошөмсө. Полөмөн малыштис сьылісө. Кулона чептыс сьлөма жө.

Ныв кынмис места вылас: коді нө сійөс грабитис? Викторис али мый? Сэтшөм шань морт быттьө-а.

Света висьталіс нывьёртгясыслы ставсө, кыдзи найө пукалісны Викторкөд вадорын, юисны коньяк да кыдзи унмовис зон морөс бердын. Галя да Вера пыр жө и кывкөрталісны:

— Да тайө жө Викторис — мошенник, коньякад кисьтөма унмовсян порошок, узигөныд став зарнитө шышнитөма.

Асгя сөйөм бөрын нывгяс шыөдчисны милицияө. Сэні Света-лысь дыркодь юасисны Виктор йылысь, а сэсся шуисны:

— А-а... Төдам, төдам ми тайө сибираксө, но кутны некыдз ог вермө, зэв сюсь мортыс да. Со сылысь вөчим фоторобот. Видзөддөй.

— Да тайө жө Виктор!— өттшөтш горөдісны Света да Галя.

— Но өні и корсьөй, колөкө, ищи-свищи, кыдз шуласны,— шуыштис Вера. Но милицияса уджалысьяс такөдісны Светланаөс, кор пө кутам шышсө, юортам тиянлы.

Курортысь Света воис гортас зэв жугыль. Бать-мамсьыс лөмторсө эз дзөб, бөрдөмсорөн збыльсө висьталіс. Найө көть и выдыштисны кокни руа нывнысө... Но мый керан? Киссьөм ватө он курав. А Света век на лача кутө милиция вылө: гашкө, юортасны сылы вөвлөм мусук йывсьыс да бөр бергөдасны вөвлөм озырунсө.

Зарни чунькытш

Валя — том ань. Уджалө кагульничаөн садикын. Уджөныд көть тані абу зэв и ыджыд, но овнытө поэбө. А Сергей верөсыс вөр лэдзан предприятиеын шопералө, да сьөмтө, кыдз шулөны, кулыштө. Семьясө вердө-пасьтөдө. Таысь шог ни печаль абу. Шомысов гозгя быдтөны ныла-пияөс. Оля мөд классө нин котралө, а Ванюк ичөт на. Бур, нёньпом кагукгяслы садйын восьтөма торгя группа. Валялы тайө — кивыв. Аслас дзөлюкыс тані жө лунгюгыдсө колялө.

Верөс сайө петтөдзыс Валя бать-мам дорас оліс-кургис. Отка ныв да, мый көсгяс, сійөс сылы и ньөбасны, мый тшөктас, сійөс и вөчасны. Дай верөс саяс петөм бөрын эз жө вунөдны. Век нин мыйөнкө отсыштасны. Асьныс на уджалөны да. Батыс киномеханикөн мырсьө, мамыс — медся ыджыд лавкаын вузасьсыөн. Көлысь дырйиныс том гозгялы найө козыналісны сідз шусяна «стенка». Сійөс быдөн оз на вермы судзөдны, блатыд кө абу. Гозгялөн өні нель шкап ыджыд вежөсаныс зымвидзөсулалө. Патераныс — куим жыргя. Сергей верөсыслы уджывсянныс сетісны, кыдз водзмөстчысьы. Со и олоны том гозгя. Тужа ни нужда. Радейтөны өта-мөднысө, ёна оз зыксьывны. Дай нинөмла.

Но век жө Валялөн вөлі өти тырмытөмтор. Сійө радейтис ньөбавны быдсикас шылльө-мыльөсө. Аддзас лавка джаджйысь мичаник сикөтш ли зарни чунькытш, синмыс би моз өзгяс. Оз

вермы кутчысыны — ньобас. Съомыс кӧ оз тырмы, мамыс дорӧ котӧртлас, сылысь корас. А мам съӧлӧмьд мам съӧлӧм и эм. Зӧлӧта ёкмылысы нинӧм абу жаль. Сӧмын велӧдыштас, батъыдлы пӧ эн висътав. Ачыд пӧ тӧдан, оз радейт сійӧ шыблавны съомтӧ быд нинӧм абу вылас. Дай и Сергей тайӧ кунды-мундысӧ ковтӧмторйӧн лыддӧ. Нинӧмла пӧ на вылӧ съӧм видзны, тэ пӧ, Валюк, и сикӧтштӧг да чунькытштӧг зэв мича, ме пӧ тэнӧ и сідз радейта.

Дерт, донаторъяссӧ Валя видзис торъя кудйын. А удж вылас сӧмын ӧти зарни чептӧн да кык чунькытшӧн и ветлывліс. Клуб-ресторан сиктын нэм эз вӧвлы да, ассыныс ошйысянторъяссӧ аньясыдлы некӧні петкӧдлыны. Сӧмын удж выланыс и бакъялыштӧны* да корсюрӧ — йӧз дорын ыджыд праздникяс водзын.

Валяӧн Оля нылукуыс оз-оз дай восьтывлас мамыслысь гуся кудсӧ. Дерт, кор мамыс удж вылын. Сэки нывка бурпӧт рӧмпӧштан водзын бергалӧ. Сикӧтшъяссӧ сыліас ӧшлас, чунькытшъяссӧ чуньясас пысалас, вом дорсӧ помадаӧн мавтас. Мамыс моз жӧ асьсӧ быд боксянь видзӧдлас. Кӧсйӧ ӧд артисткаӧн лоны. А найӧ, киноын да сцена вылын ворсысьяс, ок кутшӧм озырӧсь да мичаӧсь. Ӧтчыд мамыс суис рӧмпӧштан водзын мичмӧдчанторъяснас веглясьӧмсӧ да ёна и видіс Олюкӧс. Он пӧ лысьт менсьым нинӧм вӧрӧдны, водз на тэныд краситчыны-баситчыны, бурджык, гортса уджтӧ кӧ вӧчны пуксян. Валя та бӧрын ассыс шыльӧ-мыльӧсӧ пыдӧджык дзебис.

Ӧти мича лунӧ Валя пырис сиктса лавкаӧ, а сэнӧ нывбабаяс гыӧмӧн гыӧны. Мый и лоӧма? Ань матыстчис на дорӧ. Вӧлӧм, вайӧмаӧсь быдсикас зарни чунькытшсӧ, да бӧрйысьӧны. Вуза-сьысь сэн жӧ ызъӧдӧ, перстеньсӧ пӧ этша вайим, да быртӧдзыс удитӧй ньӧбны. Абу зэв дона и. Валяӧн съӧрас съомыс вӧлыштӧ, да дыр мӧвпавтӧг бӧрйис гӧрдов рӧмӧн ӧзйысь изъя перстень. Мыйла чунькытшсӧ перстеньӧн шуӧны? Ӧд сійӧ сэтшӧм жӧ чунькытш, сӧмын дона ли донтӧм из крепитьштӧмаӧсь и ставыс. Перстыс жӧ, комиӧн кӧ, чунь и лоӧ. Со и гӧгӧрво сэсся йӧзсӧ.

Но мед, перстень кӧ и перстень, мӧвпалӧ ас кежсьыс Валя. Гортас ньӧбӧмтор йывсьыс верӧсыслы эз висътав. Нинӧмла. Мыйкӧ на шуас дай. Мӧд асывнас Валя пыртіс пиуксӧ яслиӧ, ачыс аслас группаӧ кежис. Асья сёйӧм бӧрын нуӧдіс зонпосникӧд занятие. Сэсся ставӧн гузь петісны ывла вылӧ. Гырысджык челядь ворсӧны нин вӧлі. Валя матыстчис вильышпозъяслӧн кагульнича дорӧ:

— Со, Галина Ивановна, перстень тӧрыт ньӧби.

— Ой! Кутшӧм мича. Дона-ӧ?

— Дона, но уна-ӧ сулалӧ, ог висътав. Вомдзалан на дай.

— Полан кӧ, эн ошйысь,— лӧкӧдчис мӧдыс.— Колантор лоӧма, менам татшӧм шыльӧ-мыльӧыс тырмымӧн жӧ эм.

Та вылын Валяӧн ошйысьӧмыс эз на помассы. Виль чунькытшсӧ садикса став уджалысьыслы петкӧдліс, весиг пусысь-идрасысьяслы да ывла вылын мырсьысь дворниклы. Медбӧръяныс и шуӧ:

— Олан тэ, Валентина Васильевна, кызз Королева Шантеклера.

* Бакъявны (диал.) — баквалитчыны.

И мыйла тэ зарнисö чуқортан? Он мый тöд; тайö дона кöртис олöмö буртор эз на вайлы. Видзчысьны зарнисьыс колö. Дай эн петкöдлы сийöс быдöнлы. Вежалысьыс öд öнi уна.

Но кагульнича олöма идрасьысьыс велöдöмсö пыдди эз пукты. Став нывъёртыс да тöдсаяс водзас виль перстеньнас ошйысис. А шойччан лунö Шомысовъяс лэччисны пывсьыны бать-мамыс ордö. Мунöм водзвылас Валя тэрмасигмозыс, Ванюкыс бöрдö вöли да, виль перстеньсö пызан вылö пуктіс. Патераын Васька каньпи кындзи некодi эз коль.

Корöсялöм-мыськöм писö пывсянысь нуис батыс. Оля нылыс öдйö жö мыссис да жарсьыс ывлаö чепöсйис. Сэки Валя бурпöт корöсясис да пырис мамъяс ордас пöжöм сёркни кодь. Мудзöма, шуймöма — водіс-лажгысис небыд диван вылö. Ичöт Ванюкыс крöватын узыö. Батя-ныла инпöлын юмов чай чурскöны. Шойччыштöм бöрын Валя пуксис на ордö чай юыштны. Инпöлас ичöт телевизор сулаліс да, кинофильмсö сэнi и видзöдісны, мед дзoлюкнысö не садьмöдны. Но коркö Ванюк век жö паляліс, и мамыс сийöс пасьтöдіс-гачöдіс, рокөн да йöлөн вердіс. Сэсся гортаныс мöдöдчисны. Сэнi нин Валя мыйкöдыра ноксьöм бöрын пуксьöдіс дзoлюксö джоджö вольсалöм ковёр вылö да сетіс чачаяс. И сöмын сэки перстеньыс дум вылас уси. Ань матыстчис пызан дорö, мед донаторсö аслас кудйö дзeбны. Но чунькытшыс места вылас эз вöв.

— Олюк, артистка,— горöдіс Валя.— Ноко, волы ме дорö.

Нылыс петіс ичöт вежöсысь. Валя шöпкöдчöмөн, мед верöсыс оз кыв, юаліс Олялысь:

— Тан пызан вылас перстень вöли да, тэ эн босьтлы?

— Кутшöм персьтер? Мый ме сийөн вöча?

— Ачыд тэ, нылукö, песьтер. Чунькытш сийö, чунькытш. Гөгөрвоин?

— Гөгөрвои. Но ме сийöс эг босьт, ачыд он лэдз сикöтш мольнад ворсны да.

Валя думыштчис. Öд бура тöдіс, мый чунькытшсö пызан вылас пуктыліс. Босьтны некодлы. Оля, кöнкö, оз жö пөръясь. А Сергейлысь Валя оз лысьт юавны, сылы виль ньöбöмтор йылысь эз на висьтав да. Быдлаысь вошöмторсö корсис, джоджысь и быд шкапысь, видлытöг эз коль ни öти пельöс. Став паськöмсö бергöдіс-пыркöдіс, «стенка» вывсьыс нэмöвöйя буссö ва корöсьөн чышкис... Абу-ö сэтчö пуктысьсöма тэрмасигöныс... Чунькытш быттö сылöма-пакталöма.

— Серёж,— медбöрын шөгö усьöмөн шыасис верöсыс дорö.— Тэ ыджыд вежöсас пызан вывсьыс нинöм эн босьтлы?

— Эг. Мыйкö вошис али мый?

— Да öти важ перстень пызан вылас коли, а сийö пывсигкості вошöма.

— Век тэнад мыйкö вошöма, колян кытчö оз ков, сэсся ставнымöс йöйтöдлан. Васькаыдлысь юав, гашкö, сийö тöдö.

— Эн серав,— лёкöдчис гöгырыс.— Ме аслам донаторьясөн ог шыблась. Век дзeбасын видза.

— Но и бур. А ме тэнсьыд некутшöм песьтер эг аддзыв,— кывкöрталіс Сергей да пырис узыланінö.

— Абу песьтер, а перстень. Нинöм он тöд, сэк жö шыалан,— дözмис Валя, но эз öвсьы. Джоджын ворсысь пиыс дорö пук-

сис:— Ванюк, пиук. Тэ менсьым чунькытшös эн босьтлы? Пызан вылас вöлі.

Кагукыс чачаөн ворсö. Мамлөн юалöмыс сылы пым ни кö-дзыд. Гöрд помидор кодь чача мамыслы мыччис:

— Ням-ням, ням-ням,— шуалö.

— Кыдз ням-ням?— чуймис ань.— Тэ нö мый, менсьым перстеньös кылöдін али мый?

— Ням-ням, ням-ням,— ичöтик кинас вомас индöмөн бара на телькöдчö муса дзолукыс.

— Серёж!— повзьöмсорөн горöдіс Валя.— Ванюкным чунькытшös кылöдöма. Ачыс висьталіс, ням-ням пö. Ой, мый бара-й öні лоас...

Скöрмöм верöсыс петіс узыланінсьыс:

— Тэ, Валуек, аслад чунькытшнад некодлы шойччыны он лэдз. Кытчö пуктін, сэсь и корсь, а миянös эн вөрöд. Ванюк öд ичöt на. Мый сійö кужас висьтавыны... Гашкö, сейны корö, со и ням-ням шуалö.

Рытнас Валя водіс сьöкыд думъясөн. Ставөн узыöны. А сылөн синмыс кольча кодь. Быдторйыс юрас воö. Гашкö, Серёжыс чунькытшös босьтіс да важся нывьёртыслы кöсйö козынавыны... Гётрасьтöдзыс Эля нывкöд тöдсьöма*. Сы вылö, йöзыс висьталöны, кöсйöма быгтьö гётрасьны. Но нылыс эновтöма Сергейös. Мöд сайö мунöма...

Сэсся Ваялы дум вылас воис рөмпöштан водзын нывкаыслөн сикötшөн бергалöмыс. Оля öд, гашкö, эз жö босьт. Но вермис, мед школаас ошйысьыштны...

Дыр на эз узысьы нывбабалы. Медбöрын унмовсис жö. Садьмис пиыслөн гораа бöрдöмысь. Матыстчис сылөн крöвать дорö, босьтіс кагасö киас. Но мый тайö... Пиыс сотчöмөн сотчö, бöрдö, апа-апа шуалö. Кымöсыс пым. Трусик-майкаыс быдсөн ва.

— Пиук, тусюк, мый тэкöд лоис, кыті апö?

Ванюк нинöм оз сяммы висьтавыны, ичöt на да. Сöмын бöрдöняргö. Валя сылы киняулас градусник пуктыліс, и чайөн видліс юктöдны, и жар лэдзан порошокөн. Пиыс медбöрын раммис — унмовсис. Но асывнас Валя удж вылас эз мун. Звөнитліс сöмын, юөртіс, врач дорö пö пиукös колö нулыны, висьмис да.

Больничаын ань висьталіс бурдöдысьлы, кыдзи да мый лоис Ванюкыскöд пывсьöм бöрын, эз вунöд и зарни чунькытш йылысь. Гашкö пö, чунькытшös кылöдöма, да та понда висьмис. Врач быдсөн чуймис. Кыдз нö пö татшöм дзоляыслы чунькытш сетанныд, сійö пö öд ичöt на, нинöм оз гөгөрво. Со кынöмыс и висьмис. Пырысьтöм-пыр пö рентген вылö ветлөй. Мед снимок вöчасны. Сэсся тыдовтчас, мый вöчны. Гашкö, и операция вылö ковмас карö мöдöдны.

Валя повзьöмысла быдсөн тіравны кутіс. Лөкөн-сорөн пасьтöдіс пиуксö да котөртіс рентген кабинетö. Сэн Ванюкös снимайтісны, пажын бöрын Валя босьтіс вочакывсö да бара жö воддза врачыс дорö пырис. Мöдыс видзöдліс снимоксö, мöдысь видлаліс Ванюкös да вöчис помшуöм:

— Пиыдлөн пытшкөсас некутшöм көрттор абу: ни зарни, ни эзысь. А температураыс, тыдалö, пинь петсьö да, сійөн. Дай пывсьöм бöрас, тыдалö, неуна кынмыштöма кагаыд.

* Тöдсьыны (диал.) — волысьны.

Валя сэсся вежон чөж пиыскөд пукаліс. Но перстеньыс дум вывсьыс эз и вошлы. Оля нывсө весиг пельөсө сувтөдліс. Партизанкаөс моз юасис:

— Тэ босьтін менсьым перстеньөс? Ноко, петкөдлы зептө, портпельтө...

Оля пемыд пельөсын ливзө-бөрдө, некутшөм перстень пө эг босьтлы. Ме сөмын сикөтшнад ворсышти!

Дөзмөм Валя дзикөдз пөгибө воис. Сэтшөм донатор өд вошис. Весышөрө сьомсө лои лэбөдөма. Лэдзис Олясө пельөсын сулалө-мысь гортса удж вөчны, ачыс верөсыс дорө матыстчис:

— Оля, буракө, перстеньөс абу босьтлөма. Ванюк абу жө кылөдөма. Сідзкө, сөмын тэ, Серёж, сійөс вермин босьтны да дзебны.

Сергей недыр кезлө кынмыліс, сэсся кыв-ворыс воссис жө:

— Валя, тэ гөгөрвоан он, мый сөран?

— Вөвлөм мусаыдлы нин, көнкө, козыналін.

— Кутшөм вөвлөм муса? Йөймин али мый чунькытнад?!— дзикөдз ярмис верөсыс.

— Ме, Серёж, тыр вежөра на. Но перстеньыс зэв дона вөлі. Неважөн сійөс ньөби, пывсянө мунөм водзвылын со тайө пызан вылас пукті. Та бөрын чунькытшсө эг на аддзыв.

— Менө нө мыйла мыждан? Ставнымөс нин мыжалін. Васькалысь юав нөшта,— индіс джодж шөрын ворсысь каньпи вылө.

Васька и збыльысь кутшөмкө югыдтор лапанас гөгльөдлө, гольөдчө-ворсө. Сергей өні нин бурджыка видзөдліс каньпи вылө да горөдіс:

— Ноко, муса гөтыр, видзөдлы, мыйөн ворсө Васьканым! Тыдалө, тэнсьыд перстеньтө аддзөма.

Валя матыстчис кань дорө. И збыльысь, лапаяснас Васька гөгльөдліс джоджөд сылысь дона чунькытшсө.

— Васька-а, мусаник Васюк, кысь нө тэ перстеньсө аддзин?— Валя кутіс сывъявны-окавны кысуксө.— Көні сійө вөлі? Өд тайө чунькытш пондаыс неуна эг йөймы.

— Дай миянөс на неуна эн йөймөд,— серөктіс радысла Сергей.— Мөдысь кезлө донаторъяснад эн шыблась. Васькалы аттө висьтав, перстеньыд, тыдалө, диван горулас гөгыльтчөма.

Валя дзебис чунькытшсө аслас кудйө дай пернапас на чөвтис, мед нин сэсся сэтысь нинөм некор оз вош. Та бөрын Васькатө ёнджыка кутіс радейтны, быдкутшөм чөскыдторнас вердө. А верөсылысь да Оля нылыслысь прөща корис. Йөюк пө ме, йөюк, нем абуыс понда тіянөс дөзмөді...



Войнаысь полӧм вӧсна

В И С Ъ Т

Виктор Ӧльӧ гӧтырлӧн, Якӧ Сандралӧн, тшыгъялӧмысь кулӧмыс шензьӧдіс сиктсӧ: гуалӧм бӧрас гӧбӧчсьыс аддзӧмаӧсь рудзӧг и крупчатка пызь, рис, проса, греча шыдӧс, сов, сакар, песок, сола и шома капуста, а картопель тыра гу пыдӧссьыс — сӧм. Шойна вылас сёрнитісны, мый Якӧ Сандра ёна тшыгъялӧма война дырйиыс, а война кусӧм бӧрас полӧма выль кось пансьӧмысь. И гӧбӧчас заптӧма ставпӧлӧс сёянсӧ, чукӧртӧма и сӧм. Збойджык йӧз содтісны на, ай-мамыс моз жӧ пӧ заптысис.

* * *

Шондіа гажа лун. Шочиника пӧльыштлӧ небыдик лун тӧв. Ва веркӧсыс рӧмпӧштан кодь. Оз тыдав чери гыбалӧм. Пукала Борган ты кыр йылын. Видзӧда, мӧвпала. Дум вылӧ усьӧ челядьдыр. Шондіыс сӧмын на чеччӧма, а Виктор Ӧльӧ чери тыра ыджыд пестерӧн нин локтӧ. Борган тыысь кыйӧма. Тувсовъя ытва дырйи тыыс Эжваыскӧд ӧтлааслӧ, и сэки чериыс сэтчӧ пырӧ. Гожӧм и ар, тӧв и тулыс сиктсаяс Борган тысьыс черисӧ кыйӧны. Быдӧнлӧн аслас места.

— Ті, вуграсьысьяс, менам кыйсянӧ энӧ пырӧй!— ӧлӧдӧ миянӧс Виктор Ӧльӧ.— Черитӧг кӧ коля, гӧтыр ойкӧдас.— Чеччӧ шойччанінсьыс. Шӧрипӧв кусыньтчӧма сьӧкыд пестер улас, вежыньтчӧм гӧнсялӧм чужӧма, гежӧдик ус-тошка, пошиктӧмӧн воськовтӧ джуджыд кыр йылын сулалысь сиктлань.

— Ми асланым Шӧр-ді весьтын вуграсям. Тэнад кыйсянӧдз сёсянь ылын на,— вочавидзам ми, мед лӧньӧдны сійӧс. Тӧдам ӧд гӧтырыслысь ӧбичасӧ.

Виктор Ӧльӧлӧн керкаыс сулаліс сикт шӧрас вотӧдз на, Архангел Михаиллӧн часовняыслы дзик воча, сӧмын мӧдар туй бокас, лунладорас. Лэптылӧма керкасӧ сарскӧй военнӧй флотын машинистӧн служитысь Артип Вась Иван. Военнӧй сословиеӧ пырысьлы вӧрсӧ сетлӧмаӧсь дон босыттӧг... Артип Вась Иваныс бӧрын керкаас ӧлӧма Виктор пиыс, а сы бӧрын Ӧльӧ пиыс нин. Виктор Ӧльӧӧс война вылас абу босытлӧмаӧсь, а ӧтчыд чери кыйигӧн Борган тыас вӧлі сунгысьӧма да пӧдӧма.

Якӧ Сандра война чӧжыс уджаліс колхозын. Тӧвнас лэдзис вӧр, тулыснас, гожӧмнас да арнас му-видз ылын уджаліс. Ёна сьӧкыд вӧлі: ковмис на ӧд быдтыны челядьсӧ. Но мӧскысь эз лэдзчысь.

Колхозникъяс заптылісны турунсӧ гортас вайӧм вылӧ тыяс гӧгӧрысь, вӧрса видзясысь, пу костъясысь, йӧнӧдысь. И сӧмын войнас. Луннас колхозын уджавны коліс. Изгармӧм муяс ылысь няньыс чукӧрмис этша. И сійӧ этшаник няньсӧ сдایتісны госу-

дарстволы. Трудодень вылө юклісны граммъясөн. Няньсö пöжалісны кач, жуг сорөн. Сійöс сёйöм бöрын кодсюрö коддзылісны. Ёна паськавліс «кодалöмыс» сёрмъясысь няньсö вартігөн. Война бöрас нин висьталісны, мый тайö висьöмыс — тусяс овмöдчöм фузариум тшакысь. Тшакыс, вöлөмкö, сёйö тусьсö и яд лэдзö.

Ёна сьöкыд вöлі войналөн мöд воис. Фронт вылө айловъяслөн мунöм вöсна няньыс коли идравтöг, веськаліс лым улö. Тулыснас тöвйöм няньсö ытшкисны гөрбуш косаясөн, вундісны чарлаясөн, нетшкисны. Вартöм тусьсö юклісны трудодень вылө да изісны. Но тайö пызысь пöжалöм няньсьыс йöзыслөн пыкталіс горшыс. Врачыс шуисны тайö висьöмсö септической ангиналөн. Якö Сандралөн сысьс кувсисны пиис да нылыс.

Война коймöд воас Якö Сандраöс суис нöшта öти лектор. Сэки быдлаын шöйтысь ошъяс косявлісны сылысь мөссö. А карта вылас кольöм кыкнан ыжсö нуисны яй поставка вылө. Но та вылын шогыс эз на помась: Чибьюын вөр пöрöдігөн пу улö веськаліс медбөрья нылыс — Наста — и нэм кежлö лои инвалидөн. Якö Сандралөн керкаыс тыртöммис. Ачыс омöля сёйöмысь шатлаліс, тойöссис.

1947 вося юль тöлысяс кыкысь чорыда пужъявліс, кынтіс нянь кодзаяс да картофель. Лои няньтöм и картофельтöм во. Йöзыслы сэки быдсяма быдмөгсö ковмис сёйны: азыгум и гөнью гум, куз, йигö кок*, коляоз, том пожöмъяслысь туту йывсö. Тадзи жö пöтлунсö шедöдліс и Якö Сандра.

Уна войсылөн узьтöмөн кольліс. Якö Сандра көть и ёна уджаліс, унмыс сійöс эз личкы: кынöм сюмалöмысла, лёк мөвпъясысла. Газетъясын гижисны страна вылө войнаөн выльысь уськөдчыны көсйöм йылысь. Найöс лыддьывлісны колхозса собранияс дырйи.

— Сідзкö, бара на вермас ышнитны война. И сы кежлö колö лоны дасьөн,— кывкөртавліс газет лыддьысьыс.

«Сідзнад, бара ковмас тшыгъявны!— шуывліс аслыс Якö Сандра.— Колö чукөртны пызь, сов, истöг, сакар, сьöм».

Сталин кулöм бöрын олöмыс кокняммис. Бырöдісны поставкаяс, чинтісны вотьяс. Якö Сандра лөсьöдіс мөс. Пуктіс картофель, аслас му вылас кодзліс ид, көнтусь да пыш. Тшөгöдіс куканьöс. Йөвсö 3—5 шайтысь литра вузаліс сиктыскöд орччөн вөсьöм вөрпунктын олысьяслы. Налы жö вузаліс яй. Гырийн майкис-тойис көнтусь — вöчис кос вый. Шабді кудельысь печкис сунис, кыис дөра. Ньöжйöник чөжис сьöм, пызь, сов, сакар. Ставсö дзевлаліс гөбөчас.

Öтчыд Чудö лунö, сиктын медгажа праздникö (овлö сентябр 19 лунö) ме пыралі ёрткöд Виктор Öльö керкаö. Виктор Öльöлөн чойыс буретш вайис Якö Сандралы тасьті тыр зөр шыдöса рок да пуктіс пызан вылас. Якö Сандра, вежыньтчöм, косьмөм чужöма, лёкысь видзöдліс рок вайысь вылө, босьтіс тасьтісö пызан вывсьыс да броткигтыр нуис пачводз дорас. Гурс-гарс ректіс роксö кашникас.

— Тырмас и та мындаыс тіянлы!— бротнитіс сійö пыдöсас тыдыштысь рока тасьтісö пызан вылас пуктігмоз да пырис гөбөчас.

* Йигö кок (диал.) — бобöнянь.

— Коркѳ нужникас Наста нылыс,— ѳні сійѳ индомын олѳ,— гоз-мѳд картупель вѳлі уськѳдѳма. Якѳ Сандраыд нужниксѳ став-нас пузувтѳма. Картупельсѳ корсьѳма. Настасѳ кѳтѳдѳм гезйѳн сѳсся нѳйтѳма. Гезсѳ Настаыс жѳ и мамыслѳн тшѳктѳм серти кѳтѳдѳма,— гусьѳник висьталіс Якѳ Сандралѳн суседыс, Самѳ Ѳньѳ.— Батьыс, Конѳ Як, зѳв озыр вѳлі. Керка пытшкас быдсяматорйыс. Картаас и гидас скѳт. Кѳдзѳ 30 пудйѳдз ид, 15 пудйѳдз рудзѳг. А пирыс Виктор Ѳльѳ гозъялѳн зѳв гажтѳм вѳлі. Мода вылас дзик. Менѳ, кѳть и рѳдвужѳн лоа, эз и корлыны. Конѳ Якыс шуѳма: зѳв пѳ уна сѳяс да гѳльмѳдас!

Татшѳм сѳрни бѳрас меным лѳк лои: кынѳмѳй гудыртчис, юрѳй бергѳдчис. Пуктѳ паньѳс да кѳтѳрѳн петѳ ывлаас. Вом-ныр пыр кыски ас пытшкам сѳстѳм сынѳдсѳ. Дум вылѳ уси ас-лам синмѳн аддзылѳмтор. Вѳлі зѳв кѳдзыд гожѳм. Быд керкаын ломтисны ыджыд и кѳрт пачьяс. Став верстьѳыс удж вылынѳс нин. Ме мѳдѳдчи жѳ удж вылѳ. Джуджыд шор пѳлѳнѳд Важ Ѳжвалань вѳсьлала. Друг кыла лѳкыс горѳдѳмьяс. Бергѳдча и аддза Виктор Ѳльѳ керка ѳшиньясыс петыс тшын. Кѳтѳрта да мукѳдкѳд тшѳтш пыра керкаас. Якѳ Сандра куйлѳ пу крѳватяс. Вольпасыс сотчѳ. Ми кѳсьям петкѳдны, но сійѳ пыксѳ. Горзѳ:

— Первой вольпасьсѳ петкѳдѳй, а сѳсся нин менѳ!

Вѳлѳмкѳ, Якѳ Сандраыд вольпасяс дзеблавлѳма йѳв-йй вузалѳмыс сьѳмсѳ. А вольпасыс ѳйѳма орчѳн сулалыс кѳрт пачсяныс. Якѳ Сандраыд ломтѳма сійѳс, водѳма и унмовсьѳма. Ѳгырыс пач вомсьыс чеччыштѳма да вольпасяс и веськалѳма. А нѳмѳвѳйся вольпасыд порок кодъ.

Сиктад быдѳнѳс дѳжналѳны. Сьѳм тыра вольпась йывсьыс ѳна жѳ сѳрнитисны. Шуисны, батьыслѳн пѳ сьѳмыс сотчылѳма жѳ. Сьѳмсѳ сійѳ дзеблавлѳма пывсянас, но абу муас гуалѳма, а гор дорланьыс дзебас вѳчлѳма, изйѳн тупкѳма. Кодкѳ сѳсся пывсянсѳ войнас ѳзтѳма. Важ пывсяныд здук-мѳдѳн и сотчѳма.

А Конѳ Яклѳн гѳтырыс, Ѳртем Парась, лѳкиник чышгьянѳн ветлѳдлѳма. Шулѳма, таыс бурыс пѳ абу. А кулѳм бѳрас жыт-никсьыс сундук тыр быдсяма чышгьяныс и шаллыс сюрѳма. Сѳки верѳсыс абу нин ловъя вѳлѳма. Нулѳмаѳсь кытчѳкѳ паськыд муясѳ. Йѳзсѳ нартитѳмысь, ас вылас уджѳдѳмысь. Пывсян сотысьсѳ абу жѳ корсьлѳмаѳсь. Енмыс на пѳ шулѳма: сьѳм, озырлун чукѳртѳмыд — грек. Енмыс пѳ и мыждіс Конѳ Яксѳ. Збылысьсѳ казакалысьяс писыс ѳти морт вѳлѳм ѳзтѳма.

Вольпась ѳйылѳм бѳрас Якѳ Сандраыд сьѳмсѳ гѳбѳч гуас дзебѳма. Нывбабаыд ѳд тай нѳмсѳ пыр сьѳкыда оліс, пессисмырсис. Овмѳс бергѳдіс, челядсьѳ быдтис. И пыр думайтис, мый пуны-пѳжавны талун, аски, аскомысь, вежон, тѳлысь мысти. Тадзи жѳ оліс и Якѳ Сандра. Сійѳ поліс война ѳйѳмысь, лѳк поводдяысь. Быд асыв и рыт видзѳдіс енѳжас, поліс кѳдзыд тѳв пѳлыштѳмысь, кузь зѳрысь, мусѳ, вѳр-васѳ сотысь шондїысь. Лѳк поводдяыс вермис кольны няньтѳг, картупельтѳг, турунтѳг, вотѳстѳг, а сідзкѳ, вайѳдны тшыг олѳмѳдз. Сѳтшѳмѳдз, кутшѳм вѳлі война воясас. Вой тѳла луньясѳ Якѳ Сандра бѳсьтліс чуман, ноп да мунліс лавкаѳ. Ньѳблывліс нянь, шыдѳс, сакар, сов, истѳг. Гортас ставсѳ тѳчліс гѳбѳчас пельсаясѳ, шѳмѳсьясѳ, туисьясѳ, чуманьясѳ, пестерьясѳ.

Арнас урожай идралѳм бѳрын сійѳ ѳктыліс колхозса (бѳрын-

нас — совхозса) муяс вылысь кольём картупельсö, сёркнисö, турнепссö, капустасö. Шепалём пуктассö сэсса и пулис-сёйлис, ассыс быдтöмсö видзтылис. Тадзи воясөн гөбöчас чöжсис сьöкыд кад кeжлö сёян. Но та вылö видзöдтöг Якö Сандра омöлика сёйис. Абутöм улö лэдзчысьöмөн олис. Сйöн и дзикöдз вöснялис, кось-мис, куш лыс да кучикыс колис.

Кодсюрö сиктас шулисны, дыр-ö нö пö тадзи, Александра Яковлевна, кутан овны, асьтö ловъявывыссьыд вины? Сёянтö эн видзты, эн дзeблав. Сёй, мый эм. Олöмыд öд öтчыд мортыдлы сетсьö.

— А война кö нö пансяс, сэки мый кута сёйны?— вочавидз-лис Якö Сандра.— Кольём войнадырся тшыгъялöмыс öнi на пов-зöдлö!

Омöльтчöмысла Якö Сандра пондiс висьöдчыны. Кыкысь нин кынöмсö топöдлис. Сиктса пельшöр тшöктiс Якö Сандралы лэч-чывны Шойнатыса больничаö, но мöдыс öвтыштчис: сьöмыс пö пароход да машина вылас абу, ачыс бурдас.

* * *

Гымыштiс-чардыштiс Виктор Öльö керкаын йи кылалiгас. Якö Сандра Ёджыд лун кeжлö заводитöма мыськавны джоджсö. Ва ветьöксö пыдзыртöма. Копыртчöма да сэтчö и усьöма.



ПЫДДИ ПУКТАНА АВТОРЪЯС!

Редакцияö гижöдъяснытö ыстiгөн быть колö юöртны:

1. Ассыныд ним, вич, ов; кор да кöнi чужлöмныд (лун, тöлысь, во).
2. Паспорт юöръяс: номер, серия, кор да кöнi сетiсны, гортса адрес (прописка серти).
3. Индивидуальной налогöвöй номер — ИНН (кодлөн эм).
4. Страховöй свидетельство номер.
5. Банкын счёт реквизитъяс.

Тайöс юöрттöг редакция гонорар оз вешты.

*Журналын йöзöдтöм гижöдъяс
редакция оз рецензируйт и авторыслы найöс оз мöдöд.
Редакция оз век во öти кывйö авторъяскöд.*

Компьютерный набор **Н.Кузнецова.**

Учредители: Агентство Республики Коми по печати и массовым коммуникациям, «Союз писателей Республики Коми» — региональное отделение общероссийской организации «Союз писателей России».

Издатель: АУ РК «Издательский дом Коми». Директор: Попов В.В.

Адрес издателя: 167982. ГСП-2, г. Сыктывкар, ул. Карла Маркса, д. 229, Дом печати.

Адрес редакции: 167982. ГСП-2, г. Сыктывкар, ул. Карла Маркса, д. 229, Дом печати.

Телефоны редакции: 24-47-52 (гл. редактор), 24-51-52 (общ. отд./факс), 24-46-36 (бухгалтерия).

E-mail: kodzuv@mail.ru; Сайт: www.komimu.com

Подписано к печати 16.03.2016. Формат 70х108¹/₁₆. Печать офсетная. Усл. печ. л. 7; усл. кр.-отг. 8,4; учётно-изд. л. 7,54. Тираж 442. Заказ № 1735. Регистр. ПИ № ФС 3 - 0226 от 20.01.2006 г. выдано Беломорским управлением Федеральной службы по надзору за соблюдением законодательства в сфере массовых коммуникаций и охране культурного наследия. Публикация материалов, направленных на освещение реализации социально значимых проектов, осуществляется при государственной поддержке в форме субсидии Агентством Республики Коми по печати и массовым коммуникациям. Отпечатано в ООО «Коми республиканская типография», 167610, г. Сыктывкар, ул. В.Савина, д. 81. Цена свободная.